

HSET LUCA

Bàu lem tiaq Luca taqmon

¹ Wì craq Thêopilo, i bàc ngai khoe dìq ka manoh achìh hu taqmon hlài bài yiniq broq ma khoe gèh oe taqne nhèn,

² tiaq wì ma hnoq qmòe enh baxèm, manòeq khoe loh mangai ma patìh ka Bàu lem khoe anoe hlài ka bèn,

³ qmang aih jò khoe ngan hlài ka rabiaq rìm trong enh jò baxèm, au hèm khòh tiaq qmòe tang cadiang hu achìh hlài ka ìh,

⁴ dōq ìh loq qmòe ka cajap bàu ìh ma khoe jah hōc aih joq qnàng.

Bình plình bahà ka Xachari

⁵ Qnhòng Hêrôt broq bùa diac Judê, i mòeq ngai pajàu yiniq haq Xachari, tiaq dèh apah Abija, Êlisabet mai haq hadai nang noe Arôn.

⁶ Boc Plình ngan hnoq dìq baiq ka wa aih mangai taq atoq, wèq gèh geo rìm ranenh hloe xam rìm ramènh Boc Plình thê.

⁷ Wa ùh i ka kon majah qmang aih Êlisabet haq xon, èh dìq baiq ka wa khoe bàc hanam.

⁸ Jò Xachari tiaq dèh wì ma ta axong, khoe troq jò da haq broq pajàu dèch ramènh tadreo am ka Boc Plình.

⁹ Tiaq dèh trong bài pajàu kàn xan broq, Xachari pàih panàih troq ka haq mùt ta hnim kùh waiq òdeq bùh gahnàu xua thùm ka Boc Plình.

¹⁰ Trùh jò bùh gahnàu, bài mangai bàc oe òi enh gùng waiq khàn.

¹¹ Moeq bình plình loh enh ngèa ka Xachari, yòng enh pah qma ka nòe prang bùh gahnàu.

¹² Jò Xachari hnoq bình plình, haq loh ka lèt rai yùq crè.

¹³ Mahaq bình plình doe ka haq: Xachari, ùh dùh yùq, bàu ìh waiq khàn khoe jah tamàng, Êlisabet cadri ìh, haq aih èh ha-uang ka ìh moeq ngai kon calô, ìh yiniq ka aih Jon.

¹⁴ Kon calô aih èh broq ka ìh jah lem bùi, bàc ngai qnoeq hadai manè jò ha-uang qnoh haq.

¹⁵ Enh ngèa Boc Plình, kon qyoh aih wia gucraq, yac ka alac plì nho, yac ka cleq ma loq bù dua haq ùh ôq, haq aih jah bình halùih Yiang Hadròeh jò haq oe raq ta cliac miq.

¹⁶ Haq qnung bàc ngai Isorali wìh hlài trùh ti Chuaq aih Boc Plình wì haq.

¹⁷ Èh haq lam enh ngèa ka Chuaq tiaq manoh xam kan itai qmang da Êli, òòeq broq manoh baq wìh hlài dèh ta kon, èh mangai ùh qnì iu wìh hlài ta kan rabiaq da mangai taq atoq, hu padon òòeq ka Chuaq moeq nang noe khoe palauq òòeq ta manoh.

¹⁸ Xachari bòch bình plình: Broq qmang leq au ma loq ka bàu ìh aih jòq qnàng? Au khoe craq, mai au khoe bàc hanam.

¹⁹ Bình plình doe: Au kô Gapriên, yòng enh ngèa ka Boc Plình. Haq khoe thê au trùh bahia kan lem bùi kô.

²⁰ Manòeq kô, ìh loh ka làu, pi hloh tapoch trùh hì loh bài yiniq qmang bàu au khoe anoe, majah

q̄mang aih ìh ùh lùì bàu au, aih la bàu trùh dèh jò hì xit.

²¹ Jò aih dìq ka òai wì mangai bàc oe enh gùng gòm Xachari dìq jaq hamàih, majah q̄mang aih haq oe ta hnìmh kùh waiq dùnh hrìn.

²² Jò Xachari loh enh gùng, haq tapoch ùh jah, aih wì ma hì loq haq i hnoq kan mahno tanòe hnìmh kùh waiq, haq yòc tì ti patìh ka wì, mahaq oe raq lâu.

²³ Jò haq khoe dìq dèh ka hì patìh, haq hlài dèh ta hnìmh.

²⁴ Toq bìa q̄ atìq ka aih, Êlisabet, mai haq hì hadràp, haq cadoc rađeh padam khê

²⁵ haq doe: Chuaq khoe broq yiniq kô ka au, haq khoe haqmiang ngan au, òòeq lèh kan camaih au oe taqne mangai bàc.

Anoe adroe hì ha uang Jesus

²⁶ Jò Êlisabet oe jiang khoe jah tadràu khê, Boc Plình thê bìnìh plình Gapriên trùh ta plài Naxaret, gùng Galili.

²⁷ Lam glàm mangai adrùh sriu yiniq haq Mari, khoe têu bàu yòc moeq ngai radam yiniq haq Jôsep, caxi noe Đawit.

²⁸ Bìnìh plình trùh ajang nòe mangai adrùh aih rai doe: Manè am ka ìh, mangai jah xôq ramot! Chuaq oe ti ìh.

²⁹ Tàng bàu aih Mari haq hamàih, haq hèm bàu hangah q̄mang aih ìq q̄mang leq?

³⁰ Bìnìh plình doe: Mari ùh dùh yùq dèh, majah q̄mang aih ìh khoe jah kan tamèt enh nòe Boc Plình.

³¹ Kô èh ìh hadràp èh ha-uang loh moeq ngai kon calô, ìh yiniq ka haq Jesus

³² Haq aih èh wìa gucraq, jah creo Kon Yiang Dìq Jaq Haqnhèq. Chuaq aih Boc Plình jah am ka haq gèq enh kan cadraq haq aih Đawit.

³³ Haq aih èh ma wèq cwìang enh qnhèq ka nang noe Jacôp trùh mòeq đòe, diac dà haq ùh lùch.

³⁴ Mari padreo bàu: Au qnhòq lah qnì ka gualô leq, wìa ka i qmang aih?

³⁵ Bình plình doe: Yiang Hadròeh trùh enh qnhèq ka ìh èh kan itai Yiang Dìq Jaq Haqnhèq taqmàn ìh tayàp haq, dài aih ìq raq, kon hadròeh aih ha-uang loh majah ep creo kon Boc Plình.

³⁶ Hatau, Êlisabet mangai hadròng ìh, hanoh oe jiang jò haq khoe craq, rìm ngai khoe loq ka haq aih xon, yàng manòeq kô haq oe jiang khoe jah tadràu khê.

³⁷ Majah qmang aih, ùh i cleq Boc Plình ma broq ùh jah.

³⁸ Mari padreo bàu: Au kô mangai hapǒng Chuaq, waìq bàu ìh anoe ka au aih jah gêh! Khoe aih bìn plình hi lam.

Mari lam hmàih ka Elisabet

³⁹ Ta bài hì aih, Mari haq drah lam trùh ta plài ma oe ta wang nòe gùng Jude,

⁴⁰ ta aih haq mùt ta hnim Xachari rai dèch bàu manè lem bùi ka Êlisabet.

⁴¹ Êlisabet bu tàng bàu Mari, kon nga oe ta cliac khoe canhroh, Êlisabet khoe jah bìn Yiang Hadròeh,

⁴² Haq dèch bàu anoe: Taqne dìq dǒng ka mangai gucadrì, ìh kô mangai i xôq ramot, kon qyoh oe ta cliac hadai jah xôq ramot.

⁴³ Enh leq kô ìq au majah kan tamèt qmang kô, miq da Chuaq au trùh hmàih ka au?

⁴⁴ Majah qmang aih don au butàng bàu ìh, kon nga ta cliac au khoe canhroh rai lem bùi.

⁴⁵ Xôq ramot ka ìh mangai khoe lùì bàu Chuaq anoe, aih bàu trùh dèh hì jah xit.

⁴⁶ Mari doe rameh:

Manoh au manè apôi Chuaq,

⁴⁷ Mahua yiang au lem bùi tanòe Boc Plình aih Chuaq dèch au,

⁴⁸ Majah qmang aih haq khoe hqmàng hnoq kan hamoq au, mangai hapǒng haq.

Pang kô ta èh, rìm qnhòng dìq anoe au kô mangai i xôq ramot;

⁴⁹ Majah qmang aih, Yiang dìq jaq haqnhèq, khoe broq biác kàn ka au.

Yiniq haq aih hadròeh,

⁵⁰ Haq loq waq ka mangai loq iu haq enh qnhòng kô trùh qnhòng tau.

⁵¹ Haq yǒc dèh tì kǒng òdeq patô qnoh deh kan itai;

Rai raliang đac trong da mangai i manoh loq padèch rađeh.

⁵² Haq khoe caqnìh qnoh mangai i cwìang cìh enh gèq cla wì haq,

Rai dèch atǒc mangai loq hamon rađeh

⁵³ Haq khoe broq ka mangai pangot jah bình dahwèq jàng,

Hnan mangai kan hlài tì dech.

⁵⁴ Haq khoe wiang ti Isorali, hapǒng haq

Đòeq bahmàng hlài dèh kan loq waq haq,

⁵⁵ Tìah ka bàu haq khoe doe ka kan cadraq bèn.

⁵⁶ Mari oe ti Êlisabet jah ta piq khê, khoe aih hi wìh hlài dèh ta hnim.

Ha-uang ka Jon Baptit

⁵⁷ Jò khoe trùh dèh khê Êlisabet hi ha-uang, haq ha-uang moeq ngai kon calô.

⁵⁸ Plài pla xam bài oh daq hia Chuaq khoe dìq jaq tamèt ka Êlisabet wì wiang trùh lem bùi ti haq.

⁵⁹ Trùh rahem hì, dìq ka wì lam ta aih òòeq broq ramènh kat akia, wì yiniq ka kon qyoh aih Xachari tiaq yiniq dèh baq.

⁶⁰ Mahaq miq haq doe: Ûh, ep yiniq ka haq Jon.

⁶¹ Wì doe: Dìq dǝng ka nang noe ìh ùh i ka cabô leq i yiniq aih.

⁶² Wì yǝc tì ti patìah hu bǝch baq haq enh yiniq dèh ka kon yiniq cleq.

⁶³ Xachari thê wì yǝc capiac long ban qyoh, haq achìh: yiniq haq Jon. Mangai leq mangai meh hamàih ðeh hra.

⁶⁴ Wop hloe jò aih raq, rapet haq jah raðah, haq tapoch rai manè apôi Boc Plình.

⁶⁵ Dìq ka wì taplài cadròt ðeh hra, dìq ka gùng wang Galili wì anoe ka dabau toq trong aih.

⁶⁶ Cabô tàng bàu aih hanoh wê òòeq ta manoh rai doe: Kon nga aih èh qmang leq cadèh oq? Majah qmang aih tì Chuaq oe ti haq.

Xachari calêu

⁶⁷ Jò aih, Xachari baq kon nga aih jah bình Yiang Hadròeh, haq tapoch pajàu rameh:

⁶⁸ Manè apôi Chuaq aih Boc Plình Isorali,

majah qmang aih Ìh khoe trùh hmàih, rai baxon
yõc hlài Isorali mangai da Ìh,

⁶⁹ Ìh khoe paqnàng ka nhèn, ta hnim Đawit
hapõng Ìh,
moeq Ngai dèch nhèn i kwìang itai!

⁷⁰ Tìah ka Ìh khoe yõc bàu wì mangai pajàu
hadròeh qnhòng calah nèh,

⁷¹ Ìh dèch nhèn khoe ka mangai tablêq, khoe ka
nòe tì kǝng wì ma tagit ka nhèn;

⁷² Ìh paqnoh kan loq waq am ka kan cadraq
nhèn, rai hmàng bàu tajap hadròeh cla Ìh,

⁷³ Tìah ka Ìh ma khoe hapah ka Apraham kan
cadraq nhèn,

⁷⁴ Ìh khoe tèu bàu dèch nhèn claih enh tì kǝng
mangai tagit ka nhèn,

Ìh am ka nhèn sôq ramot malem, tì ngèa Ìh.

⁷⁵ Đòeq yõc kan hadròeh, kan taq atoq hu patìh
ka Ìh, dìq ka qnhòng cla ùh hòq qmòe cleq.

⁷⁶ Kon oq! kô èh wì creo kon aih pajàu da Yiang
Haqnèq;

Kô èh kon lam enh ngèa ka Chuaq, padon trong
ka haq,

⁷⁷ Dôq ka mangai da haq ajang nòe yiniq lui wì
haq jah caqnaih aih hu canau loq kan dèch am
dech.

⁷⁸ Majah qmang aih Boc Plình nhèn tamèt ta
manoh,

Mat mahì enh qnhèq jah sreo qngah ka nhèn,

⁷⁹ Đòeq sreo ka mangai hangui tanòe clam cluiq
xam mangai hangui ta yàp qmù kan kachìt,
Rai qnung jènh nhèn lam ta trong catèm.

⁸⁰ Kon qyoh aih yòng kàn, mahua yiang tadêh, rìh oe tanòe hawit trùh hì paqnoh rađeh ka mangai Isorali.

2

Huang Chuaq Jesus

¹ Jò aih Auguto, bùa kàn qnoh bàu thê òq ka Lamah, aih taneh diac kàn òq jaq, ep ti rên ngan hlài mangai ta aih jah toq leq.

² Aih yàng baxèm wì ti rên ngan hlài, wop qnhòng da Quiniri-u broq cla craq bài cwan tagùng Siri.

³ Mangai hlài ðeh hra ta gùng cla ðòeq achìh qmùt ðeh yiniq.

⁴ Jòsep aih caxi noe Đawit, haq hanoh lam enh Naxaret, gùng Galili, loh ta gùng Judê trùh ta Bêtle-hem.

⁵ Hu achìh qmùt ðeh yiniq rađeh xam yiniq Mari, mangai khoe òq bàu yǒc haq, qnang oe jiang.

⁶ Jò wa qnang oe ta aih, khoe trùh hì Mari ha-uang.

⁷ Haq ha-uang kon calô ramua, yǒc mù taqmàn ðeh kon, ta qngùi ta atong nhat, majah qmang aih ta hnim padài khoe òq ka nòe.

⁸ Hadai gùng aih, i bài mangai ban trùu oe tagùng, rìu qngah ka mang ðòeq wèq ðeh trùu.

⁹ Moeq bình plình da Chuaq trùh ten ka wì, kan ranhòm Chuaq qngah qngiang dudan wì haq, wì crè pi cajaq

¹⁰ Bình plình doe: Ûh yùq cleq! Hacô au bahìa ka pì moeq Bàu lem, aih raq kan lem bùi am dìq ka mangai oe ta crõng taneh;

¹¹ Hì cô ta plài Đawit khoe ha-uang ka pì moeq Ngai dèch mangai, aih Christ, aih Chuaq pì.

¹² Kô oq kan hadro dôq pì hu canau ka Haq, pì hnoq moeq ngai kon qyoh taqmàn xi mù, kùì ta atong nhat.

¹³ Tajòe qmòe jò aih, raya rayùc lình plình xam bình plình aih calêu manè apôi Boc Plình rameh:

¹⁴ Qngah yiniq Boc Plình oe taplình haqnhèq, Catèm tanòe haqneq am ka bài mangai haq loq waq!

¹⁵ Jò wì bình plình khoe talah ka wì haq hu wìh hlài ta plình, bài mangai ban trìu doe ka dabau: Beq bèn lam ta Bêtlehem hu ngan yiniq neo loh kô, Chuaq ma khoe doe ka bèn loq.

¹⁶ Qmang aih wì haq drah lam ka nhet, hnoq Mari xam Jôsep xam kon qyoh qnang kùì ta atong nhat.

¹⁷ Jò khoe hnoq wì anoe hlài bàu bình plình anoe trùh kon qyoh, wì haq ma khoe jah tàng.

¹⁸ Dìq ka mangai tamàng hamàih ðeh hra ka bàu bài mangai ban trìu anoe ka wì haq.

¹⁹ Mahaq Mari wê dìq dõng bài bàu aih rai hèm yôt dèh ta manoh.

²⁰ Bài mangai ban trìu tawìh hlài, rai broq qngah yiniq rai manè apôi Boc Plình trong wì haq khoe tàng xam yiniq wì haq khoe hnoq joq tìah ka bàu ma khoe anoe ka wì haq.

²¹ Trùh rahem hì, aih hì ep broq ramènh kat akia ka kon qyoh, wì yiniq ka haq Jesus, aih

yiniq bình plình ma khoe yiniq adroe qmòe
ka jò hadrăp.

Dèch Jesus ka Boc Plình

²² Khoe dìq ka hì basròeh, tiaq ranenh Moise,
Jôsep xam Mari atóc kon qyoh ta Jêrusalem ðòeq
dèch ka Boc Plình,

²³ qmang ka khoe achìh ta hset ranenh haq:
“Rìm ngai kon calô ramua, ep dèch ka Chuaq”,

²⁴ dèch tam baiq toq trù braih ùh meh baiq toq
kon trù qyoh, qmang ka ranenh Chuaq khoe thê.

Simêon calêu manè, Anne mangai pajàu cadri

²⁵ Jò aih, ta Jêrusalem i moeq ngai rìh lem rìh taq
atoq, yiniq haq aih Simêon, haq aih toq gòm kan
alòng trùh ka Isorali, Yiang Hadròeh oe ti haq.

²⁶ Yiang Hadròeh khoe anoe ka haq loq haq ùh
cachìt adroe ka jah hnoq Christ da Boc plình.

²⁷ Qmang aih, haq tiaq Yiang Hadròeh qnung,
haq mùt ta hnìmh kùh waiq wop troq jò wa miq
baq aràng Chuaq Jesus ta aih, hu pagêh ka haq
rìm trong ramnenh khoe thê.

²⁸ Haq aih hi caqmìn kon qyoh aih, haq manè
apôi Boc Plình rameh:

²⁹ Waiq Chuaq! Manòeq kô Ìh am au jah cachìt ka
catèm tiaq troeq bàu Ìh;

³⁰ Majah qmang aih mat au khoe hnoq kan dèch
kon mangai trùh enh nòe Ìh,

³¹ Ìh ma khoe palauq qmòe dèh, ðòeq broq kan
qngah enh ngèa rìm diac,

³² kan qngah sreo jàp ka phù cròng, broq ka
Isorali Ìh jah kan ranhòm.

³³ Wa miq baq kon qyoh aih diq jaq hamàih ka bàu wì anoe trùh dèh kon.

³⁴ Simêon waiq xôq ramot am ka wa òng mai, haq doe ka Mari miq kon qyoh aih rameh: I bàu khoe tèu ðòeq am ka Kon qyoh kô, haq broq nen ka bàc ngai Isorali tacro, èh hadai broq ka bàc ngai jah yòng, khoe tèu ðòeq dôq haq wìa teo ka bàc ngai tarahen;

³⁵ da ìh hòim, i moeq pla chang pàc hlùh ta cliac ìh. Aih èh bàc yiniq oe ta manoh bàc ngai jah paqnoh.

³⁶ Èh hòim i mangai pajàu cadri, yiniq haq Anne, kon da Phanu-ên, caxi noe Ase, joq khoe bàc hanam. Enh jò haq oe raq adrùh sriu, atiq ka aih haq oe dèh ti òng jah tapèh hanam,

³⁷ khoe aih haq hi hadrô. Jò aih haq khoe jah rahem jàt pôn hanam, oe toq ta hnim kùh waiq, dahì damang patìh ka Boc Plình, apàm ka acaq rai waiq khàn.

³⁸ Hanoh jò aih diq, haq trùh ta aih, manè apôi Boc Plình rai anoe trùh kon qyoh ka bài mangai qnang tangèh gòm Jêrusalem jah dèch paclaih.

³⁹ Jò Jôsep xam Mari khoe broq gèh ka trong ranenh Boc Plình thê, wa haq tawìh hlài ta Galili, trùh dèh ta Naxaret plài cla.

⁴⁰ Kon qyoh aih yòng kàn, rai tadêh, jah bình kan rabiaq, xôq ramot Boc Plình oe ti Haq.

Jò Jesus jah moeq jàt baiq hanam

⁴¹ Rìm hanam wa miq baq Haq tồc ta Jersalem, ðòeq lam tagop ta hì ramènh Pancwa.

⁴² Jò khoe jah moeq jàt baiq hanam haq lam tiaq dèh wa miq baq tồc ta aih hu hadai tagop ta hì

ramènh qmang ka xan hmaq broq.

⁴³ Khoe dìq ka hì ramènh, wì haq wìh hlài dèh tagùng, Chuaq Jesus oe hlài ta aih mahaq miq baq haq ùh qnì.

⁴⁴ Hèm dèh haq lam ti bài bua ta aih, khoe moeq hì lam trong aih men ti bòch wì oh daq xam bài mangai canau;

⁴⁵ jò chaq haq khoe pi hnoq, wa wìh hlài ta Jerusalem òòeq chaq.

⁴⁶ Piq hì wa men hnoq haq tanòe hnìmh Kùh waiq, qnang hangui taqne bài mangai hnài, rai tamàng rai bòch hlài wì aih.

⁴⁷ Rìmh ngai tàng bàu rai hnoq kan rabiaq haq wì dìq loh ka hamàih jò haq bòch wì.

⁴⁸ Jò hì hnoq haq, wa miq baq dìq jaq hamàih. Miq haq doe: A kon! Hagleq ma jah haño ka ma qmàng kô, ma khoe lèt oe i jaq cleq?

⁴⁹ Haq bòch: “Aih chôp chaq dèh ka au? Chôp ma ùh loq au ep oe patìh dèh ta hnìmh Baq qmòh?”

⁵⁰ Mahaq wa aih ùh tem bàu haq anoe ka rađeh cleq.

⁵¹ Khoe aih haq hlài ta Naxaret ti wa miq baq rai iu broq tiaq bàu wa, mahaq bàu da haq miq haq wê dõng ta manoh.

⁵² Chuaq Jesus rai èh rai rabiaq tam, chac rai èh rai kàn, kiàng èh kiàng lem manoh Boc plình xam kon mangai.

3

Jon Baptist

¹ Hanam moeq jàt padam qnhòng Tibêro broq bùa kàn, jò aih Bônso-philat broq cla craq bài cwan

ta gùng Judê, Herôt broq bùa qyoh ta gùng Galili, Philip oh haq broq bùa qyoh ta gùng Yturê xam tracôni, Lysa-nia broq bùa qyoh ta gùng Abilen,

² Anne xam Caiphe broq pajàu kàn, aih i bàu Boc Plình thê Jon kon Xacahri tanòe gùng hawit.

³ Jon ti lam dudan jàp ka rìm gùng cròng diac Jôđan, hnài wì broq ramènh ãptem da kan loq raxach cađac trong dù ãđeq hu jah caqnaih yiniq lui,

⁴ tiàh ka bàu khoe achìh ta hset pajàu Êsai:
I bàu creò tanòe hawit:
Drah palauq trong ka Chuaq, pajang trong da haq.

⁵ Nòe jrùq tàc ãđq haq bình,
Roc bui wang, roc nòe haqnèq qnoh ãđq haq haqneq;

Trong tawech pajang ãđq haq hnhoq,
Trong qnèq qneq broq ãđq haq tamang.

⁶ Dìq ãđng kon mangai jah hnoq kan ãdech enh Boc Plình.

⁷ Jon anoe ka mangai bàc qnang trùh ta aih ãđeq jah broq ãptem: Nang noe bìh tau, cabô ma hnài pì loq wìa ka kan nòeh hì atìq?

⁸ Qmat èh, drah wìa malem ãđq ùh qngwan ka pì khoe loq raxach, ùh dùh doe Apraham aih kan cãdraq nhèn, majah qmang aih au doe ka pì Boc Plình broq ãbài hmo kô loh nang noe ka Apraham jah.

⁹ Chòng khoe roh qmòe ajang xem long, waq toq long leq ùh loh pì lem, long aih èh koh ãđeq hu bùh cađac.

¹⁰ Wì bòch Jon: Aih èh nhèn ep broq qmang leq?

¹¹ Haq padreo bàu: Cabô i baiq blah eo, yôc moeq blah am ka mangai chac dech, dahwèq acaq hadai qmang aih.

¹² I bàc ngai yôc thèq trùh hu broq ãptem, wì aih bòch: Ha nhèn ep broq cleq?

¹³ Haq doe ka wì: Apa q yôc yeo bàc ka maneh khoe pajaq.

¹⁴ Bài mangai linh hanoh bòch: Ha nhèn kô hò m ep broq cleq? Haq doe: apa q taca q ka cabô, apa q qnùt cabô, jèn baha pì pang leq, pì waq dèh pang aih.

¹⁵ Majah qmang aih wì qnang tagòm ngèh, wì hèm dèh ta manoh ahia q Jon kô ra q Christ,

¹⁶ aih i q Jon majah doe ka wì: Au broq ka pì ãptem xi diac maha q Mangai trùh atìq ka au cwàng yeo haqnèh ka au, au mech qnhòq wìa broq ãh magai doeh da haq caxi jep. Haq aih èh ma broq ka pì ãptem xi Yiang Hadròeh xi ùnh.

¹⁷ Tì Haq wê cađap hu dè dèh qmau ta haneh ka hreo, lènh qmau haq tah ta hapom, manùh haq bùh ta ùnh ùh jò leq pat.

¹⁸ Jò Jon anoe Bàu lem, haq hadai hnài wì bàc trong qnoeq,

¹⁹ Maha q Hêrôt bùa qyoh, Jon khoe i tapoch ùh lòh haq yôc Hêrođia mai oh haq, hloe xam ãi trong dù bùa ma broq,

²⁰ haq broq tam moeq yiniq dù hò m, aih haq rùp clèh Jon ta hnim tù.

Broq ãptem ka Jesus

²¹ Jò ãi q ka mangai ta aih khoe jah broq ãptem, Chua q Jesus hanoh jah broq ãptem, plình tapèh qmòe jò haq qnang wai q khăn,

22 Yiang Hadròeh yǒc chac trù loh jràp ta chac haq, tajòe qmòe jò aih i bàu enh plình doe: “Ìh kô kon au, mangai au loq waq deh, kon lem ka manoh au rìm trong.”

Caxi noe Jesus Christ

23 Jò Chuaq Jesus baxèm broq dèh trong haq broq, jò aih haq bu jah qnah ta piq jàt hanam. Tiaq manoh wì hèm haq aih kon Jòsep, Jòsep kon Hêli,

24 Hêli kon Matat, Matat kon Lêwi, Lêwi kon Mên chi, Mên chi kon Jane, Jane kon Jòsep

25 Jòsep kon Mata-thia, Mata-thia kon Amôt, Amôt kon Nahum, Nahum kon Êt-li, Êt-li kon Na-gê,

26 Na gê kon Ma at, Ma at kon Mata-lia, Mata-lia kon Sê-me-in, Sê-me-in kon Jô-et, Jô-et kon Jô-đa,

27 Jô-đa kon Jô-anan, Jô-anan kon Rêsa, Rêsa kon Xôro-baben, Xôro-baben kon Sala-thien, Sala-thien kon Nêri,

28 Nêri kon Mênchi, Mênchi kon A đi, A đi kon Kôsam, Kôsam kon Ên-mađan, Ên-mađan kon Ero,

29 Ero kon Jêsu, Jêsu kon Êli-ese, Êli-ese kon Jôrim, Jôrim kon Ma-that, Ma-that kon Lêvi,

30 Lêvi kon Si-mê-on, Si-mê-on kon Juda, Juda kon Jòsep, Jòsep kon Jônám, Jônám kon Êli-akim, Êli-akim Mê-lea,

31 Mê-lea kon Mêna, Mêna kon Mata-tha, Mata-tha kon Nathan, Nathan kon Đawit,

32 Đawit kon Jêse, Jêse kon Jôbet, Jôbet kon Bo-ô, Bo-ô kon sala, Sala kon Nach-son, Nach-son kon Ami-na-đáp,

³³ Ami-na-đap kon Amin, Amin kon Arôni, Arôni kon Et-rôm, Et-rôm kon Pharê, Pharê kon Juda,

³⁴ Juda kon Jacôp, Jacôp kon Ysac, Ysac kon Apraham, apraham kon Tharê, Tharê kon Nacô,

³⁵ Nacô kon Sêruc, Sêruc kon Ragao, Ragao kon Phalet, Phalet kon Hêbe, Hêbe kon Sala,

³⁶ Sala kon Canam, Canam kon Abasac, Abasac Sem, Sem kon Noê, Noê kon Lêmec,

³⁷ Lamec kon Mêtu-sela. Mêtu-sela kon Hênoc, Hênoc kon Jaret, Jaret kon Mêle-le-en, Mêle-le-en kon Cainam,

³⁸ Cainam kon Enot, Enot kon Sêl, Sêl kon Adam, Adam kon Boc plînh.

4

Kan padô aluàn

¹ Chuaq Jesus bình Yiang Hadròeh, hlài enh cròng diac Jodan, Yiang Hadròeh aràng haq mùt tagùng hawit.

² Ta aih kiac padô aluàn haq pôn jàt hì, Ta bài hì aih haq ùh lòm acaq qmòe cleq, dìq dèh ka jò haq loh qmòe ka hrah.

³ Kan kiac doe ka haq: Tàng joq ìh kon Boc Plînh, thê hmo kô wia bênh beq.

⁴ Chuaq Jesus padreo bàu: “Khoe i bàu achìh, kon mangai rìh ma xài canòm toq ka bênh.”

⁵ Kiác atóc haq tanòe haqnhèq, qmoeq rahyàc raq haq khoe patô ka Chuaq Jesus dìq dǝng ka bài diac ta crǝng taneh;

⁶ haq doe ka Chuaq Jesus: dìq dǝng ka cwìang xam ka ranhòm taqmat, khoe am dǝng ka au, au enh am ka cabô leq am.

⁷ Tàng ìh kùh waiq au, aih hì jah ìh.

⁸ Chuaq Jesus pareo bàu: “I bàu achìh rameh: ìh ep kùh waiq Boc plình ìh rai patìh toq ka haq rag”

⁹ Kiác aràng haq trùh ta Jérusalem rai dèch atóc haq oe tanòe òi q jaq haqnèh ta bui hnim kùh waiq, haq doe: Tàng joq ìh kon Boc plình, hadrúc beq,

¹⁰ majah qmang aih khoe i bàu achìh:
Haq thê dèh bình plình wèq ìh,

¹¹ Wì aih dèch ìh tócc taxōng wì haq,
aih èh dòq jènh ìh ùh hìaq catoeh ka hmo.

¹² Chuaq Jesus padreo bàu: “I bàu khoe achìh:
Ùh khòh qnhro Chuaq aih Boc Plình ìh”.

¹³ Kan kiác òi q ka trong òòeq hu padô Chuaq Jesus, haq hi wia òò hòeq.

Hlài ta Naxaret

¹⁴ Chuaq Jesus jah bình cwìang atai enh Yiang
Hadròeh, haq wìh hlài ta Galili, jàp gùng
dudan aih khoe hìà tàng yiniq haq.

¹⁵ Haq hnài tanòe hnim tagop qyoh, mangai
mannè òeh hra.

¹⁶ Haq trùh ta Naxaret, nòe haq yòng kàn. Tìah
dèh Haq hmaq broq, trùh hì Sabat haq mùt hnim
tagop qyoh, èh hi yòng òcc.

¹⁷ Wì am ka haq hset pajàu Êsai, haq pèh jang nòe
khoe achìh:

¹⁸ Yiang Boc Plình oe ti au;
Majah qmang aih haq khoe xùt dầu ka au, òòeq
hu anoe Bàu lem ka mangai pa;

¹⁹ Haq khoe thê au trùh paclaih mangai oe ta
hnim tù jah loh enh gùng,
Mangai ùh xau jah hnoq,
Mangai wì tacaq ka haq jah claih;

Rai bahia hanam catem da Chuaq.

20 Khoe aih haq don hlai hset padreo am da ka mangai patih ta aih khoe eh haq hi hangui. Rim ngai ta hnim tagop qyoh aih diq haqmiang ngan haq.

21 Haq doe ka wi: Bàu hset hadròeh pì ma tamàng aih, hì kô khoe xit.

22 Dìq ka mangai ta aih maleq ma meh dìq anoe trùh haq, wì hamàih ka bàu rabiaq loh enh haq, wì doe: Haq qmat ajoq kon Jôsep?

23 Haq doe ka wi: “Canau pì yôc bàu cachôi qmang kô hu anoe ka au: Mangai broq jreo, haqnauq dèh cla òeq, aleq bài yiniq ìh broq ta Cabênaum nhèn ma khoe tàng, broq nòe gùng cla kô beq.”

24 Haq doe ka wi: “Joq au doe ka pì, qnhòq lah i mangai pajàu leq jah gùng cla manè.

25 Au anoe qnàng ka pì, qnhòng Êli, jò tróc pađang piq hanam qne, diq dồng ka gùng loh ka pangot hrah, tanòe mangai Isorali i bàc mangai hadrô;

26 yac ka qmang aih, aleq i thê Êli trùh hnim cabô taqne bài aih, mahaq thê haq lam ta hnim mangai cadri hadrô oe ta Sarepta gùng Sidôn.

27 Qnhòng da pajàu Êlisê mangai Isorali loh ka bacùn ma i palap cleq, mahaq ma i mangai leq jah brêh, enh gùng ka Na-aman, mangai Siri.

28 Maleq ma meh oe ta hnim tagop qyoh tàng bàu aih, wì nòeh pì ka jaq cleq.

29 Wì padinh yòng, hua qnoh haq loh enh gùng ka plài, qnung haq tọc ta bui wang nòe wì broq plài òeq hu caqnhùt qnìh đac haq.

30 Yàng haq pagat ti ngèa wì èh hi lam taqnoeq.

Broq brêh ka mangai kiac mùt ta chac

31 Haq loh ta Cabênaum, oe ta gùng Gallili, hnài ta hì Sabat.

32 Rìm ngai tamèt ta manoh jò tàng bàu haq hnài, majah qmang aih bàu haq i ang.

33 Tanòe hnìm kùh waiq i moeq ngai ta dalam chac haq i kiac mùt, breo cadêh: Jesus mangai Naxaret,

34 Ìh enh broq ka nhèn cleq kô ìq? Ìh trùh hu raliang cadac nhèn qmòh? Ìh qmat cabô, au loq: Mangai Hadròeh da Boc plình!

35 Mahaq Chuaq Jesus capoch nhang ka haq aih: “Oe ma hatinh haq! Drah loh enh mangai qmat”. Hloe jò aih, taqne mangai bàc kiac rapòt mangai aih ta haqneq, èh hi loh, ùh hìaq broq ka haq aih loh habau.

36 Mangai leq mangai meh haglènh đeh hra, wì ta anoe ka dabau: Bải bàu kô qmang leq ìq! Haq yóc cwìang yóc kan dèh enh leq ma drùh qnoh kiac, kiac ma loh hloe qmang meh.

37 Dìq dǒng gùng dudan ta aih wì loq đeh hra ka Haq.

Miq mai Phiero

38 Chuaq Jesus loh enh hnìm tagop qyoh, haq lam ta hnìm Simôn. Miq mai Simôn qnang tôq tanget hlàc raya. Wì canòm ka Chuaq Jesus broq brêh ka haq.

39 Chuaq Jesus cachình chac ta mangai aih, haq tapoch ka kan tanget, kan tanget hi dìq. Mangai aih hi padinh yòng patìh.

⁴⁰ Jò mat mahì clih, mangai yinìq qmang leq, mangai ùh hróc qmang leq wì aràng trùh òq ta haq, haq yóc tì bèq tang ngai hu broq brêh ka wì.

⁴¹ Bàc kiac cadâu loh enh bàc ngai rai cajiah: Ìh qmat kon Boc Plình. Mahaq Chuaq Jesus lech ùh am wì haq tapoch, majah qmang aih kiac loq ka haq aih raq Christ.

⁴² Buqngah, Chuaq Jesus loh lam tanoè hawit. Bàc mangai lam ti chaq haq. Jò hnoq haq, wì padràng haq oe, wì ùh enh dōq haq lam taqnoeq.

⁴³ Mahaq haq doe ka wì: “Au ep lam anoe Bàu lem da Boc Plình ka wì ta qnoeq hòh, aih raq majah khoe thê au trùh.”

⁴⁴ Haq ti hnài roc hnìh tagop qyoh da mangai Juda.

5

Jesus creò ka magai tiaq hōc ma adroe

¹ I mòeq hì, jò Chuaq Jesus yòng ti haqmai hlōng Gêne-saret, bài mangai bàc raya oe dudan dahnen dabau hu tamàng bàu Boc Plình.

² Haq hnoq i baiq toq boang oe ti haqmai diac, cla mangai ranang khoe loh qnheo hlàm ta diac.

³ Baiq toq boang aih haq hì tōc ta mòeq toq, aih boang da Simôn, thê haq qnoh tadrùq toq bìa, èh haq hangui ta boang òeq hu hnài wì.

⁴ Jò khoe hêq ka hnài haq thê Simôn: “Chùng boang qnoh tanòe diac jrùq tau òeq caqnìh hlàm hu rùp ka.”

⁵ Simôn padreo bàu: Mangai hnài, nhèn broq khoe lep qngah mòeq mang ìq, ùh lòm jah qmòe cleq. Mahaq ìh khoe doe qmang aih, òq nhèn tang hlàm.

⁶ Wì caqnìh hlàm ta diac jah ka pi cajaan, hlàm wì haq ten tapot,

⁷ aih wì haq hi gwàih tì dèh ka bua oe ta boang qnoeq trùh, òòeq wiang tì wì haq, ka bình baiq toq boang, boang loh qmòe ka enh cram.

⁸ Jò Simôn hnoq qmang aih, haq hacùn cràng enh ngèa ka Chuaq Jesus: Chuaq au! Ìh wia hangai ka au beq, au kô mangai bình toq yiniq lui.

⁹ Majah qmang aih haq xam bài dèh bua oe ti haq, hnoq jah hrìn ka, maleq mameh loh ka crè dồng.

¹⁰ Chuaq Jesus doe ka Simôn: “Apaq yùq cleq, pang kô ta èh, ìh jah wia mangai tang hlàm mangai”.

¹¹ Khoe ka atóc boang tago, wì hi cađac òìq dồng òòeq hu tiaq haq.

Jesus broq brêh ka mangai bacùn

¹² Jò Chuaq Jesus qnang oe tanòe plài tau, i moeq ngai bacùn òìq tachac, trùh bla op dèh hadrò taqneq rai dang: Waiq Chuaq, tàng ìh ma waq broq, ìh broq au brêh.

¹³ Chuaq Jesus hnhu tì bèq haq aih, rai doe: “Au enh, brêh beq!” Tajòe hloe jò aih kan bacùn hi brêh.

¹⁴ Chuaq Jesus tanap ka haq: “Paq anoe ka cabô loq, mahaq ìh khoe brêh qmat ðrah lam patô rađeh ka bài pajau, rai dèch ramènh tiaq bàu Môise khoe thể, òòeq patô ka wì hnoq.”

¹⁵ Yiniq Chuaq Jesus chàc rai èh rai hangai, bàc mangai trùh hu tamàng, rai òòeq haq broq ka wì jah brêh ka yiniq.

¹⁶ Mahaq Chuaq Jesus xan lam tanòe hawit òòeq hu waiq khàn.

Broq brêh ka mangai pen

17 I mòi eq hì, Chuaq Jesus qnang hnài, i biaq ngai Pharisi xam bài mangai hnài ranenh trùh hangui ta aih, wì haq loh enh bài plài tagùng Galili, gùng Judê xam Jêrusalem. Cwìang itai Boc Plinh oe ti Chuaq Jesus broq brêh ka mangai yiniq.

18 Jò aih, i wì tòng aràng mòi eq ngai pen kùì ta dradrah, chaq trong òòi eq qmùt haq enh ngèa Chuaq Jesus.

19 Mahaq taiq mangai bàc hrình, pì qnì qmùt qmòi trong leq, dài wì majah àu atóc haq aih ta crông hnim, doeh kùa po, qnhùa qnoh haq aih oe ta dradrah taqne wì mangai bàc ta aih, tajang hloe ka ngèa Chuaq Jesus.

20 Chuaq Jesus hnoq manoh lùì wì aih, haq doe ka mangai pen: “Yôiq kon, yiniq lui kon khoe jah caqnaih.”

21 Bài mangai hnài ranenh xam mangai Pharisi hèm dèh ta manoh: Cleq meh iq cabô, mangai tapoch ùh hòq, enh gùng ka Boc Plinh oe i cabô majah baclaih yiniq lui?

22 Chuaq Jesus loq ka manoh wì hèm cleq, haq bòch “Hagleq pì majah hèm qmang aih ta manoh?”

23 Manòeq kô doe: Yiniq lui ìh khoe jah caqnaih, tàng ùh meh doe yòng lam beq, aih maleq ma yì hlàu ka capoch?

24 Mahaq au dòq pì loq Kon Mangai oe ta crông taneh i cwìang caqnaih yiniq lui.” Haq doe ka mangai pen “Au thê ìh, yòng, dèch dra drah qmat hlài ta hnim beq.”

25 Mangai pen padinh yòng enh ngèa ka wì hloe

jò aih raq, binh dèh dradrah haq ma kùì hlài ta hnim, rai manè apôi Boc Plình.

²⁶ Rìm ngai tadèch qmòe nòeh rai manè Boc Plình rai crè tarìt wì doe: Hì kô joq bèn khoe hnoq trong joq dìq jaq halac!

Jesus creò ka Lêwì,

Acaq moeq qmang ti mangai i yiniq lui

²⁷ Atìq ka aih, Chuaq Jesus loh enh gùng, hnoq moeq ngai, broq mangai yǒc thèq, yiniq haq Lêwì, qnang haqngui tanòe hnim yǒc thèq. Haq creò ka mangai aih: “Lam tiaq au.”

²⁸ Lêwì cađac dìq đōng, padinh yòng tiaq Chuaq Jesus.

²⁹ Lêwì broq yiniang kàn ta hnim rađeh padon ka Chuaq Jesus, i bằc ngai yǒc thèq xam bài mangai qnoeq haqngui acaq pajùm.

³⁰ Bài mangai Pharisi xam mangai hnài ranenh mamùc ka mangai tiaq hỏc Chuaq Jesus: Hagleq pì ma acaq pajùm ti mangai yǒc thèq xam mangai i yiniq lui?

³¹ Chuaq Jesus doe ka wì: “Mangai tadêh ma i nhet ka chaq mangai broq jreo, mangai ùh hrỏc ma nhet.”

³² Au ùh xài trùh đòeq creò ka mangai taq atoq, mahaq creò ka mangai i yiniq lui.

³³ Wì anoe ka haq: Mangai tiaq hỏc da Jon xan apàm ka acaq đòeq waiq khàn, èh mangai tiaq hỏc da mangai Pharisi hadai, ùh xài qmang ka mangai tiaq hỏc da ìh toq acaq toq ôq.

³⁴ Haq padreo bàu: “Jò cla kon ǒng oe raq dèh ti bua, trùh lem bùi hì yiniang haq, wìa ka pì ma thê wì apàm ka acaq?”

³⁵ Mahaq trùh hì wì ma qnung kon ǒng lam hangai ka wì, bài hì aih èh wì men apàm ka acaq.”

³⁶ Haq aliah ka wì qmang kô: “Ừ i cabô hit mòeq calep eo neo ðòeq clep ka eo dùnh. Tàng broq qmang aih, eo neo loh ka hyah, èh haqnech maneo hadai ùh tajì ka eo dùnh.

³⁷ Hadai ùh i cabô ùc alac neo ta ðau akia dùnh, broq qmang aih, alac neo broq ka ðau akia dùnh hadah, alac taùc, ðau akia hadai pì wìa waq.

³⁸ Alac neo ep ùc ta ðau akia neo.

³⁹ Hanoh ùh i mangai leq khoe ôq alac dùnh èh bòch alac neo, majah qmang aih haq doe: alac dùnh yeo jiang”.

6

Prot hadròc qmau

¹ I mœq yàng, wop hì sabat Chuaq Jesus lam pagat trong ruàng qmau, mangai tiaq hõc git hadròc qmau rai tuta hu kaq.

² Bài mangai Pharisi bòch: Hagleq pì majah broq trong ùh troq ta hì Sabat?

³ Chuaq Jesus doe ka wì: “Pì ma qnhòq đõc Đawit broq cleq jò haq xam mangai tiaq haq hadai pangot qmòh?

⁴ Haq mùt ta hnim Boc Plình, yõc bênh ta aih qnoh acaq rai am dèh ka bua, bênh aih toq pajàu ma khòh acaq.

⁵ Haq doe hòm: Kon Mangai aih Chuaq hì Sabat”.

Mangai angwenh ti

6 Hì sabat qnoeq hòmh, Chuaq Jesus mùt hnài ta hnìmh tagop qyoh. Ta aih i moeq ngai angwenh tì pah qma.

7 Bòi mangai hnài ranenh xam mangai Pharisi qnang tì chaq yiniq òòeq rùp Chuaq Jesus, wì tì ngan ta hì sabat haq i broq brêh ùh.

8 Mahaq Chuaq Jesus loq ka wì aih qnang hêm trong leq, haq doe ka mangai angwenh tì: “Yòng beq, yòng oe taqne kô.” Mangai aih hì yòng oe taqne wì ta aih.

9 Aih èh Chuaq Jesus hì doe: “Au bòch pì: Maleq ranenh ma am broq tahì sabat, khòh broq trong lem loq broq trong qmèq? jêh đac mangai loq dèch mangai?”

10 Haq tì ngan dudan òi q ka wì ta aih, khoe èh haq doe ka mangai angwenh tì: “Bahnhoh tì ìh qmat.” Mangai aih broq tiaq qmang bàu, tì haq hì jah brêh.

11 Mahaq mangai Pharisi xam mangai hnài ranenh wì nòeh pì cajaq, wì bòch dabau broq qmang leq ka Jesus kô èh.

Jesus ròeh moeq Jàt baiq ngai Tiaq cla

12 Oe ta bòi hì aih Chuaq Jesus tồc ta wang waiq khàn, haq rìu qngah ka mang aih òòeq waiq khàn ka Boc Plình

13 Trùh qngah sroq èh, haq creò dèh mangai tiaq hỏc, haq ràih moeq jàt baiq ngai, òòeq broq mangai Tiaq cla:

14 Haq yiniq ka Simôn aih Phiero, Anrê oh Simôn, Jaco xam Jon, Philip xam Bathê-lemi,

15 Mathio xam Thôma, Jaco kon Aphê, Simôn wì ma creò Xêlot,

16 Jude kon Jaco, xam Juda Ica-riôt, mangai ma blòq Chuaq Jesus atiq kô èh.

Sôq ramot xam kan nanxa

17 Khoe aih, Chuaq Jesus xam mangai tiaq hõc loh enh wang, wì oe tanòe tamang, ta aih i bàc ngai tiaq hõc xam bàc ngai trùh enh gùng Judê, Jérusalem, xam trong diac Tiro, Sidôn, trùh tamàng bàu haq hnài rai dõq haq broq wì jah brêh kan yiniq tôq.

18 Bài mangai kiac mùt ta chac hadai jah brêh dõng.

19 Dìq dõng ka mangai bàc ta aih ti àu bèq haq, majah qmang aih i kan itai loh enh chac haq, broq ka bàc ngai jah brêh.

20 Chuaq Jesus ngan dèh mangai tiaq hõc, rai doe: “Xôq ramot am ka mangai pa, majah qmang aih diac Plinh aih da pì.

21 Xôq ramot am ka mangai qnang pangot, majah qmang aih pì jah panàc, Xôq ramot ka qnang crò hmoe, majah qmang aih pì jah do lem bùi!

22 Xôq ramot am ka pì, jò wì git ka pì, hnan qnoh pì, hnap hnuq ka pì, cađac yiniq pì tiàh kan amùà! Taiq pì tiaq au!

23 Hì aih, thê pì lem bùi, ti aplòh rai manè, majah qmang aih kan baha pì oe ta Plinh èh kàn haraya: Majah qmang aih, kan cadraq wì haq calah nèh hadai khoe tabroq ka bài mangai pajàu qmang aih diq.

24 Mahaq haõo ka pì mangai ma padrõng, majah qmang aih pì khoe jah qmòe dèh kan alòng!

25 Hăbô ka pì, mangai qnang panàc, majah qmang aih pì jah pangot! Hăbô ka pì mangai qnang lem bùi, majah qmang aih pì jah hmoe ta-
oeh ka kan cachit.

26 Hăbô ka pì mangai qnang jah bàc ngai tapoch manè, majaq qmang aih kan cadraq wì haq calah nèh hadai broq ka bài pajàu patiah qmang aih diq.

Loq waq ka mangai tagit

27 Mahaq au doe ka pì aih bài mangai qnang tamàng bàu au: Thê loq waq ka mangai tablêq ka pì, broq lem ka mangai git ka pì.

28 Waiq xôq ramot am ka mangai hanip pì, waiq khàn am ka mangai tapoch qmêq ka pì.

29 Cabô tep da pì tabôc pah kê, hnhu hloe ka wì haq tabôc pah tau, cabô hrùi q da pì eo enh gùng, dôq haq wì yôc hloe da pì eo enh dalam.

30 Tàng cabô bòch cleq, drah am, tàng i cabô blah yôc da pì cleq, apaq bòch yôc hlài.

31 Pì enh wì broq ka rađeh qmang leq, pì ep broq ka wì qmang aih.

32 Tàng pì loq waq toq mangai ma loq waq ka pì, aih ma ep pòq dòeh cleq? Mangai i yiniq lui hadai loq waq ka mangai loq waq ka haq.

33 Tàng pì toq hanò ka magari loq hanò ka pì, aih ma i pòq dòeh cleq? Mangai broq yiniq lui hadai qmang aih diq.

34 Tàng pì am đồ ka wì qnoeq cleq, mahaq toq ngèh ka wì am hlài, aih ma i pòq dòeh cleq? Mangai i yiniq lui hadai am ka mangai i yiniq lui ti lình, đồeq hu jah yôc hlài xam xêm xam goe.

35 Mahaq thê pì loq waq ka mangai tablêq ka pì, loq hanò ka wì, loq am ka wì, apaq ngèh ka

yöc hlài cleq enh wì. Aih èh kan baha ka pì kàn joq qnàng, aih pì jah broq kon da Mangai dìq Jaq haqnèq, majah qmang aih haq hanò ka mangai gôpla xam mangai broq dù.

³⁶ Thê pì loq waq tiah ka Baq pì aih Mangai ma xan loq waq.

³⁷ Apa q ti hadrah dèh cabô, èh pì ùh hìaq pòq kan hadrah, apa q taqmòq yiniq lui ka cabô, aih wì hadai ùh hìaq taqmòq yiniq lui ka pì. Thê cađac da wì qnoeq yiniq lui, aih wì hadai cađac da pì yiniq lui.

³⁸ Am beq, aih èh wì hadai am hlài ka pì, èh wì yöc cađap kàn, xàu dōq haq nhet, tōng qmòe ka bình, tah tam ta eo pì, majah qmang aih pì dèch ka wì maneh leq, wì hadai dèch hlài maneh aih.

³⁹ Haq hadai capoch aliah hu hnài wì rameh: “Mangai ùh xau qnung mangai ùh xau ajah? Ùh xài dìq baiq ka wa aih cìh ta ralùng qmòh?”

⁴⁰ Mangai tiaq hōc ùh yeo haqnèq ka mangai hnài, mahaq mangai tiaq hōc leq ma gēh geo, aih èh haq jah tiah dèh mangai hnài.

⁴¹ Gleq ìh hnoq ciah ta mat oh daq ìh, mahaq ùh hnoq long ban ta mat cla?

⁴² Ìh doe dèh ka oh daq: Aleq dōq au doeh ciah ta mat ìh, mahaq ùh hnoq dèh long ban ta mat cla! pì capoch dèh qmang leq majah? Wùih! Bại mangai patiah toq enh gùng meh! doeh long ban loh enh mat cla qmat adroe, aih èh men xau hnoq hu doeh ciah ta mat oh daq.

⁴³ Long loh pì qmèq aih ùh xài long lem, long loh pì lem aih ùh xài long qmèq

⁴⁴ majah qmang aih ngan plì ma canau ka long. Ùh i cabô git plì pöc ta yila, ùh i cabô git plì nho ta brech.

⁴⁵ Mangai ta manoh haq bình trong lem, hloh bầu rangot lem, mangai dù ta manoh bình trong dù, hloh bầu dù, majah qmang aih khoe bình ta manoh men hloh ajang bầu.

⁴⁶ Hagleq pì creô ka au: Chuaq, Chuaq, mahaq ùh dùh ka broq tiaq bầu au?

⁴⁷ Kô au patô ka pì loq mangai trùh ti au, tamàng bầu au, broq tiaq bầu au, aih êh haq tìah ka cabô.

⁴⁸ Haq aih tìah ka mangai broq hnem, chĩa jrang cajrùq, dèch hnem enh cröng hmo talech: Diac töt, diac dêh glàm ta hnim aih, mahaq ùh dalac, majah qmang aih broq khoe cajap.

⁴⁹ Yàng mangai leq tàng bầu au mahaq ùh broq tiaq, haq aih tìah ka mangai broq hnim ta taneh ùh i ka xem, diac dêh glàm ta hnim aih, moeq ayàc raq khoe ralàih, raliang dìq dōng.

7

Cwan oe ta Cabênaum

¹ Jò khoe hêq ka hnài bầu aih, Chuaq Jesus mùt ta Cabênaum.

² Cwan lình tagùng aih i moeq ngai hapōng haq dìq jaq loq waq, qnang ùh hröc ten cachit,

³ tàng wì anoe i Chuaq Jesus trùh, cwan thê wì gucraq mangai Juda lam canòm ka Chuaq Jesus broq brêh dèh ka hapōng.

⁴ Wì aih trùh ti Chuaq Jesus, wì doe: Cwan kô troq ka ìh dì bầu haq,

⁵ majah qmang aih haq loq waq ka mangai bèn, khoe broq am ka nhèn hnim tagop.

⁶ Chuaq Jesus lam ti wì aih. Jò ten trùh hnim, cwan aih the dèh bua lam anoe ka Chuaq Jesus: Waiq Chuaq! Ìh ùh dùh baxa hrìn raðeh, majah qmang aih au ùh tajì ka ðìh Ìh mùt dèh ta hnim.

⁷ Au hadai khoe hèm raðeh kô qnhòq tajì ka trùh ti ìh. Mahaq ìh tapoch toq bàu raq brì ka hapõng au brêh.

⁸ Majah qmang aih au kô hadai oe enh qneq ka cwiang wì qnoeq, au hanoh i lình enh qneq ka cwiang au ðiq, au doe ka mangai kô: Lam beq! haq aih hi lam, the mangai qnoeq: Trùh tacô! haq hi trùh, au the dèh hapõng: Broq yiniq kô! haq hi broq.

⁹ Jò Chuaq Jesus tàng bàu aih, hamàih dèh ta manoh, Haq hwi ngan bài mangai lam tiaq raðeh, haq doe: “Au doe ka pì, oe ta Isorali, au qnhòq lah hnoq mangai leq i kan lùì kàn dàng kô.”

¹⁰ Khoe aih, bài mangai cwan ma the wì lam aih, wìh hlài ta hnim, hnoq mangai hapõng khoe brêh.

¹¹ Hì atiq, Chuaq Jesus lam ta plài Na-in, mangai tiaq hõc xam bàc mangai lam tiaq haq.

¹² Jò haq bu trùh gàu plài, hnoq wì tòng qnoh moeq ngai cachit, aih kon calô gucadrì hadrô ta plài aih, haq i dèh moeq toq kon aih raq, bàc ngai ta plài aih wiang lam ti mangai hadrô aih.

¹³ Jò Chuaq Jesus hnoq, tamanoh haq ha-och ka mangai miq aih, haq doe: “Apaq hmoe.”

¹⁴ Khoe aih, Chuaq Jesus thia haten, haq bèq hom, bài mangai tòng hanang hi yòng. Haq hi doe: “Mangai radam meh, au the oh yòng beq.”

¹⁵ Mangai cachit padinh hangui rai tapoch tuàng, khoe aih Chuaq Jesus hi am da miq haq.

¹⁶ Mangai leq mangai meh crè ðeh hra, rai manè apôi Boc Plinh rameh: I moeq pajàu kàn khoe loh taqne bèn. Boc Plinh khoe trùh ðoeq wiang dèh ti mangai da Haq.

¹⁷ Bìac aih, wì anoe jàp cròng Judê xam gùng dudan ta aih.

¹⁸ Mangai tiaq hóc da Jon taqmon ðìq ðồng bài yiniq aih ka Jon.

¹⁹ Jon creo dèh wa baiq ngai ma tiaq hóc raðeh, thê wa lam trùh ta Chuaq Jesus hu bòch: Ìh ajoq mangai ðoeq trùh tacô, nhèn ahiaq ep gòm mangai qnoeq hòmh?

²⁰ Jò wa aih trùh ta Chuaq Jesus, wa doe: Jon Baptit thê ma trùh bòch: Ìh ajoq mangai ðoeq trùh tacô loq nhèn ep gòm mangai ma qnoeq?

²¹ Wop jò aih Chuaq Jesus broq brêh bàc ngai yiniq, ùh hróc, mangai i kiac dù mùt ta chac, rai broq bàc ngai ùh xau jah hnoq.

²² Chuaq Jesus padreo bàu ka wa: “Hlài anoe ka Jon loq rìm yiniq chôp khoe hnoq, khoe tàng: Mangai ùh xau jah hnoq, mangai liáp jah lam, mangai bacùn jah hreo, mangai cìc jah tàng, mangai cachit jah rìh hlài, mangai pa jah tamàng Bàu lem.

²³ Xôq ramot ka mangai leq ùh hiaq catoeh ka au.”

²⁴ Jò wa aih khoe lam, Chuaq Jesus hi anoe trùh Jon ðôq bài mangai bàc ma lam tiaq haq tàng: “Pì khoe lam ngan cleq taqnòe hawit? Pì lam ngan triang niaq cayeo ma hlui qmòh?

25 Ûh qmang ai pì lam ngan cleq hòmh? Ngan mangai caxùnh eo lem qmòh? Hatau wì ma caxùnh eo canaq, mangai oe acaq rahù dìq oe ta hnim bùa.

26 Mahaq pì lam ngan cleq hòmh? Mangai pajàu qmòh? Joq au anoe ka pì ùh hnau ka pajàu hòmh.

27 Kô raq mangai ma khoe i bàu achìh trùh haq:
Kô au thê dèh mangai wê bàu lam adroe ka Ìh,
Haq aih èh ma palauq da ìh trong enh ngèa ka Ìh.
28 Au anoe ka pì, dìq dǒng ka bàì mangai gucadrì
ma hauang qnoh, ùh i mangai leq yeo kàn
ùh hnau ka Jon, mahaq oe ta diac Boc Plình,
mangai yac ka qyoh dàng leq, dua haq yeo
kàn ùh hnau ka Jon.

29 Dìq dǒng ka bàì mangai ta aih hloe xam mangai
yǒc thèq khoe jah Jon broq baptem, wì tàng bàu
Chuaq Jesus hnài, mangai leq mangai meh dìq
doe Boc Plình aih taq atoq.

30 Mahaq mangai Pharisi xam mangai hnài ra-
nenh chàih cađac trong Boc Plình enh taqmroq
ka wì haq, majah qmang aih wì ùh waq Jon broq
baptem ka dađeh.

31 Chuaq Jesus doe: Au aliah wì qnhòng kô tiàh ka
cabô?

32 Wì haq tiàh ka wì qyoh hangui ta nòe atech,
doe ka dabau: Nhèn khoe hlui taliaq, gleq pì ma
ùh ti cađoeq, nhèn khoe ti calêu atoch gleq pì ùh
crò hmoe.

33 Jon khoe trùh, haq ùh acaq bēnh ùh ôq alac, aih
pì doe: I kiac dù oe ta chac haq.

34 Kon Mangai trùh, haq acaq haq ôq, aih pì doe:
Meh mangai plai toq ka acaq, daiq ka ôq, taqmùt
ti bàì mangai yǒc thèq xam bàì mangai i yiniq lui.

³⁵ Mahaq kan khun rabiaq aih jah creo ka haq taq atoq canòm ajang yiniq broq da wì haq.”

Mangai gucadrih ùh lem sùt dàu ka Jesus

³⁶ I moeq ngai Pharisi akhen ka Chuaq Jesus trùh acaq dèh ta hnim, jò khoe mùt ta hnim, Chuaq Jesus hi hangui.

³⁷ Tagùng aih, i moeq ngai gucadrih ùh wìa, hìa doe Chuaq Jesus qnang hangui acaq ta hnim mangai Pharisi, haq aràng moeq toq cabi ngóc tabóc enh dalam tah bình dàu xua thùm.

³⁸ Haq yòng ðeh enh rù ajang nòe jènh Chuaq Jesus, crò hmoe, diac mat taclih ta jènh Chuaq Jesus, khoe èh haq yóc dèh xác gàu hi xùt, èh haq híp jènh Chuaq Jesus, khoe aih haq xùt dàu ta jènh Chuaq Jesus.

³⁹ Mangai Pharisi ma akhen ka Chuaq Jesus, hnoq qmang aih, haq hèm dèh ta manoh: Mangai kô tàng haq joq pajàu, aih wìa ka haq ùh loq ka mangai gucadrih ma bèq raðeh aih cabô, wìa ka haq ùh loq ka gucadrih qmat mangai qmang leq, qmat xài mangai bình toq yiniq lui.

⁴⁰ Chuaq Jesus doe ka haq: “Simôn, au i biaq nà anoe ka ìh.” Simôn padreo bàu: Mangai hnài, ìh anoe beq.

⁴¹ “I moeq ngai aih, i baiq ngai pòq dòeh haq: moeq ngai pòq padam hrinh ðoniê, moeq ngai pòq padam jât.

⁴² Dìq baiq ka wa ùh i cleq hu caqnaih dòeh, cla wì craq hi cađac đống ka wa. Taqne wa baiq ngai aih, maleq ma loq waq ka wì craq yi bəc?”

⁴³ Simôn hi têu: Au hèm mangai leq ma khoe jah cađac yeo bàc aih, haq aih loq waq yi bàc. Chuaq Jesus doe: “Ìh hèm troq.”

⁴⁴ Khoe aih, haq wìh ta gucadrì rai doe ka Simôn: “Ìh i hnoq mangai gucadrì kô? Au mùt ta hnim ìh, ìh ùh qnoh qmòe diac qnheo jènh, mahaq gucadrì kô yǒc dèh diac mat srùh jènh au, khoe èh yǒc dèh xàc gàu hu xùt.

⁴⁵ Ìh ùh hìp au, mahaq haq kô patep haq mùt hnim ìh, haq hìp jènh au ùh hêq.

⁴⁶ Ìh ùh xùt dàu ta gàu au, yàng da haq kô yǒc dàu xua thùm xùt ta jènh au.

⁴⁷ Aih ìq au majah doe ka ìh, yiniq lui mangai gucadrì kô bàc joq qnàng, khoe jah caqnaih òiđ đǒng, majah qmang aih haq khoe loq waq yeo bàc, yàng da mangai jah caqnaih yeo bìa, haq loq waq yeo bìa.”

⁴⁸ Chuaq Jesus doe ka mangai gucadrì: “Yiniq lui ìh khoe jah caqnaih đǒng.”

⁴⁹ Bài wì ma hadai hangui acaq moeq qmang ta aih hèm ta manoh: Mangai kô ìq cabô ma doe rađeh i cwiàng caqnaih yiniq lui?

⁵⁰ Mahaq Chuaq Jesus doe ka mangai gucadrì aih: “Kan lùì ìh khoe dèch ìh, lam ka cătèm oq.”

8

Aliah ka mangai rai adrech

¹ Atìq ka aih, Chuaq Jesus lam enh gùng kô trùh gùng tau, enh plài kô trùh plài qnoeq, anoe hnài Bàu lem lem da diac Boc Plình. I moeq jàt baiq ngai tiaq cla oe ti haq.

² Èh hadai i wì gucadri lam tiaq haq, aih la bài mangai khoe jah paclaih enh kiác dù, khoe jah brêh ka yiniq: Mari, wì ma creó Mađolen, tapèh toq kiác dù loh enh chac haq,

³ Jan-no, cadri da Chu-sa, aih cwan wèq ta hnim bùa Hêrôt, Su-sana xam bàc ngai qnoeq hò m wiang dèch bac jènh ka haq.

⁴ Jò bài mangai bàc tagop ti dabau xam mangai enh rìm plài trùh òi ta Chuaq Jesus, haq hi yóc bàu aliah hu hnài wì:

⁵ “I moeq ngai lam rai dèh adrech. Jò rai, moeq qnah cùh ti trong, aih wì hi troq jôiq èh chìm enh qnhèq loh jôh dồng.

⁶ Moeq qnah cùh ta tanèh raga, bu hon ma loq khoe croh majah qmang aih ùh i ðeh toq biaoq hnha kan da-ìm.

⁷ Maqnoeq taclih taqne xèm yila, haq hon pajùm ti yila, haq toq hlac loh ka pì jah kàn.

⁸ Adrech ma qnoeq cùh tanòe tanèh lem. Haq hon lem, loh hadròc, moeq jah moeq hrinh. Jò anoe qmang aih haq doe: “Mangai leq i don, tamàng beq.”

⁹ Mangai tiaq hóc bóch haq bàu aliah aih anoe cleq.

¹⁰ Haq doe: “Kan hlèp tanòe diac Plình khoe am pì loq, yàng wì qnoeq aih yóc bàu aliah hu anoe, òi wì ngan manhaq ùh hnoq cleq, tamàng mahaq ùh qnì tàng.

¹¹ Bàu aliah aih rameh: Adrech aih bàu Boc Plình

¹² Adrech taclih ti trong, aih bài mangai tàng bàu, yàng atìq ka aih kan kiác trùh tablah yóc bàu

ta manoh cliac wì haq, yùq wì haq lùì èh loq jah dèch qmòh.

¹³ Adrech taclìh nòe raga, aih bài mangai bu tàng bàu khoe lem bùi yǒc bàu aih, mahaq ùh i ka riah. Wì lùì moeq rayàc, jò i kan khech tăt, wì haq hi talùi.

¹⁴ Adrech taclìh ta yila, aih bài mangai tàng bàu, mahaq tiaq dèh manoh kan loq lèt kan padrǒng kan rìh qmòe ka hlàu toq taqnhòng kô, broq ka bàu aih pì jah chet, pì loh qmòe plì ma yi wìa.

¹⁵ Mahaq adrech taclìh tanòe taneh lem aih bài mangai i manoh cliac lem joq qnàng, bài mangai tàng bàu, rai cajap manoh wèq bàu aih hi jah loh plì.

Kan qngah

¹⁶ Ùh i cabô bùh đen èh yǒc griang gùp cađac, tàng ùh meh cadoc ta caqnàm, mahaq dèch tanòe haqnhèq, dōq cabô mùt ta hnìm dìq jah hnoq kan qngah.

¹⁷ Majah qmang aih ùh i cleq hlèp, èh ma ùh hnoq, ùh i cleq cadoc èh wì ma ùh loq, ma ùh hìa ep patô qnoh.

¹⁸ Qmang aih pì ep tamàng ma rabiaq bàu pì tàng majah qmang aih mangai khoe i, èh jah am tam, mangai leq ùh i, aih èh jah doeh yǒc hloe yiniq cleq haq xoh ðeh khoe i."

Miq xam wì oh Jesus

¹⁹ Jò aih, miq da Chuaq Jesus xam wì oh haq lam chaq haq. Yàng mangai bàc hrình, ùh jah thia haten ka haq.

²⁰ I mangai lam anoe ka haq: Miq ìh xam wì oh ìh oe enh gùng, enh glàm ìh.

²¹ Mahaq Chuaq Jesus padreo bàu “Miq au xam oh daq au aih bài mangai tàng bàu Boc Plình rai broq tiaq bàu aih”.

Bahùt tadiac

²² I moeq hì, Chuaq Jesus loh taboang ti mangai tiaq hóc, haq doe: “Beq bèn tồc pah tau hlông”; khoe wì hi lam.

²³ Jò boang qnang cadàu, Chuaq Jesus kùi. I bahùt trùh ta hlông aih, diac bình taboang, qnang jò yat dìq jaq.

²⁴ Mangai tiaq hóc tùh padriù haq: Mangai hnài, mangai hnài, bèn cachit manòeq kô raq! Mahaq jò haq bu yòng, haq tagaih ka cayeo xam diac dōq wa hatinh, aih wa hi hatinh hatot hloe.

²⁵ Haq doe ka mangai tiaq hóc: “Manoh lùì pi taleq hòm.” Mangai tiaq hóc rai crè rai hamaih, bòch dabau: Mangai kô ìq cabô, jaq cayeo xam diac dìq iu dōng bàu haq?

Broq brêh ka mangai kiac rùp

²⁶ Khoe aih wì trùh tagùng mangai Jêrasê, tajang ka gùng Galili.

²⁷ Jò Chuaq Jesus tồc tago, tagùng aih i moeq ngai bàc kiac tachac haq. Khoe dùnh, haq pì lah caxùnh eo, pì lah oe ta hnìm, mahaq oe ta cadràng hanang.

²⁸ Bu hnoq Chuaq Jeus, haq aih cajiah ta gruàng, rai pacro dađeh anòe jènh Chuaq Jesus, haq tapoch qmòe cadêh: Ìh enh broq ka au cleq kô ìq, Chuaq Jesus kon da Boc Plình haqnhèq au waiq ìh ùh dùh baxa au dèh.

²⁹ Majah qmang aih, Chuaq Jesus i thê kiac dù aih loh ma khoe ka mangai kiac rùp khoe dùnh aih. Yac ka wì tàt haq, kàt, clang jènh tì haq, dua haq hràt cađac caxi mem, wah cađac long clang, kiac qmùt haq tanòe hawit.

³⁰ Chuaq Jesus bòch haq: “Gè yiniq cleq?” haq padreo bàu: Bải lình, majah qmang aih bằc toq kiac khoe mùt tachac haq.

³¹ Wì haq cali calo ka Chuaq Jesus apaq caqnìh wì haq kòe jrùq.

³² Jò aih i meq calùh chùà qnang acaq tawang. Bải kiac bòch Chuaq Jesus am wì haq jah mùt đeh ta calùh chùà aih, Chuaq hi am.

³³ Bải kiac loh enh mangai aih, mùt ta calùh chùà, calùh chùà oe enh búc haqnheq cadàu hatàp gàu ta hlõng cachit òi đõng.

³⁴ Bải mangai ban chùà hnoq qmang aih, drah cadàu lam amot, rai anoe yiniq aih jàp rìm gùng rìm plài ta aih.

³⁵ Wì dahrôq loh ngan, jò wì haq trùh tanòe Chuaq Jesus, hnoq mangai kiac neo loh enh haq aih qnang hangui nòe jènh Chuaq Jesus, sràp eo cwàn, gàu ngoc prau prình, wì yùq pì cajaq.

³⁶ Bải mangai ma khoe hnoq kan halac aih, anoe ka hlài jàp ka phù cròng loq mangai kiac rùp aih khoe jah brêh qmang leq.

³⁷ Òi đõng mangai oe ta gùng Jêrasê cali calo doe ka Chuaq Jesus òe haq lam đac tagùng qnoeq, majah qmang aih wì crê pì cajaq. Haq loh taboang wìh hlài pah tau.

³⁸ Mahaq mangai kiac ma khoe cadàu loh enh chac, haq bòch tiaq Chuaq Jesus, mahaq Chuaq

Jesus thê haq hlài, Chuaq Jesus doe ka haq:

³⁹ “Hlài ta hnim hu anoe ka wì dōq wì loq Boc Plinh khoe broq am ka ìh cleq.” Qmang aih, haq hi lam rai anoe hlài rìm yiniq Boc Plinh khoe broq am ka rađeh jàp rìm gùng.

Kon cadri Jairu xam mangai gucadri dahrôq mahim

⁴⁰ Jò wì wìh hlài, i bàc ngai ãđi Chuaq Jesus, majah qmang aih mangai leq mangai meh ngèh ãđeh hra ka haq.

⁴¹ I moeq ngai wèq hnim tagop qyoh yiniq haq Jairu trùh bla op nòe jènh Chuaq Jesus, cali calo canòm ka Chuaq trùh dèh ta hnim.

⁴² Majah qmang aih haq i moeq ngai kon cadri moeq jàt baiq hanam khoe ten cachit. Jò Chuaq Jesus lam ti trong bài wì dahren dudan ka haq.

⁴³ Jò aih i moeq ngai gucadri yiniq khoe moeq jàt baiq hanam dahrôq mahim, bac jènh haq khoe yam ãđi ãđong ka ãđai mangai broq jreo, mahaq ùh i ka mangai leq haqnauq haq brêh,

⁴⁴ haq trùh enh rù bèq haqmai eo Chuaq Jesus, tajòe qmòe mahim haq hi xôt.

⁴⁵ Chuaq Jesus doe: “Cabô khoe bèq au?” mangai leq mangai meh haqngah ãđeh hra, Phiero xam bua haq doe: Mangai hnài, mangai bàc ti dudan rai hnen ìh.

⁴⁶ Chuaq Jesus doe: “I mangai khoe bèq au, au tàng i padren loh enh chac au.

⁴⁷ Mangai cadri aih hnoq ãđeh cadôc pi hlèp, haq tarit thia bla op ãđeh ta haqneq ajang nòe jènh Chuaq Jesus enh ngèa mangai bàc, haq anoe

dõng hagleq ðeh majah bèq haqmai eo Chuaq Jesus, èh manòeq raðeh khoe jah brêh qmang leq.

⁴⁸ Mahaq Chuaq Jesus doe ka haq: “Yôiq kon cadrì au, manoh lùì kon khoe broq kon jah brêh, lam ma catèm beq.”

⁴⁹ Chuaq Jesus oe raq capoch, i mangai loh enh hnìm Jairu, craq wèq hnìmtagop qyoh doe ka haq: Kon cadrì ìh khoe cachìt, oe pangài dèh ka haq qmat hòm.

⁵⁰ Tàng bàu aih, mahaq Chuaq Jesus doe ka Jairu: “Apaq yùq! toq lùì raq, aih èh kon ìh hi jah brêh.”

⁵¹ Jò khoe trùh ta hnìm, Chuaq Jesus am toq Phiero, Jaco, Jon xam wa miq baq kon qyoh aih mùt tiaq haq.

⁵² Jò meh òiq ka mangai ta aih ta-oe ti atoch ka kon mangai aih, Chuaq Jesus doe: “Hêq pi dùh hmoe! Kon mangai kô ùh xài haq kachìt, haq qnang kùì.”

⁵³ Wì do ka haq, majah qmang aih wì loq kon mangai aih joq khoe cachìt.

⁵⁴ Mahaq Chuaq Jesus carùp tì kon cadrì qyoh aih rai doe “Kon au, yòng beq!”.

⁵⁵ Mahua yiang mùt hlài tachac, haq hi padinh yòng. Khoe aih Chuaq Jesus thê wì qmì kon qyoh aih acaq.

⁵⁶ Miq baq kon qyoh aih òiq jaq hamàih ta manoh, mahaq Chuaq Jesus ùh lòh wa anoe ka cabô loq yiniq aih.

9

Moeq jàt baiq ngai Tiaq cla loh lam

¹ Chuaq Jesus creo ka wì moeq jàt baiq ngai, haq am ka wì padren cwàng itai òòeq drùh hnàn kiác chỏc, broq brêh ka mangai yiniq,

² khoe aih haq thê wì loh lam anoe hnài trong diác Boc Plình rai broq ka mangai ùh hrỏc jah brêh.

³ Haq tanap ka wì: “Jò pì lam ùh dùh wê cleq, yac ka long dùì, yac ka ayôp, yac ka bênh, bác jènh, apaq wê racop baiq blah eo.”

⁴ Pì mùt hnìm leq, pì oe ta aih trùh jò loh enh plài aih,

⁵ tàng wì ùh òh ùh pachùh pì, loh enh plài aih pì hapùih blo top tajènh pì òòeq broq kan pagau am ka wì haq hnoq.”

⁶ Moeq jàt baiq ngai tiaq cla, loh lam enh plài kô trùh plài tau, anoe Bàu lem rìm nòe rai broq ka bác ngai jah brêh ka yiniq.

Hêrôt yùq crê

⁷ Jò aih, bùa Herôt hìa wì anoe rìm yiniq Chuaq Jesus ma khoe broq, haq loh ka rawè, hèm pì hlùh, majah qmang aih i ngai doe: aih Jon, khoe rìh hlài enh cachìt;

⁸ mangai qnoeq doe: Êlì khoe loh, mangai qnoeq hòm doe: taqne bài pajàu dùnh calah nêh i moeq ngai khoe rìh hlài.

⁹ Mahaq Hêrôt doe: Au khoe thê wì pỏt ranỏng Jon, mangai kô aih cabô hòm, gleq au ma jah tàng bác trong haq broq? Bùa Herôt hỉ ti chaq nen hu glàm Chuaq Jesus.

Jesus qmì padam muàn mangai acaq

¹⁰ Moeq jàt baiq ngai tiaq cla wìh hlài taqmon ka Chuaq Jesus rìm yiniq wì haq khoe broq, haq

qnonq wì aih tiaq haq, wì lam ðeh crài haten ka plài Bêtsaida.

¹¹ Mahaq bài mangai ta aih wì tàng, wì hi lam tiaq haq. Chuaq Jesus ðih wì aih, hnài dōq wì loq ka ðiac Boc Plình rai broq ka mangai yiniq jah brêh.

¹² Trùh mat mahì ten clih, mòeq jàt baiq mangai tiaq cla thia haten ka Chuaq, wì doe: Ìh thê wì hlài beq, dōq wì haq ti mùt roc gùng roc plài ten dudan tacô, hu chaq nòe padài rai chaq dahwèq acaq, majaq qmang aih bèn kô qnang oe tanòe hawit.

¹³ Mahaq haq doe ka wì: “Pì raq mangai hu qmì ka wì acaq!” Moeq jàt baiq ngai tiaq cla têu: Tàng joq nhèn ùh lam rot dahwèq acaq am ðiq ka wì tacô, nhèn i padam toq bênh xam baiq pliang ka raq,

¹⁴ (Jah padam muàn mangai gualô ta aih) Chuaq Jesus doe ka mangai tiaq hōc: “Thê wì hangui tang brong padam jàt ngai.”

¹⁵ Mangai tiaq hōc broq tiaq bàu aih, thê ðiq dōng wì hangui.

¹⁶ Èh Chuaq Jesus yōc padam toq bênh xam baiq pliang ka, haq qngōc ngan ta plình, manè apôi Boc Plình khoe aih goh bênh. Haq am ka mangai tiaq hōc ti axong ka mangai ta aih.

¹⁷ Mangai leq mangai meh acaq panàc ðeh hra, wì toch hlài bài haqnech rah jah moeq jàt baiq rajo.

Phiero doe Jesus aih Christ

¹⁸ I moeq hì, jò Chuaq Jesus qnang waiq khàn ðeh moeq ngai, mangai tiaq hōc tagop dudan ka

haq. Haq bòch: “Dìq ka bài mangai bàc doe au kô ìq cabô?”

¹⁹ Wì padreo bàu: Mangai kô doe Jon Baptit, mangai tau doe Êli, mangai qnoeq hò m doe moeq ngai pajàu qnhòng calah nèh rìh hlài.

²⁰ Haq bòch hò m “Ha pì, pì doe au cabô?” Phiero doe: Ìh kô Christ, kon da Boc Plình.

²¹ Chuaq Jesus ùh lòh wì mangai tiaq hỏc anoe yiniq aih ka cabô loq,

²² Haq doe tam ka wì: “Kon mangai ep glàm bàc kan xalep, bài wì gucraq, bài pajàu xam mangai hnài ranenh kèh qnoh cađac haq, wì jèh cađac haq, piq hì èh haq hì rìh hlài.

²³ Khoe aih, haq doe: “Tàng mangai leq enh tiaq au, ep cađac rađeh, rì m hì xùì dèh long pagat lam tiaq au.”

²⁴ Majah qmang aih, cabô enh wèq dèh kan rìh, aih èh hnhung, mangai leq cađac dèh kan rìh ðòeq tiaq au, haq aih èh jah dèch.

²⁵ I jah cleq ka mangai jah ðìq ðỏng crỏng taneh kô mahaq cla haq aih raliang hnhung.

²⁶ Mangai leq camaih đac ka au xam bàu au, aih èh Kon mangai hadai camaih chau ka wì aih, jò haq trùh hangui dèh ta kan ranhòm cla haq, kan ranhòm Baq xam kan ranhòm bình plình hadròeh.

²⁷ Joq qnàng au doe ðìq ka pì mangai qnang yòng tacô, i ngai ùh cachìt adroe ka wì jah hnoq ðiac plình”.

Jesus hatuàng ka Môise sam Êli

²⁸ Qnah ta rahem hì atìq ka anoe bàu aih, Chuaq Jesus qnong Phiero, Jon xam Jaco tiaq haq tỏc tawang ðòeq waiq khàn.

²⁹ Jò qnang waiq khàn, hadrò haq loh ka crài, eo haq loh ka taboc camla.

³⁰ I Môise xam Êli oe ta kan ranhòm loh hatuàng ti haq.

³¹ Wì hatuàng trùh bìac Chuaq Jesus cachèt, aih trong haq ep broq gêh ta Jêrusalem.

³² Phiero xam bua haq enh kùi pi cajaan, mahaq jò bu cadrat, wì hnoq kan ranhòm Chuaq Jesus xam baiq ngai qnang yòng ti haq.

³³ Jò wa aih bu talah ka Chuaq Jesus, Phiero doe ka haq: Mangai hnài, bèn oe tacô lem joq qnàng, beq bèn broq piq toq hapom tacô, moeq toq ka ìh, moeq toq ka Môise, moeq toq ka Êli. (Haq ùh qnì ka rađeh khoe anoe cleq)

³⁴ Jò haq oe raq anoe, i moeq cato yùc trùh glom òiq ka wì haq, bài mangai tiaq hóc crè pi cajaan.

³⁵ Jò aih i bàu enh yùc doe: “Kô Kon da au, Mangai au khoe ràih òeh, drah tamàng bàu haq”.

³⁶ Jò bàu aih atêh loh, wì haq hnoq moeq ngai Chuaq Jesus raq. Mangai tiaq hóc oe aiq hatinh, ùh anoe ka cabô loq òeh khoe hnoq cleq.

Mangai kiac rùp

³⁷ Hì atiq, jò wì loh enh bui wang, pi cajaan mangai lam òih haq.

³⁸ Ta aih i moeq ngai creo cadêh: Mangai hnài! au cali calo òeh ka ìh, lam ngan biaq da au kon, au i òeh moeq toq haq aih raq.

³⁹ Moeq toq kiac rùp haq oe hi cachech cachaiq cadêh, kiac aih rapôh rapàt haq òiq jaq, hacùng loh toq diac hai camùh, chac haq hech hoch men waq loh.

⁴⁰ Au khoe canòm ka mangai tiaq hỏc ìh drùh qnoh kiac aih, mahaq wì drùh ùh jah.

⁴¹ Chuaq Jesus doe: “Wùih! caxì noe ùh qnì lùì rai gòpla tau, au oe tì pì, au àt ka pì trùh pang leq kô èh? Drah aràng kon ìh lam acô”.

⁴² Mangai kon calô aih bu thia haten, kiac caqnhùt haq tacro ta haqneq, rai ranhùq haq. Mahaq Chuaq Jesus lech ka kiac aih, khoe èh haq broq brêh ka kon qyoh aih èh hi am hlài da baq haq.

Jesus anoe trùh dèh hì kachìt

⁴³ Mangai leq mangai meh hamàih ðeh hra kan itai Boc Plình. Jò ðìq ka wì ta aih oe raq manè trong Chuaq Jesus ma broq, haq doe dèh ka mangai tiaq hỏc:

⁴⁴ “Pì tamàng ma rabiaq haq bàu au anoe ka pì kô èh: Kon mangai kô èh mùt ta tì kỏng wì.”

⁴⁵ Mahaq mangai tiaq hỏc ùh qnì tàng, bàu aih khoe cadoc ka wì haq ðỏq wì haq ùh loq, wì hadai ùh hùà bỏch haq bàu aih.

⁴⁶ Bài mangai tiaq hỏc tarahen ti dabau hu ngan taqne wì haq kô èh mangai leq ma yeo kàn ðỏng.

⁴⁷ Mahaq Chuaq Jesus loq ta manoh bài mangai tiaq hỏc, haq yỏc moeq ngai kon qyoh ðỏeq oe haten ka haq,

⁴⁸ Haq doe: “Enh dalam ka yiniq au cabô ðìh kon qyoh kô, aih haq ðìh au, cabô leq ðìh au, aih haq ðìh Mangai khoe thê au. Majah qmang aih taqne pì mangai leq ma yeo qyoh ðỏng, aih raq mangai ma yeo kàn ðỏng.”

⁴⁹ Jon doe: Mangai hnài, nhèn i hnoq mangai yỏc yiniq ìh ðỏeq hnan qnoh kan kiac, nhèn khoe

tàt haq, majah qmang aih haq ùh pajùm moeq qmang ti bèn.

⁵⁰ Chuaq Jesus padreo bàu: “Apaq tàt haq, majah qmang aih mangai leq ùh tablêq ka pì, aih haq hatroq ti pì”.

Jesus tǝc ta Jerusalem

⁵¹ Khoe ten trùh dèh jò Chuaq Jesus pi oe ta crǝng taneh, dua haq waq ka tǝc ta Jerusalem.

⁵² Haq thê mangai lam bahìa adroe. Wì aih loh lam, mùt ta plài mangai Samari òeòq hu padon hnìm padài ka haq.

⁵³ Mahaq mangai Samari ùh waq òèh haq, majah qmang aih haq tǝc ta Jerusalem.

⁵⁴ Jò mangai tiaq hǝc aih la Jaco xam Jon, hnoq qmang aih, wa doe: Chuaq au, ìh i enh ma creò ka ùnh enh plình loh bùh òac wì qmat loq ùh?

⁵⁵ Mahaq Chuaq Jesus tawìh ta wa, haq tagàih: “Chòp ùh qnì cleq ma jròq chiu raðeh qmat.”

⁵⁶ Khoe aih haq xam mangai tiaq hǝc hì lam ta plài qnoeq.

Broq qmang leq men jah tiaq Jesus

⁵⁷ Jò qnang lam ti trong, i mangai doe ka haq: Waiq Chaq, ìh lam pang leq au tiaq pang aih.

⁵⁸ Chuaq Jesus tèo haq: “Chòn i cabǝc, chìm i pù, mahaq Kon mangai ùh i nòe hu angèn gàu.”

⁵⁹ Haq doe ka mangai qnoeq hòm: “Ìh lam tiaq au beq!” Mangai aih tèo bàu: Ìh òòq au hlài catùh hanang deh baq òeq.

⁶⁰ Mahaq Chuaq Jesus doe: “Òòq da mangai cachit catùh dèh mangai cachit, ìh lam tiaq au hu anoe trong diac Plình.”

⁶¹ Mangai qnoeq hòm doe: Brì ka au tiaq ìh, mahaq adroe aih ìh dôq au hlài hangah dèh kan cadraq òeq.

⁶² Chuaq Jesus padreo bàu: “Cabô tì khoe cadop long kai ma oe raq hwi ngan enh rù, mangai ùh tajì ka diac Boc Plình.”

10

Tapèh jàt ngai tiaq hóc lam anoe diac plình

¹ Atìq ka aih, Chuaq Jesus ràih yóc tapèh jàt ngai tiaq hóc maqnoeq hòm, khoe èh haq thê wì lam racop baiq ngai, baiq ngai, lam adroe ka rađeh, trùh rìm nòe haq padon lam.

² Haq doe ka mangai tiaq hóc: “Qmau trùh khoe bàc, yàng mangai gat aih toq bìa. Qmang aih, drah bòch cla wì craq qnoh tam bình gat hòm.

³ Drah lam beq, meh au thê pì lam, i crài cleq ka kon trùu oe qne koq yiang.

⁴ Apa q wê cayôp bac, apa q wê bau, jai, roc trong apa q kùh gàu ka cabô.

⁵ Jò pì mùt hnim cabô, adroe aih pì doe: wai q kan catèm am ka hnim kô!

⁶ Tàng jo q hnim aih i mangai tajì ka jah kan catèm, aih èh kan catèm enh pì loh oe ti mangai aih, tàng ùh qmang aih, kan catèm wìh hlài ta cla pì.

⁷ Pì oe ta hnim aih, aca q dahwèq wì qnoh ka pì, majah qmang aih mangai patìh ùh qngwan ka jah kùng baha. Apa q rangòt lam hawàt enh hnim kô trùh hnim tau.

⁸ Jò pì mùt gùng leq, wì gùng aih pachùh adràc, wì padon cleq, pì aca q ka aih.

⁹ Broq brêh ka mangai yiniq ta aih, rai doe ka wì: Diac Boc Plình trùh khoe haten ti pì.

¹⁰ Mahaq jò pì mùt ta plài leq, yàng wì ta aih ùh ãh pì mùt, pì loh roc trong rai doe:

¹¹ Pì ngan kô, blo plài pì ma top ta jènh, nhèn ha pùih ãac ãoeq chôn timeriaq pì hnoq, mahaq pì ep loq rameh Diac plình khoe trùh haten ka pì.

¹² Au doe ka pì, trùh hì ma atiq lùch èh, gùng Sôđom pòq kan hadrah yi ãiaq ka gùng aih.

¹³ Hãbo ka gè, Côrasin. hãbo ka gè Bêtsaida, majah qmang aih tàng joq kan halac khoe broq taqne pì qmat aràng broq ta gùng Tiro xam Sidôn, wa aih khoe caxùnh eo briang, kui blo tanùh, khoe raxach, tawìh hlài khoe dùnh.

¹⁴ Aih èh, trùh hì hadrah, plài Tiro xam Sôđom pòq kan hadrah yi ãiaq ka pì.

¹⁵ Da gè hòm, Cabênaum, gè jah dèch atóc trùh ta plình qmòh? Ùh ãòh, gè qmat èh jah qnìh cađac trùh qmòe ta hwình.

¹⁶ Cabô tamàng pì, aih tamàng au, cabô cađac pì, aih cađac au, cabô cađac au aih ca ãac Mangai ma khoe thê au.”

¹⁷ Tapèh jàt ngai tiaq hóc wìh hlài rai lem bùi rai doe: Chuaq! Enh dalam yiniq Ìh, jaq kan kiac dua iu bàu nhèn.

¹⁸ Chuaq Jesus padreo bàu: “Au hnoq Satan clìh tiàh ka kan camlet enh plình.

¹⁹ Au khoe am ka pì cwìang itai hu jôiq padit bìh, agôt hloe xam cwìang mangai tagit ka pì. Ùh i mangai leq hlàt broq ka pì raliang.

²⁰ Qmang aih, ùh dùh lem bùi jò kiac iu bàu pì, mahaq lem bùi jò yiniq pì khoe jah achìh ta ãiac

plinh.”

²¹ Jò aih, Chuaq Jesus dìq jaq lem bùi ta Yiang Hadròeh, haq doe: “Waiq Baq! Craq da plinh crông taneh, au manè apôi Ìh, majah qmang aih ìh khoe cadoc yiniq kô ka mangai rabiaq, mangai i hóc, mahaq patô qnoh ka kon qyoh. Baq ôi, joq qnàng qmang aih, majah qmang aih ìh khoe hnoq biac aih lem.

²² Baq khoe jao dõng rìm yiniq ka au, enh gùng ka Baq ùh i cabô loq ka Kon, enh gùng ka Kon, xam mangai leq kon enh mahno am, hadai ùh i mangai leq loq ka Baq aih cabô.”

²³ Khoe aih, Chuaq Jesus hwi ngan mangai tiaq hóc rai doe: “Xôq ramot ka mat jah hnoq trong pì hnoq!

²⁴ Majah qmang aih au anoe ka pì, bàc ngai pajàu xam bùa tangèh jah hnoq trong pì hnoq, mahaq ùh jah hnoq, tangèh ka jah tàng trong pì tàng mahaq ùh jah tàng.”

Mangai samari loq hanò

²⁵ I moeq ngai hnài ranenh, yòng bóch ðòeq hu qnhro ngan Chuaq Jesus, haq doe rameh: Mangai hnài, au ep broq cleq ðòeq hu jah kan rìh halinh mòeq ðòe?

²⁶ Chuaq Jesus bóch: “Ta hset ranenh achìh cleq? Ìh ðóc cleq ta aih?”

²⁷ Haq aih tèu bàu: Ìh ep dìq ka manoh, dìq ka mahua yiang, dìq ka padren, dìq ka gàu ngoc loq iu Chuaq aih Boc Plinh ìh, rai loq waq ka mangai haten hatìa ka ìh.

²⁸ Chuaq Jesus doe ka haq: “Ìh tèu khoe troq, broq qmang aih beq, ìh hi jah rìh.”

29 Mahaq mangai hnài ranenh aih enh doe rađeh aih mangai taq atoq, haq bòch Chuaq Jesus: Mangai haten hatia ka au aih cabô?

30 Chuaq Jesus padreo bàu: “I moeq ngai enh Jêrusalem loh ta Jêrico, ti trong glàm bài mangai atùng, wì blah yốc dỉq đồng da haq bac jèn, jêh haq habau habua ta chac, khoe cla wì hi lam cađac haq oe ti aih ten cachit ten rih.

31 Jò aih, i moeq ngai pajàu loh trong aih, hnoq mangai aih, haq wia pah tau trong èh lam hloe.

32 Èh hòm, i moeq ngai Lêwi hadai trùh jang aih, thia haten, ngan hnoq qmang aih, èh hanoh lam hloe.

33 Mahaq i moeq ngai samari lam ti trong, thia haten hnoq qmang aih, ta manoh haq ha-och ka mangai aih.

34 Haq yốc dầu, yốc alac qnheo teo habau, khoe èh ti kàt palauq, khoe aih, dèch atóc enh crống lùa aràng trùh hnim padài, hu wèq ngan.

35 Trùh hì atìq, yốc baiq đoniê am ka craq hnim padài rai tanap: Ìh wèq ngan mangai kô oq, tàng loq yam ùh hnau, jò au wìh hlài i au caqnaìh.

36 Taqne piq ngai aih, ìh hèm beq, mangai leq ma haten hatia ka mangai wì ma atùng aih?”

37 Mangai hnài ranenh aih padreo bàu: Aih mangai ma khoe i manoh loq waq, khoe loq hanò ka haq. Chuaq Jesus doe: “Drah lam beq, broq tiaq qmang aih”

Mathê

sam Mari

³⁸ Jò Chuaq Jesus xam mangai tiaq hốc lam ti trong, trùh ta plài tau, i moeq ngai gucadrì yiniq haq Mathê đìh Chuaq Jesus mùt dèh ta hnim.

³⁹ Haq aih i moeq ngai oh cadrì, yiniq haq Mari, haqngui nòe jènh Chuaq Jesus hu tamàng bàu Chuaq.

⁴⁰ Mathê toq ti hawet jiang patìh, trùh anoe ka Chuaq Jesus: Chuaq au! oh au đòeq au patìh đeh moeq ngai, ìh doe ka haq wiang patìh ti au diq.

⁴¹ Chuaq Jesus padreo bàu: “Mathê, Mathê, ìh chiuq lep rai hèm bacc trong;

⁴² mahaq i moeq yiniq raq ma nhet. Mari khoe ràih yóc ka dadeh yiniq aih, ùh i cabô jah blah yóc da haq”.

11

Jesus hnài waiq khàn

¹ I moeq hì, Chuaq Jesus qnang waiq khàn tanòe aih, jò khoe hêq ka waiq khàn, moeq ngai tiaq hốc doe ka haq: Chuaq ôi, ìh hnài nhèn waiq khàn qmang ka Jon khoe hnài dèh mangai tiaq hốc diq.

² Chuaq Jesus doe: “Jò waiq khàn pì anoe qmang kô: Waiq Baq, Yiniq Baq jah hadròeh, diac Baq jah trùh,

³ Am ka nhèn dahwèq acaq hì leq qnang lem hì meh,

⁴ Caqnaih da nhèn yiniq lui, majah qmang aih nhèn hadai caqnaih yiniq lui ka mangai ma broq yiniq ka nhèn, ùh dùh aràng nhèn tanòe padô qnùt”.

⁵ Khoe aih, haq doe ka wì mangai tiaq hõc:
“Tàng taqne pì i moeq ngai i dèh bua qne mang
trùh creò: Ê daq, am đồ ka au piq toq bèn̄h,

⁶ majah qmang aih i bua au neo trùh enh
hangai, au ùh i ka dahwèq hu qnoh ka haq acaq.

⁷ Tàng joq mangai oe ta hnim doe: Apa q pangài
ka au, qmang khoe clên̄h, wì kon xam cla au òiq
khoe kùi, ùh jah yòng yõc bèn̄h ka ìh;

⁸ au doe ka pì, yac ka mangai ùh enh yòng yõc
bèn̄h am dèh ka bua, mahaq pàng mangai aih xan
bòch yôt, èh dua haq yòng am dèh ka bua haq rìm
yiniq bua haq qnang nhet ka waq.

⁹ Au anoe tam ka pì: Bòch beq, yiniq aih jah
am ka pì, chaq beq pì hi hnoq, clôq beq qmang hi
tapèh am ka pì.

¹⁰ Majah qmang aih mangai leq bòch, mangai
aih jah, mangai leq chaq, mangai aih hnoq, èh
mangai leq clôq, qmang hi ta pèch am ka mangai
aih.

¹¹ Òiq ka pì ma broq baq qmat, i cabô jò kon
cla bòch bèn̄h yàng aih am hmo? Ùh meh bòch ka
mahaq am bìh?

¹² Tàng ùh meh bòch catap mahaq am agôt?

¹³ Qmang aih, pì qmat mangai qmèq mahaq oe
loq am dèh ka kon yiniq lem, ùh dùh dèh ka Baq
pì oe ta plìn̄h ma ùh am Yiang Hadròeh ka mangai
creò dang haq!”

Jesus sam Ben xê bun

¹⁴ Chuaq Jesus hnan qnoh moeq toq kiác lâu,
jò kiác khoe loh, mangai lâu aih hi jah capoch.
Mangai leq mangai meh hamàih ðeh hra.

¹⁵ Mahaq i qnah ngai doe: Mangai kô canòm ka Bê-en xêbun, craq kiac òòeq drùh kiac.

¹⁶ Mangai ma qnoeq hòmh enh qnhro ngan haq, wì bòch haq am wì hnoq kan halac loh enh plình.

¹⁷ Chuaf Jesus loq ka manoh wì, haq doe: “Diac leq to hit rađeh, diac aih raliang, hnìmh leq cla to lah dabau, hnìmh aih èh tacro.

¹⁸ Qmang aih tàng joq kiac Satan hit rađeh, diac haq ma oe dràng, majah qmang aih pì doe au canòm ka Bê-en xêbun òòeq drùh qnoh kan kiac?

¹⁹ Tàng joq au canòm ka Ben xê bun òòeq drùh kiac, aih èh kon pì canòm ka cabô òòeq drùh kiac? Aih iq raf, kon pì ma jah broq mangai hadrah cla pì.

²⁰ Mahaq tàng joq au canòm ka hadrang tì Boc Plình òòeq drùh hnàn kan kiac, aih diac Boc plình trùh khoe haten ka pì.

²¹ Jò mangai dèh padren wê ranac wèq dèh hnìmh cla, aih èh kùng hang ta hnìmh haq jah cajap.

²² Yàng i mangai ma yeo dèh ka haq, trùh blèq haq, blah yóc ranac haq ma canòm xam dìq kùng hang haq aih.

²³ Mangai leq ùh oe tì au, mangai aih tablêq ka au, mangai leq ùh pajùm tì au, mangai aih èh haprah hapriang.

²⁴ Jò kiac dù loh enh chac moeq ngai, haq lam rangòt tanòe croh crènh tì chaq nòe padài. Chaq ùh jah, haq hi doe: Hêq au hlài dèh tanòe au ma neo loh.

²⁵ Haq wìh hlài, hnoq hnìmh hwit khoe hreo, rìmh yiniq ta hnìmh khoe don palauq qmòe calem,

²⁶ haq hi lam adràc tam tapèh toq kiac qnoeq yeo dù ùh hnau ka haq mùt oe ta hnìmh aih, aih èh,

mangai aih yeo hamoq ùh hnau ka adroe hòm.

²⁷ Jò Chuaq Jesus qnang anoe bàu aih, i moeq ngai gucadri oe taqne mangai bàc ta aih dên bàu doe: Xôq ramot ka mangai miq khoe ha-uang ìh, ma khoe ta-ùq ìh.

²⁸ Chuaq Jesus padreo bàu: “Mangai leq tàng bàu Boc plình rai iu bàu aih, jah xôq ramot ùh hnau ka aih hòm.”

²⁹ Bài mangai tagop dabau ta aih èh rai bàc, Chuaq Jesus doe: “Caxi noe kô xinoe dù, wì haq bòch ngan teo halac, mahaq ùh am ka wì haq teo halac qnoeq enh gùng ka teo halac da Jôna.

³⁰ Majah qmang aih, Jôna aih raq kan halac ka plài Ninive, hadai qmang aih, Kon mangai hadai kan halac am ka xinoe kô.

³¹ Trùh hì tah hadrah, bùa cadri enh pah qma mat mahì loh, yòng hadrah ka xinoe kô, majah qmang aih haq oe enh gùng haqmai lùch crông taneh khoe trùh hu tamàng bàu rabiaq da bùa Salomôn, mahaq, oe tacô i moeq Ngai kàn ùh hnau ka Salomôn.

³² Trùh hì tah hadrah, mangai oe ta Ninive wì haq yòng pajùm hu hadrah caxi noe kô, majah qmang aih wì haq tàng bàu Jôna, wì haq khoe loq raxach, mahaq, ajang kô i moeq Ngai yeo kàn ùh hnau ka Jôna.

³³ Ûh i cabô bùh đen mahaq òòeq tanòe hanàp, tanòe caqnàm, mahaq wì dèch òòeq tanòe haqnèq, dòq mangai mùt ta hnìm jah hnoq kan qngah.

³⁴ Mat aih đen ta chac hamac, tàng joq mat ìh tadêh, dìq ka chac ìh jah qngah, tàng joq mat ìh ùh nèn, dìq ka chac ìh oe ta clam.

³⁵ Qmang aih, ngan oq, kan qngah ta pì loq loh kan clam.

³⁶ Tàng joq dìq tachac pì qngah qngai, ùh i nòe leq clam jah qngah dìq dǒng, aih hadai tìah ka jò i òen sreo qngah am ka pì dìq.”

Bàu hnài am ka mangai Pharisi

³⁷ Jò Chuaq Jesus anoe bàu aih bu dìq, i moeq ngai Pharisi akhen ka Chuaq Jesus hlài acaq dèh ta hnim. Chuaq hangui acaq.

³⁸ Mangai Pharisi hnoq Chuaq Jesus ùh qnheo tì adroe ka acaq, haq hamàih.

³⁹ Chuaq Jesus doe ka haq: “Dìq ka bài pì aih mangai Pharisi, pì haliang dǒt doe hreo toq enh gùng, mahaq enh dalam bình toq kan atùng xam kan dù.

⁴⁰ Wùih! mangai ratùt, Mangai ma khoe broq enh gùng, ma ùh joq haq broq hloe enh dalam qmòh?

⁴¹ Xan pì yǒc dèh hang pì ma i aih, ti am ka mangai pa, aih èh rìm yiniq hi lem hreo am ka pì.

⁴² Mahaq, haò ka pì, mangai Pharisi, majah qmang aih pì dèch ka Boc Plình mòeq phàn mòeq jàt cachiq bǒc ha, cachiq xang, xam rìm bài cachiq qnoeq, mahaq trong taq atòq, trong loq iu Boc plình aih pì cađac! Aih bài yiniq pì ma ep broq, mahaq hadai ùh dùh cađac bài yiniq tau.

⁴³ Haò ka pì, mangai Pharisi, majah qmang aih pì enh haqngui nòe yeo haqnhèq tanòe hnim tagop, enh mangai qnoeq kùh gàu ka rađeh taqne nòe padro!

⁴⁴ Hăbô ka pì, majah qmang aih pì tiàh ka ralùng hanang khoe cađac klui, wì jôiq enh qnhèq mahaq ùh canau!"

⁴⁵ I moeq ngai hnài ranenh doe: Mangai hnài, ìh capoch qmang aih ma ùh joq ìh broq ka nhèn kan xep.

⁴⁶ Chuaq Jesus padreo bàu: "hadai hăbô ka ìh qmang aih diq, mangai rabiaq toq ka hnài ranenh, pì dèch taqmòq ka mangai qnoeq kan trap, kan tawac, cla pì aih ùh tadroq qmòe moeq hadrang tì!

⁴⁷ Hăbô ka pì, majah qmang aih pì bòn ralùng hanang wì pajàu kan cadraq pì ma khoe jêh đac nèh haq!

⁴⁸ Qmang aih ajoq pì patô qnoh pì khoe mòeq manoh dèh ka trong kan cadraq pì broq, majah qmang aih wì haq khoe jêh cađac pajàu Boc Plình, pì aih mangai bòn ralùng.

⁴⁹ Aih iq raq, kan rabiaq Boc plình i doe: Au thê dèh mangai pajàu xam mangai pòq bàu trùh ti wì haq, wì haq jêh cađac mangai kô rùp mangai tau,

⁵⁰ Dôq mahim rìm ngai pajàu khoe ta-ùc enh jò baxèm broq plình crông taneh, jah taboe diq ka nang noe kô,

⁵¹ Patep enh mahim da Abên trùh mahim Xachari, mangai wì ma khoe jêh cađac ta adreo prang tadreo xam hnìm kùh waiq, joq, au anoe ka pì, mahim wì aih èh, bòch hlài diq ajang nang noe kô èh.

⁵² Hăbô ka pì, mangai hnài ranenh, majah qmang aih pì ta qmiaq yốc long gahlòng da kan rabiaq, cla pì aih ùh waq mùt, mangai qnoeq aih enh mùt, aih pì ùh lòn!"

⁵³ Jò Chuaq Jesus khoe loh enh gùng, mangai Pharisi xam mangai hnài ranenh òiq jaq àu tablêq ka haq, wì bòch bàc trong hu dakhwàiq haq,

⁵⁴ chaq trong òeq bahlac haq ta bàu tapoch.

12

Bàu pariaq mangai tiaq hõc

¹ Jò aih, mangai ta aih tagop ti dabau hi bình qmòe ka mùan, loh qmòe ka tajôiq dabau, Chuaq Jesus chôn timer anoe dèh ka mangai tiaq hõc: “Ngan oq! wèq rađeh apaq top blo da mangai Pharisi, aih kan ti patiah toq enh gùng.

² Ûh i cleq cadoc èh ma ùh hnoq, ùh i yiniq cleq hlèp èh wì ma ùh qnì.

³ Qmang aih rìm trong pì anoe tanòe clam cluiq, jah tàng òiq tanòeh qngah qngai, rìm yiniq pì ta bahech tabluàng hlèp, aih èh jah paqnoh ta kùa po.

⁴ Au anoe ka pì aih mangai bua da au, apaq yùq ka mangai jêh đac toq chac pì khoe aih pì jah broq cleq hòm.

⁵ Mahaq au patô am ka pì khòh yùq ka cabô: Khòh yùq crè ka Mangai jò khoe jêh cađac chac hamac, èh haq i cwàng tèm caqnìh ta hwinh, joq qnàng au doe ka pì: aih Mangai pì ep yùq crè!

⁶ Ma ùh joq padam toq chìm xê wì tech baiq hliac bac raq qmòh? Mahaq moeq toq ta aih dua Boc plinh ùh hêt.

⁷ Xac ta gàu pì qmat hadai rên timer khoe òiq. Apaq yùq dèh! Majah qmang aih pì canaq ùh hnau ka chìm xê.

⁸ Au anoe ka pì: mangai leq doe ðeh canau loq ka au enh ngèa wì phù cròng, aih èh Kon mangai hadai doe ðeh canau loq ka yiniq haq enh ngèa ka bình plình Boc plình.

⁹ Mahaq mangai leq hangah ðeh ùh canau ka au enh ngèa phù cròng, aih èh enh ngèa ka bình plình da Boc plình, au hadai doe ðeh ùh qnì ka yiniq haq aih.

¹⁰ Mangai leq tapoch tablêq ka Kon mangai, yiniq lui aih oe jah caqnaih, mahaq mangai leq tapoch ùh hòq ka Yiang Hadròeh, yiniq lui haq aih èh pì oe jah caqnaih.

¹¹ Jò wì aràng pì trùh enh ngèa hnim tagop, qnoh pì enh ngèa cwan hadrah, cwan wêq cwàng, aih pì apaq hèm ðeh anoe qmang leq, anoe cleq hu cwaih doeh raðeh,

¹² majah qmang aih, wop jò aih raq Yiang Hadròeh hnài pì bàu ma troq ka tapoch.

Mangai pagròng mahaq blùng

¹³ Jò aih, taqne mangai bàc i moeq ngai dèch bàu doe: Mangai hnài, ìh anoe bìa q ka daq au dōq haq axong kùng hang ka au diq.

¹⁴ Mahaq Chuaq Jesus padreo bàu: “Wùih mangai meh, cabô dèch au broq mangai hadrah yiniq, broq mangai axong da pì kùng hang?”

¹⁵ Khoe aih, haq doe ka wì ta aih: “Rabìa q haq oq! apaq daiq cadèh, mangai kô rìh ùh xài canòm ajang nòe bàc kùng hang”.

¹⁶ Haq aliah ka wì bàu kô: “I moeq ngai pagròng, ruàng haq jah qmau pì cajaq,

¹⁷ haq aih hèm dèh ta manoh: Au broq qmang leq kô èh? Pi i qmòe ka nòe anòh hu don òeòeq qmau,

¹⁸ Haq doe dèh raq: Au broq qmang kô èh, raliang dǝng hapom ma dùnh, broq ònh ma qnoeq yi kàn, tah òeòeq qmau xam bài dahwèq ta aih,

¹⁹ khoe aih anoe dèh ka mahua yiang cla: Gè i qmau khoe bàc, hu acaq bàc hanam, hêq, padài beq, acaq, ôq, rai bùi hyòq diq.

²⁰ Mahaq Boc plính doe ka haq: Wùih mangai blùng, mahua yiang gè au yǝc hlài mang kô raq. Aih èh kùng hang gè khoe padon ka dàđeh qmat èh jah cabô?

²¹ Mangai leq toq ti gop òeòeq ka rađeh mahaq ùh padrǝng kan nòe Boc plính, qmang aih èh diq.”

Trong loq lèt

²² Chuaq Jesus doe dèh ka mangai tiaq hǝc: “Qmang aih, au doe ka pì, apaq crè ka kan rìh pì kô èh acaq cleq, hadai ùh dùh yùq ka chac pì kô èh caxùnh cleq.

²³ Kan rìh yeo kàn ka dahwèq acaq, chac hamac yeo kàn ka dahwèq caxùnh atàc.

²⁴ Haqmiang ngan ac: haq ùh i rai adrech, ùh i gat, hadai ùh i ka bùaq, ùh i ka hapom, mahaq dua Boc plính wèq ban haq, pì aih ajoq yeo canaq ùh hnau ka ac?

²⁵ I ka cabô oe taqne pì qmat canòm kan loq lèt majah broq ka rađeh halính tam toq bìaq ùh?

²⁶ Tàng biàc qyoh dǝng aih pì broq ùh jah, meh pì oe lèt dèh trong qnoeq?

²⁷ Ngan riang tacreo hon qmang leq? Haq ùh i abroq xalep, hadai ùh i caxènh brai, mahaq au doe ka pì: Qnhac ka bùa Salomôn ranhòm dǝng

leq, dua ùh jah caxùnh eo lem tìah ka bài riang aih.

²⁸ Wùih! bài mangai bìaq kan lùì, tàng joq bài nhat oe ta gùng aih hì kô oe rìh, hì da èh bùh ta ralùng, mahaq Boc plình oe am haq caxùnh lem qmang aih, ùh dùh dèh ka pì!

²⁹ Qmang aih, manoh cliac pì paq hèm acaq cleq, ôq cleq, ùh dùh lèt dèh trong aih.

³⁰ Majah qmang aih, wì mangai enh gùng oe ta crõng taneh kô jò leq ma ùh cadàu tiaq bài yiniq aih, èh Baq pì oe ta plình khoe loq pì nan ãeh ka bài yiniq aih.

³¹ Mahaq chaq diac Haq òeq, bài yiniq aih troq jò èh brì ka haq am tam ka pì.

³² Yôiq wì kon qyoh, apaq yùq cadèh, majah qmang aih Baq pì khoe lem manoh hu am ka pì Diac plình.

³³ Tech kùng hang pì beq hu am ka mangai ma hamoq, palauq ãòeq ka rađeh balet tah bac ma ùh hìaq loq hyah xam kùng hang canaq ùh hìaq loq racòch oe ta plình, aih nòe ùh i ka mangai atùng jah thia haten, ùh i ka hadrùng, ùh i catia kap bahech.

³⁴ Majah qmang aih kùng hang pì oe taleq, manoh cliac pì hadai oe ta aih.

Bàu pariaq thê loq hamang

³⁵ Caxi caqnam pì ep kàt, ãen bùh ãôq haq qngah yôt.

³⁶ Qmang ka magai hapõng gòm dèh wì craq hnìm hlài enh acaq yiniang, waq toq wì craq hì clôq qmang, haq khoe drah pèh qmòe carênh.

³⁷ Xôq ramot ka mangai hapǝng aih, jò wì craq hlài hnoq wì haq hmàng rìu gòm! Joq qnàng au doe ka pì, craq aih kàt dèh caxi caqnam, am mangai hapǝng hangui ti cabǝng, khoe haq hi patìh hlài ka wì.

³⁸ Joq xôq ramot am ka mangai hapǝng jò wì craq hlài hnoq wì haq rìu gòm qmang aih, yac ka jò qne mang, yac ka jò ia rǝng.

³⁹ Loq maro qmang kô! tàng joq cla wì craq hnim khoe loq jò leq i mangai atùng trùh, aih èh haq hamang òòeq hu rap, ùh dǝq mangai atùng chà da haq panàt hnim.

⁴⁰ Pì hadai qmang aih diq, hmàng gòm rap qmòe oq, majah qmang aih Kon mangai trùh wop qmòe jò pì ùh ùac ngèh.”

⁴¹ Phiero bòch: Chuaq au, bàu aliah kô Ìh anoe ka nhèn, loq ìh anoe xam mangai qnoeq?

⁴² Chuaq Jesus doe: “Cabô ma i manoh ùh hìaq gǝpla rai rabiaq ka taqmroq, craq hnim dèch haq broq mangai wèq dìq ka hapǝng ta hnim, òòeq trùh jò hu ti axong ka wì aih dahwèq acaq?

⁴³ Xôq ramot ka mangai hapǝng aih jò wì craq wìh hlài, hnoq haq broq qmang aih!

⁴⁴ Joq qnàng au anoe ka pì, aih èh craq hnim am haq wèq dìq kùng hang ta hnim.

⁴⁵ Mahaq tàng joq mangai hapǝng aih hèm dèh ta manoh: Craq au oe dùnh men trùh, èh haq ti jêh bàì mangai hapǝng calô, hapǝng cadri, rai acaq ôq bù bia,

⁴⁶ aih èh craq haq trùh wop hì haq ùh tangèh, wop qmòe jò haq ta ùac, yǝc long roe blai haq hyah hyoch ka akia, khoe aih cađac haq oe moeq

qmang ti bài mangai manoh gôpla.

⁴⁷ Mangai hapǝng kô khoe loq ka manoh cla wì craq, mahaq ùh padon ùh broq tiaq manoh aih, haq jah jìq yeo bàc.

⁴⁸ Yàng mangai hapǝng ma ùh qnì ka manoh cla wì craq, haq broq ùh troq ka manoh wì craq, aih èh jah jìq yeo biaoq. Majah qmang aih mangai leq khoe jah am yeo bàc, aih èh wì craq bòch hlài yeo bàc, mangai leq khoe jah jao yeo bàc èh wì craq bòch hlài yeo bàc hòm.

Bàu hnài qnoeq hòm

⁴⁹ Au khoe trùh hu caqnìh ùnh ta crǝng taneh, tàng joq haq khoe jah cheo cadèh, aih au oe tangèh cleq loe ka aih hòm!

⁵⁰ I moeq baptem au ep pòq, au mangò xalep oe i jaq cleq men trùh hì baptem aih jah gèh!

⁵¹ Pì xoh au trùh au trùh hu aràng kan catèm ka crǝng tanenh qmòh? Au anoe ka pì: ùh! mahaq aràng kan talah.

⁵² Majah qmang aih, pang kô ta èh, tàng padam ngai oe pajùm moeq hnìm, bài aih èh talah ka dabau, piq ngai tablêq ka baiq ngai, baiq ngai tablêq ka piq ngai,

⁵³ baq tablêq dèh ka kon calô, kon calô tablêq dèh ka baq, miq tablêq dèh ka kon cadrì, kon cadrì tablêq dèh ka miq, yaq tablêq dèh ka kon mai, kon mai tablêq dèh ka yaq."

⁵⁴ Haq doe ka bài mangai bàc ta aih: "Jò pì hnoq yùc yòng enh apah mat mahì clih, pì doe: Hì kô èh loq i mè, èh joq qnàng qmang aih.

⁵⁵ Èh i cayeo hlui enh pah qma mat mahì loh pì doe: Hì kô èh tôq, èh joq i qmang aih.

⁵⁶ Wùih! bài mangai patìah toq enh gùng tau! Pì loq hadro ngan ta trốc, hadro ngan ta taneh, òq hagleq pì ùh qnì hadro ngan qnhòng kô?

⁵⁷ Hagleq cla pì ùh ti ngan deh trong leq ma taq ataq?

⁵⁸ Qmang aih, jò pì lam ti bài mangai ma qnoh pì tanòe hadrah, roc trong drah àu hatroq ka wì, yùq èh wì dùì pì trùh enh ngèa cwan hadrah, cwan aih qmùt pì tanòe cwan wèq hnim cadrong, cwan aih clèh pì.

⁵⁹ Au doe ka pì: Pì caqnaih yac ka oe pòq moeq hliac raq dua pì qnhòq jah loh enh aih”.

13

Bài mangai Galili wì mà jêh đac

¹ Hadaì jò aih raq, i bài mangai anoe hlài ka Chuaq Jesus loq Philat khoe jêh đac toq leq ngai Galili, yòc mahim clai ta ngè tadreo.

² Chuaq Jesus doe ka wì haq: “Pì xoh đeh bài mangai Galili aih broq yiniq lui cleq yeo qmèq ùh hnau ka mangai Galili qnoeq qmòh, dài wì majah glàm kan haño qmang aih?

³ Au doe ka pì loq: Ùh xài, mahaq tàng pì ùh qnì raxach, èh đìq ka pì hanoh lùng pac qmang aih đìq.

⁴ Tàng ùh qmang aih, moeq jàt rahem ngai cachit ka hnim haqnhèq Siloê tuc, aih pì hèm wì haq broq yiniq lui yeo qmèq ka mangai oe ta Jêrusalem qmòh?

⁵ Au doe ka pì: Ùh! Mahaq tàng pì ùh raxach, đìq ka pì hadaì cachit lùch qmang aih èh.

⁶ Khoe aih haq hi aliah bàu kô: “I moeq ngai pìt dèh ta wuàn pìlì nho moeq xèm long póc, haq loh chaq git pìlì ta aih mahaq chaq ùh lòm hnoq,

⁷ Haq doe ka bài wì mangai pìt nho: Khoe piq hanam au loh git pìlì nòe xèm long póc kô mahaq ùh lah i qmòe pìlì, kau cađac long qmat, gleq majah ðòeq haq tawac ngwan toq ka taneh?

⁸ Mangai pìt nho padreo bàu: Wì craq, ìh ðòeq tam moeq hanam kô hòm, dōq au bōc dudan taxèm haq khoe aih tah phàn.

⁹ Broq braiq atìq èh haq loh pìlì, ùh qmang aih èh ìh hi koh cađac.

Haqnauq brêh ka mangai yiniq ta hì Sabat

¹⁰ I moeq hì sabat, Chuaq Jesus mùt hnài tanòe hnìm tagop qyoh.

¹¹ Ta aih i moeq ngai gucadrì, loh ka pen khoe moeq jàt rahim hanam, majah qmang aih kiác rùp baxa haq. Haq kōc crōng ùh jah yòng ka qnhoh.

¹² Bu hnoq haq, Chuaq Jesus khoe creo doe: “Yôiq! mangai gucadrì tau, ìh khoe jah brêh ka yiniq”,

¹³ Chuaq Jesus hi yōc tì bèq chac haq. Tajòe hloe, haq aih jah yòng cajang, rai dèch bàu manè apôi Boc plình.

¹⁴ Jò aih, mangai wèq hnìm tagop qyoh hnoq Chuaq Jesus broq brêh ka mangai yiniq ta hì sabat, haq aih tapoch hloe ka mangai bàc ta aih: I tadràu hì hu abroq, pì trùh ta bài hì aih ðòeq hu jah broq brêh ka yiniq ùh hrōc, ùh dùh trùh dèh hì sabat.

15 Mahaq Chuaq Jesus têu haq: “Wùih! Mangai patiah toq enh gùng tau, hì sabat pì ma ùh caqnaih òo, caqnaih lùah loh enh cadrong hu tiaq aràng haq lam ôq diac qmòh?”

16 Kon cadrì da Apraham kô, satan khoe rùp kàt haq moeq jàt rahim hanam, ta hì sabat ma ùh khòh lêh caqnaih haq qmòh?”

17 Haq tapoch qmang aih bài mangai ma tagit ka haq loh dõng ka camaih, yàng da mangai bàc ta aih lem bùi ka trong halac haq khoe broq.

Adrech habài xam blo cadroh

18 Chuaq Jesus doe: “Diac Boc plình qmang leq, au yõc cleq hu aliah?”

19 Diac aih tiàh ka moeq pliang clong habài, i moeq ngai aih haq rai deh ta wia, jah hon hì wia long kàn, chìm trùh broq pù ta hamenh haq.”

20 Haq anoe hòm: “Au aliah diac Boc plình ti cleq kô hòm?”

21 Diac aih tiàh ka blo, i moeqngai gucad rì yõc jràu ta piq cađap dác, trùh dèh jò dác hì rêu dõng.”

Qmang haqnop

22 Khoe aih Chuaq Jesus tõi ta Jêrusalem, haq lam pagat enh bài plài qyoh trùh plài kàn, rai lam haq hnài wì.

23 I mangai bòch haq: Waiq Chuaq! Ajoq toq biaoq ngai raq ma jah dèch qmòh?

24 Haq doe ka wì: “Ep ran diq ka paden òoq àu mùt ta qmang chit, majah qmang aih au doe ka pì, bàc ngai àu chaq trong hu mùt mahaq ùh jah.”

25 Jò cla wì craq ta hnìm yòng clenq qmang, pì yòng enh gùng clòq qmang rai creo: waiq Chuaq!

pèh ka nhèn qmang diq. Mahaq cla wì craq doe: Au ùh qnì ka pì trùh enh leq.

²⁶ Jò aih èh pì doe: Nhèn khoe acaq, khoe ôq pajùm ti ìh, ti trong ti chòq ìh khoe hnài nhèn.

²⁷ Mahaq wì craq doe hòh: Au doe ka pì, au ùh qnì ka pì trùh enh leq, dìq dǝng bài mangai broq dù tau, drah wia dǝng ma khoe ka au beq!

²⁸ Jò aih èh, pì hnoq Apraham, Ysac xam Jacôp hloe xam dìq dǝng bài mangai pajàu tanòe diac Boc plình, mahaq pì èh jah khwênh qnoh cađac enh gùng, tanòe aih toq crò hmoe xam cadrit hanenh.

²⁹ Yàng èh, enh gùng mahì loh, enh gùng mahì mùt, enh gùng pah qma, enh gùng pah qngeo, wì trùh hangui ta aniang hu acaq yiniang ta diac Boc Plình.

³⁰ Aih èh, i mangai atìq jah loh angoe, mangai adroe jah loh ka atìq.”

Herôt enh jêh đac Jesus

³¹ Hadai jò aih, i mangai Pharisi lam doe ka Chuaq Jesus: ìh pì dùh oe tacô chaq lam taqnoeq beq, Herôt enh jêh đac ìh,

³² Chuaq Jesus padreo bàu: “Lam anoe ka chôn aih: Hì kô, hì da èh, au oe drùh hnan kan kiac rai broq brêh kan hiniq tôq, trùh hì mòe, aih èh qnhòng rìh da au hi dìq.

³³ Mahaq hì kô, hì da èh, xam hì mòe au ep lam, majah qmang aih wìa ka mangai pajàu ma cachit enh gùng ka Jêrusalem.

³⁴ Wùih! Jêrusalem, Jêrusalem, gè jêh cađac bài mangai pajàu, yǝc hmo hibùq bài mangai wê bàu trùh ti gè, bàc yàng au enh hacom haqmon

pì qmang ka ia kan creo àm dèh kon ta panan, mahaq pì ùh waq!

³⁵ Kô èh, hnim pì wìa hnim catù. Au doe qmòe ka pì, kô èh pì pi hnoq au hòm trùh hì ma hì doe: Xôq ramot am ka Mangai trùh enh dalam ka Yiniq Chuaq.”

14

Jesus acaq ta hnim mangai Pharisi

¹ I moeq hì sabat, Chuaq Jesus mùt acaq ta hnim mangai gucraq Pharisi, bài mangai ta aih ti achop ngan haq.

² I moeq ngai liu ten padah oe enh ngèa haq.

³ Chuaq Jesus bòch mangai Pharisi xam mangai hnài ranenh: “Tiaq qmang ka ranenh ta hì sabat akhòh broq brêh ka mangai yiniq, loq ùh khòh?”

⁴ Mahaq wì oe hatinh ùh padreo bàu. Chuaq Jesus dèch mangai yiniq yòng, broq brêh ka haq, khoe aih thê haq hlài.

⁵ Khoe aih haq bòch wì: “taqne pì qmat i ka mangai leq wop hì sabat, i dèh moeq ngai kon lô qyoh, tàng ùh meh i dèh moeq toq bo clih ta ralùng, pì ma ùh drah loh dèch qmòh?”

⁶ Trong aih wì têu ùh jah.

⁷ Jò haq hnoq bài mangai ma jah akhen trùh acaq ta aih, wì toq ràih ka rađeh nòe haqngui ma haqnèq ranhòm, haq hì aliah ka wì:

⁸ “Jò wì akhen ka ìh trùh acaq yiniang ोंg mai, apaq ràih hanqgui nòe rahù, tabeq i tamoe ma yeo kàn ka ìh.

⁹ Mangai akhen lam doe ka ìh: Dôq haq meh hangui ajang kô, aih ajoq ìh xep ka raðeh ep loh hangui enh qneq qmòh.

¹⁰ Mahaq jò ìh jah akhen, ìh hangui ðeh enh nòe haqneq raq, aih èh cla wì craq trùh, haq doe ka ìh: Ê daq! tóç hangui enh qnhèq kô. Aih ajoq broq bàc ngai hadai jah akhen jah ta-iu ka ìh.

¹¹ Qmang aih cabô padèch raðeh, haq aih èh jah qnoh haqneq, mangai leq paqnoh raðeh haqneq, haq aih èh jah dèch atóç”.

¹² Khoe aih Chuaq Jesus anoe ka mangai ma akhen ka haq: “Jò ìh i yiniq akhen wì acaq ôq qne hì qnì, di xèq qnì, apaq akhen toq deh ka bua, ðeh ka oh daq calô, oh daq cadrì, xam wì plài pla ma kan padrông, yùq èh wì loq akhen hlài ka ìh òeòeq hu caqnaih dòeh.

¹³ Mahaq jò ìh i yiniq acaq ôq, akhen ka mangai pa, mangai angwenh, mangai liap, mangai lua mat,

¹⁴ aih èh majah xôq ramot. Hilôq wì haq ùh hlàt akhen hlài ka ìh, mahaq trùh jò mangai taq atoq jah rìh hlài, aih èh hi jah padreo hlài ka ìh.”

Aliah trong acaq yineang kàn

¹⁵ I moeq ngai hangui acaq moeq qmang ti haq, tàng bàu aih hi tèu: Xôq ramot am ka mangai ma jah acaq bèngh tanòe diac Plình!

¹⁶ Mahaq Chuaq Jesus padreo bàu rameh “I mangai aih haq padon yineang kàn, akhen ka bàc ngai lam acaq.

¹⁷ Trùh jò acaq, thê dèh hapông lam anoe ka bài mangai ma khoe jah akhen: Trùh beq, rìm yiniq òiq khoe jah padon.

18 Mahaq dìq dǝng ka wì pajùm moeq bàu hangah. Mangai baxèm doe: Au i rot moeq haqnech ruàng, ep lam ngan, apaq da yo oq.

19 Mangai qnoeq doe: Au i rot moeq jàt toq ò, au ep lam ngan qmang leq cadèh, apaq da yo oq.

20 Mangai maqnoeq hò m doe: Au neo yǝc mai, au lam ùh jah.

21 Mangai hapǝng wìh hlài anoe dèh ka wì craq. Khoe aih craq hnim aih plǝh nòeh, thê dèh hapǝng: “Drah loh roc trong, roc hanom taplài, aràng bài mangai pa, mangai angwenh, mangai lua xam mangai cwê mùt tacô.”

22 Khoe aih, hapǝng anoe: Wì craq bàu ìh thê nhèn khoe broq, mahaq nòe rah oe raq bàc.

23 Mangai craq hnim doe deh ka hapǝng: “Loh lam roc plài roc gùng, hnoq mangai leq, pa-àu wì mùt, aih dǝq haq bình ka hnim au.

24 Majah qmang aih au doe ka pì: Dìq dǝng ka mangai ma khoe jah akhen adroe, aih ùh i mangai leq ma oe jah acaq yiniang ta hnim au”.

Đòeq tajì ka jah tiaqJesus

25 I bài mangai bàc haraya lam ti tiaq, haq hwi ngan wì aih rai doe.

26 “Tàng joq i mangai leq trùh ti au mahaq ùh git deh ka miq baq, cadrì, kon, oh daq cadrì, calô, git hloe kan rìh deh cla, haq aih ùh jah broq mangai tiaq hǝc au.

27 Mangai leq ùh xùì deh long pagat tiaq au mangai aih hadai ùh wìa broq mangai tiaq hǝc au.

28 I mangai leq oe taqne pì enh broq moeq toq hnim haqnhèq kàn. Ma ùh joq baxèm aih haq

hangui òeq hu ngan òeq toq leq, òeq ngan rađeh atàu bac òeq pagêh hnim aih ùh?

²⁹ Majah qmang aih jò haq khoe broq xèm èh ùh lênh gêh ka chac hnim, aih rìm ngai hnoq ajoq wì loq do,

³⁰ wì doe: Mangai kô khoe broq, mahaq ùh lênh gêh”.

³¹ I ka bùa leq lam tajêh ka bùa qnoe, ma ùh dùh hangui hatình ngan òeq, òeq ngan rađeh qnung moeq muàn lình, ahlàt tablêq ka bùa tau ma wê baiq muàn lình loq ùh?

³² Tàng joq haq hnoq đêh ùh blêq, jò bùa tau oe raq hangai haq khoe thê deh mangai hadrah chôn timer òeq ti alia aclai chaq trong hatroq.

³³ Hadai qmang aih, tàng joq pì ùh cađac dèh rìm yiniq pì ma i, pì ùh jah broq mangai tiaq hóc Au.

³⁴ Boh aih lem, mahaq tàng haq hnhung dèh kan xang, aih yóc cleq broq dōq haq xang hlài hòm?

³⁵ Yac ka qnoh ta ruàng dua pì wìa, broq phàn dua piloh cleq; wì ep ùc qnoh cađac enh gùng. Cabô i don tamàng, drah tamàng beq!”

15

Bầu aliah trùh: kon trùu hnhung, bac hnhung

¹ Dìq dōng ka bài mangai yóc thèq xam bài mangai i yiniq lui thia haten ka Chuaq Jesus hu tamàng bầu haq hnài.

² Mahaq mangai Pharisi xam bài mangai hnài ranenh, bahech ka dabau: Mangai kô òeq toq bài mangai i yiniq lui rai acaq moeq qmang ka wì!

³ Haq hi aliah ka wì:

⁴ “Taḡne pì qmat, mangai leq ma i moeq hrinh toq trùu mahaq hnhung moeq toq raq, haq ma ùh òòeq dèh hachìn hachìn toq oe tanòe hawit, òòeq hu chaq trùu ma hnhung aih waq qmòe ka hnoq qmòh?

⁵ Èh jò khoe hnoq, haq bùi pi cajaq, binh dèh trùu aih taplêh;

⁶ hlài ta hnim. Khoe aih, haq creo deh ka bài bua xam wì plài, haq doe: Beq lem bùi ti au, majah qmang aih kon trùu au ma hnhung, au chaq hoe hnoq deh.

⁷ Au doe ka pì: Hadaì qmang aih diq, ta plình lem bùi jò moeq ngai i yiniq lui loq raxach, ùh hnau ka hachìn jàt hachìn ngai taq atoq ùh ep raxach.

⁸ Patiah haq, i moeq ngai gucadrì i moeq jàt hliac bac, hnhung moeq hliac bac raq, haq ma ùh bùh òen, hwit hnim rai chaq qmòe ka da adia waq qmòe ka hnoq qmòh?

⁹ Èh trùh jò haq chaq khoe hnoq, haq creo deh ka bua xam wì plài haten, haq doe: Lem bùi ti au beq, majah qmang aih bac au ma hnhung au chaq khoe hnoq.

¹⁰ Au doe ka pì: Enh ngèa bình plình Boc Plình hadaì qmang aih, wì lem bùi ka mangai i yiniq lui loq raxach.”

Kon calô loq racaih

¹¹ Haq anoe hòm: “I moeq ngai tau haq i baiq ngai kon calô.

¹² Mangai kon ma qyoh doe deh ka baq: Baq, hang leq ma axong ka au, am da au. Mangai baq hi axong deh kùng hang am ka wa kon.

¹³ Atiq ka aih biaq hì, mangai oh yǒc dǒng deh kùng hang, lam ka hangai, ta aih, haq rìh loh ka pi wìa cleq, acaq racaih hreo dǒng deh kùng hang.

¹⁴ Jò haq racaih khoe dìq dǒng kùng hang, gùng aih i kan pangot kàn, haq loh ka nan pa,

¹⁵ haq hì lam patìh ka wì gùng aih, wì thê haq lam ban chùà tagùng.

¹⁶ Haq enh yǒc ðeh caqnah tòh ðòeq chem chùà hu acaq ðeh ka panàc, mahaq dua wì ùh am.

¹⁷ Jò aih haq men cadrat don, haq doe: Ta hnim baq au, oe i jaq cleq mangai patìh jah acaq ùh dìq ùh dài, tacô aih au cachit ka hrah.

¹⁸ Au kô èh yǒng hu wìh hlài ðeh ta baq rai anoe ka haq: Baq! Au khoe broq yiniq lui ka plình xam ka ìh.

¹⁹ Au pi oe wìa creò kon ìh hòh, ìh ngan au tìah ka wì ma patìh ka ìh dìq.

²⁰ Haq hì padình yǒng hlài ðeh ta baq. Jò oe raq enh hangai, hnoq deh kon baq haq tadèch qmòe nòeh, tùh loh yǒc tì kwat ðeh kon raih hìp haq.

²¹ Haq doe deh ka baq: Baq! au khoe i yiniq lui ka trǒc ka ìh, pi oe wìa ka creò kon ìh hòh.

²² Mahaq baq haq doe ka ðài mangai hapǒng: Rênh haq! Dra h aràng eo ma dìq jaq lem caxùnh am ka haq, asràng nhàn ajang hadrang tì haq, tǒc ka haq jep.

²³ Dra h rùp kon ðo ma bit lem hu broq jam. Beq! bèh acaq lem bùi,

²⁴ majah qmang aih kon au kô khoe cachit ma-haq manòeq khoe rìh hlài, khoe hnhung mahaq manòeq kô khoe hnoq hlài. Khoe aih, dìq ka wì hì lem bùi.

²⁵ Jò aih, mangai daq ramua qnang oe ta gùng. Jò haq hlài ten trùh hnim, tàng atêh broc tàng bàu calêu,

²⁶ haq hi creó ka moeq ngai hapǝng hu bòch ngan i yiniq cleq.

²⁷ Hapǝng aih padreo bàu: Oh ìh khoe hlài, aih ìq baq ìh majah khoe bùh kon ðo bit, majah qmang aih, hnoq oh ìh hlài jah tadêh.

²⁸ Mangai kon ramua plòh nòeh, pì waq mùt ta hnim. Baq haq hi loh padô haq mùt.

²⁹ Mahaq haq doe: Ngan kô, au patìh ka ìh khoe toq leq hanam, qnhòq lah i yàng leq broq ùh troq ka manoh ìh, aleq ìh malah am ka au moeq toq kon bubi qyoh au hu acaq lem bùi deh ti bua.

³⁰ Yàng manòeq kô, kon ìh mangai ma khoe racaih dǝng kùng hang ìh ti bài gucadrì haðoh, manòeq haq wìh hlài aih ìh bùh qmòe kon bo bit.

³¹ Baq haq doe: Akon! Kon oe yòt ti baq, dìq dǝng kùng hang baq aih xài kùng hang kon.

³² Mahaq bèn joq khòh acaq yiniang lem bùi, majah qmang aih oh kon khoe cachìt mahaq manòeq khoe rìh hlài, khoe hnhung mahaq khoe hnoq hlài.”

16

Mangai wèq kùng hang

¹ Chuaq Jesus anoe hòh ka bài mangai tiaq hǝc “Mangai padrǝng tau i moeq ngai hapǝng wèq da haq kùng hang, i wì lam anoe ka haq: Wì craq! haq aih racaih dǝng hang wì craq.

² Aih wì craq hi creó ka mangai aih mùt rai bòch: Ìh broq cleq! hagleq au majah tàng wì anoe

qmang aih ìq? Ìh wèq kùng hang qmang leq, anoe beq! Majah qmang aih, pang kô èh ìh pì oe jah wèq kùng hang au hòm.

³ Mangai wèq kùng hang aih hèm: Wì craq pì am au broq hòm, broq qmang leq kô èh? abèq ruàng au ùh i ka padren, lam chaq acaq aih camaih hrìn.

⁴ Au khoe loq broq qmang leq, òòeq jò wì craq pì am broq, oe i mangai òh ahlài au ta hnim.

⁵ Haq hi creò ka tang ngai pòq òòeh wì craq trùh, haq bòch mangai adroe: Ìh pòq òòeh craq au toq leq?

⁶ Mangai aih doe: Moeq hrinh thùng dầu. Mangai wèq kùng hang thê: Drah yóc jàiq hangui aqmat achìh beq: Padam jàt.

⁷ Èh haq bòch mangai tau: Ha ìh qmat pòq òòeh craq au toq leq? Haq padreò bàu doe: Moeq hrinh ateo qmau. Mangai wèq kùng hang doe: Drah achìh jàiq òòeh: Rahem jàt.

⁸ Craq haq hi manè mangai wèq kùng hang loq gôpla trong haq rabiaq ka broq qmang aih. Majah qmang aih kon da qnhòng kô yeò rabiaq ùh hnau ka kon da kan qngah trong taqmùt ti dabau.

⁹ Au anoe ka pì: Yóc ma òiq ka hang gôpla aih hu taqmùt chaq bua beq, òòq jò hang aih khoe òiq, wì hu òh qmùt pì tanòe oe hloe.

¹⁰ Mangai leq ùh tablòq manoh trong yiniq qyoh, haq aih hadai ùh tablòq manoh trong yiniq kàn, mangai leq gôpla trong yiniq qyoh, hadai gôpla trong yiniq kàn.

¹¹ Qmang aih tàng kùng qnhòng kô, pì khoe ùh òiq ka manoh, aih èh cabô ma tùt am ka pì wèq

kùng hang joq qnàng ta diac plình?

¹² Tàng joq khoe pì wìa ka lùì pì trong kùng hang mangai qnoeq, aih cabô oe dōq pì jah wèq deh kùng hang cla?

¹³ Òh i ka hapōng leq jah patìh ka baiq toq craq, majah qmang aih haq loq waq ka mangai kô mahaq git ka mangai tau, òq manoh ka mangai kô mahaq hnoq mangai tau òh loh cleq. Pì òh jah broq hapōng Boc hlinh rai broq hapōng Mamôn hòm.”

¹⁴ Mangai Pharisi aih bài ma plai ka bac jèn, tàng òq bàu aih, wì haq halê Jesus.

¹⁵ Haq tapoch ka wì: “Pì broq deh taq atōq dōq mangai qnoe òh qnì, mahaq Boc plình loq ka manoh pì, majah qmang aih trong leq kon mangai pì hnoq òh lem, aih kan amùà ramòt enh ngèa ka Boc plình.

¹⁶ Ranenh xam bàu pajàu trùh pang qnhòng da Jon raq hi òq, pang aih Bàu lem diac da Boc Plình jah anoe qnoh, mangai leq mangai meh ep àu òq ka padren hujah mùt ta aih.

¹⁷ Plình crōng taneh kô hnhung yi hlàu òh hnau ka cađac moeq chù, moeq teo yi qyoh ta hset ranenh.

¹⁸ Cabô cađac deh mai lam yōc cadrì qnoeq, mangai aih pòq yiniq lui tango, mangai leq yōc gucadrì ōng haq cađac, hadai pòq yiniq lui tango.

Mangai padrōng sam Laxaro

¹⁹ I moq ngai padrōng kan, caxùnh toq eo gòh drinh broq xi bai lem, rìm hì rìh acaq oe ta kan rahù.

²⁰ I moeq ngai pa yiniq haq Laxaro, kùì ajang qmang ngo mangai padrǒng aih, tachac haq xia đǒng kan talêh bachùng.

²¹ Haq toq ngèh đêh jah toch acaq chiac bài cràc taclih enh cabǒng mangai padrǒng, hadai i koq liah da haq rahenh.

²² Trùh jò mangai pa cachit, bình plình aràng haq qmút oe ta achong Apraham. Mangai padrǒng hadai cachit, wì lam catùh.

²³ Mangai padrǒng oe tanòe mangai kachit, qnang chiùq salep, enh hangai haq qngoc ngan, hnoq Laxaro oe ta achong Apraham,

²⁴ haq drah creo cadêh: Apraham kan cadraq au! Ha-och ka au diq, thê Laxaro lùac hadrang tì tadiac đòeq broq ka rapet au jah hangèp đêh toq biaq, majah qmang aih au tôq lep pì cajaq ta ùnh kô.

²⁵ Mahaq Apraham doe: A kon! Hmàng hlài beq, jò oe rìh kon khoe jah waq deh kan lem, yàng Laxaro aih glàm toq trong qmèq, Yàng manòeq oe tacô haq jah alòng, da kon jah oe tanòe baxa.

²⁶ Qnah hòm, ta adreo bèn i moeq toq kòe jrùq, yac ka i cabô oe pah kô enh tǒc pah qmat dua ùh jah, cabô enh pah qmat enh tǒc pah kô hadai ùh jah.

²⁷ Mangai padrǒng aih anoe: Kan cadraq au! Ìh thê Laxaro lam ta hnim baq au,

²⁸ majah qmang aih au i padam ngai oh daq, đòeq haq doe ka wì loq yiniq kô, tàng ùh qmang aih, yùq èh wì hadai loh tanòe xalep kô diq.

²⁹ Apraham padreo bàu: Wì haq khoe i Môise xam bòe pajàu, wì haq ep tamàng bàu wì aih.

³⁰ Mangai padrǒng anoe: Apraham kan cadraq

au, ùh xài qmang aih, tàng joq i mangai cachit rìh hlài trùh ta wì haq, aih èh wì haq hi raxach.

³¹ Mahaq Apraham doe tàng joq ùh tamàng Môise xam bài pajàu, yac ka i mangai cachit rìh hài, dua wì haq ùh lùì”.

17

Bòe bàu hnai maqnoeq

¹ Chuaq Jesus doe ka magai tiaq hóc: “Bài yiniq òeòeq broq ka mangai qnoeq catoeh tacro aih ùh jê, mahaq haño ka rađeh mangai ma broq trong aih.

² Tàng joq mangai leq broq ka moeq ngai kon mangai qyoh kô cro ta yiniq lui, yóc apau hmo kát ajang ranǎng haq aih hu khwênh caqnìh cađac ta điac raxìq aih xan ka ùh hnau hòm.

³ Pì ep wèq rađeh. Tàng joq i oh daq ìh broq yiniq lui ka ìh, drah tagàih ka haq, tàng joq wì haq loq raxach, drah cađac yiniq lui ka wì haq.

⁴ Yac ka moeq hì, wì loh yiniq ka ìh tapèh yàng, tapèh yàng wì haq wìh hlài doe: Au raxach, aih drah caqnaih yiniq lui wì haq.

⁵ Bài mangai tiaq cla doe ka haq: Tam ka nhèn manoh lùì.

⁶ Chuaq Jesus doe: “Tàng joq pì i manoh lùì qyoh budàng clong habài, pì doe ka long pôn kô: Tabùiq enh kô hu loh pít tadiac raxìq chàm, aih dua haq iu bàu

⁷ Taqne pì qmat i mangai leq i hapǎng lam kai ruàng, lam ban trùu, jò haq hlài enh gùng pì doe ka haq: Drah thia hangui tacô hu acaq qmòh?

⁸ Ma ùh xài pì thê haq: Padon ka au acaq, kàt caxi caqnam patih ka au hòeq, trùh jò leq au hêq ka acaq, khoe aih pì hi acaq diq qmòh?

⁹ Hapông iu tiaq bàu, craq haq i ep cleq ka manè haq?

¹⁰ Pì hadai qmang aih, jò broq gêh trong thê pì broq, pì doe rameh: Nhèn kô ãai hapông ùh loh cleq, nhèn broq toq trong nhèn ma ep broq.”

Mòeq jàt ngai bacùn

¹¹ Manòeq Chuaq Jesus qnang lam trong tồc ta Jêrusalem, Haq lam tiaq roc acang taqne gùng Samari xam gùng Galili.

¹² Wop jò haq mùt taplài aih, i moeq jàt ngai bacùn ãih haq, wì haq yòng enh hangai,

¹³ wì creo: Wì craq! ha-och ka nhèn diq.

¹⁴ Jò bu hnoq wì aih, Chuaq Jesus doe: “Lam beq! lam patô rađeh ka ãai pajàu.” Jò wì aih qnang lam, diq ka wì haq jah brêh.

¹⁵ I moeq ngai, hnoq rađeh jah brêh, haq wìh hlài, rai dêh bàu manè apôi Boc plình;

¹⁶ mangai aih caqnìh rađeh ajang jènh Chuaq rai manè haq. Kô aih mangai Samari.

¹⁷ Chuaq Jesus bôch: “Ùh xài moeq jàt ngai jah brêh dồng qmòh? Hachìn ngai tau taleq hòem?”

¹⁸ Hagleq ùh i moeq ngai leq wìh hlài manè apôi Boc plình enh gùng ka mangai diac wì kô”.

¹⁹ Khoe èh, haq doe ka mangai aih: “Yòng lam beq! manoh lùì ìh khoe broq ìh brêh lem.”

Jò diac plình trùh

²⁰ Mangai Pharisi bôch Chuaq Jesus jò leq diac Plình ma trùh, haq padreo bàu “Diac plình trùh ùh tìah ka yiniq jah hnoq xam mat,

21 ùh i cabô jah doe: Oe tacô loq oe hatau, majah qmang aih diac plình oe ta pì.”

22 Haq doe deh ka mangai tiaq hóc: “Kô èh i jò pì ma tangèh jah hnoq ðeh mòeq hì da Kon mangai, mahaq ùh jah.

23 Èh i wì doe ka pì: Haq oe tacô loq oe ta tau, mahaq apaq lam, paq tiaq wì.

24 Majah qmang aih tiaq ka camlet enh caqnàm plình kô trùh ta caqnàm plình tau qmang leq, Kon Mangai trùh dèh hì cla haq hanoh qmang aih.

25 Mahaq adroe aih, Kon mangai ep xalep bàc trong, èh kon mangai qnhòng kô kwaih ùh waq ðac haq.

26 Biac ma khoe loh ta hì Noê nèh qmang leq, hì da Kon Mangai trùh hadai qmang aih:

27 Wì acaq, ôq, ban ổng, yóc mai, trùh hì Noê hì mùt ta boang, diac kàn trùh, palùng ðiq ðồng phù cròng.

28 Yiniq ma khoe loh ta hì da Lot nèh hadai, wì acaq ôq, wì tapadro, wì pìt, wì broq hnim.

29 Mahaq hì Lot loh khoe enh gùng Sôđom, aih i mè ngia ùnh cìh enh plình jêh ðồng mangai ta plài aih.

30 Hì Kon mangai loh hadai qmang aih.

31 Hì aih èh, cabô oe ta kùa po, i dahwèq ta hnim, ùh dùh loh qnhon, cabô oe tagùng, hanoh ùh dùh wìh hlài dèh.

32 Hmàng hlài cadri Lot beq!

33 Mangai leq chaq trong hu dèch dèh kan rìh, aih èh hnhung, mangai leq cađac deh kan rìh, aih èh jah yóc hlài.

34 Au doe ka pì, mang aih, baiq ngai kùì moeq

aniang, mòeq ngai jah dèch atóc, mòeq ngai rong òòeq hlài.

³⁵ Baiq ngai gucadri pèh pajùm mòeq toq apau qmau, mòeq ngai jah dèch atóc, mòeq ngai jah rong òòeq hlài.

³⁶ Baiq ngai gucalô oe tagùng, mòeq ngai jah dèch atóc, mòeq ngai jah rong òòeq hlài.”

³⁷ Mangai tiaq hóc bóch: Chuaq nhèn! yiniq aih èh loh taleq? Haq padreo bàu: “Taleq i hanang cachit, cliang kèn tagop dabau ta aih”.

18

Bàu aliah trùh kwan hadrah ùh taq atoq

¹ Chuaq Jesus aliah ka mangai tiaq hóc mòeq yiniq, dòq wì loq ep waiq khàn yôt, ùh dùh tagah lep:

² Tagùng aih, i mòeq ngai cwan ùh yùq ka Boc Plinh, rai ùh camaih qmòe ka cabô.

³ Tagùng aih hadai i mòeq ngai gucadri hadrô, trùh anoe ka cwan: Au canòm chiac ka ìh, hadrah taq atoq am ka au xam mangai tagit ka au.

⁴ Cwan aih ùh tamàng khoe dùnh. Yàng khoe ka aih haq hèm: Hiloq ka au ùh yùq ka Boc plinh, ùh camaih qmòe ka cabô,

⁵ mahaq mangai gucadri kô lam pangài yôt qmòe ka au, hêq au tamàng dõng ka haq kan taq atoq, dòq haq pi hìaq trùh yôt broq ka au loh qmòe ka jìq gàu.

⁶ Khoe aih, haq bóch wì: “Pì atàng bàu cwan hadrah ùh taq atoq aih khoe anoe cleq ùh?”

⁷ Qmang aih yilaiq Boc plinh ma ùh hadrah taq atoq ka mangai ma khoe jah ràih, aih bài mangai

dahì damang toq creó dang haq, wìa ka haq xòe ka trùh hu dèch wì aih qmòh?

⁸ Au doe ka pì: Haq drah rênh tamàng kan taq atóq ka wì. Mahaq èh jò Kon mangai hi trùh haq i hnoq manoh lùì oe ta crông tanèh loq ùh?

Aliah ka mangai Pharisi sam mangai yǒc thèq

⁹ Haq aliah bàu kô ka bài mangai loq doe raðeh taq atóq èh hnoq mangai qnoeq ùh loh cleq:

¹⁰ “I baiq ngai tǒc ta hnìm kùh waiq hu waiq khàn: mòeq ngai Pharisi, mòeq ngai yǒc thèq.

¹¹ Mangai Pharisi yòng waiq khàn ta manoh qmang kô: Waiq Boc plình, au manè apôi ìh, majah qmang aih au ùh hìaq tìah ka wì qnoeq: loq atùng, broq dù, loq tango, ùh hìaq tìah ka mangai yǒc thèq meh.

¹² Mòeq tuàn au apàm ka acaq baiq yàng, tarìm yiniq au i, mòeq jàt phàn au dèch mòeq.

¹³ Mahaq mangai yǒc thèq yòng chiac enh hangai, haq ùh lùì qngoc taplình, haq tùc dèh rada rai anoe: Boc plình, ha-och ka au òiq, au mangai i yiniq lui!

¹⁴ Au doe ka pì, enh ngèa ka Boc plình, mangai kô wìh hlài deh ta hnìm jah kan taq atóq ùh hnau ka mangai tau. Majah qmang aih, mangai leq chaq trong padèch atǒc raðeh, aih èh jah caqnìh qnoh haqneq, mangai leq paqnoh raðeh, aih èh jah dèch atǒc ka haqnèh”.

Bòe kon qyoh

¹⁵ Wì hadai aràng bài kon qyoh trùh ti Chuaq Jesus, dòq haq yǒc tì bèq wì qyoh aih. Mangai tiaq hǒc hnoq qmang aih, hi lech ka bài mangai aràng.

¹⁶ Mahaq Chuaq Jesus crêu anoe ka wì: “Dahaq wì qyoh trùh ti au, apaq tàt, majah qmang aih mangai hatiah bài kon qyoh qmat majah diac Boc plình.

¹⁷ Joq qnàng au doe ka pì, cabô ùh waq yǒc diac Boc plình tiàh ka mòeq ngai kon qyoh, haq aih ùh jah mùt diac Plình”.

Mangai guradam padrǒng kan

¹⁸ Jò aih i mòeq ngan cwan bòch Chuaq Jesus: Mangai hnài lem, au ep broq cleq òeq hu jah kan rìh halình mòeq òeq?

¹⁹ Haq padreo bàu: “Hagleq ìh majah creò ka au mangai lem. Ùh i ka mangai leq lem enh gùng ka mòeq ngai Boc plình.

²⁰ Ìh khoe loq bài ranenh kô: Ìh apaq tango, apaq jêh đac mangai, apaq atùng, apaq wiang yòng òeq capoch dech ka mangai qnoeq. Ep i loq hèm dèh ka miq baq”.

²¹ Mangai aih doe: Dìq dǒng rìm yiniq aih au khoe wèq qmòe enh jò oe qyoh nèh raq.

²² Chuaq Jesus tàng qmang aih, hi doe ka haq: “Ìh oe raq i mòeq yiniq hòmh. Tech dǒng kùng hang ìh beq, axong am ka mangai pa èh ìh hi jah hang oe ta plình, khoe aih ìh trùh, hu lam tiaq au.”

²³ Jò tàng qmang aih, mangai radam aih loh ka mangò, majah qmang aih haq padrǒng pì cajaq.

²⁴ Chuaq Jesus ngan ta haq rai doe: “Mangai padrǒng mùt diac Boc plình joq xa.

²⁵ Lǒcđa mùt trom jrùm yeo hlàu ka mangai kan mùt diac Plình”!

²⁶ Bài mangai tàng bàu aih, wì bòch: Qmang aih èh cabô majah dèch?

²⁷ Haq padreo bàu: “Trong leq mangai broq ùh jah, aih Boc plình broq jah.”

²⁸ Phiero bòch: Hacô nhên khoe cađac òiđ đồng yiniq nhên i òeđ hu tiaq ìh, aih òh nhên jah cleq?

²⁹ Chuaq Jesus padreo bàu: “Joq qnàng au doe ka pì, mangai leq taiq diac Plình loh qmòe ka cađac deh hnìm, miq baq, oh daq, cadrì kon,

³⁰ oe ta qnhòng kô haq jah hlài yeo bàc, qnhòng atiq jah kan rih halình mòeq òeđ.”

Yàng piq Jesus anoe trùh trong haq cachit

³¹ Chuaq Jesus qnong wì mòeq jàt baiq ngai lam crài ti rađeh, haq doe ka wì: “Kô òh bèn tởc ta Jêrusalem, rìm yiniq bài pajàu ma khoe achih trùh Kon mangai òh hi jah xit.

³² Majah qmang aih wì rùp haq am ka mangai diac wì. Wì halê haq, hanip haq rai cachôh ka haq.

³³ Khoe ka wì blai haq wì hi jêh cađac haq. Trùh hì piq, haq hi rih hlài.”

³⁴ Mahaq bài mangai tiaq hỏc ùh qnì tàng, bàu aih enh anoe cleq majah qmang aih khoe cadoc ka bài mangai tiaq hỏc, dàì wì haq majah ùh qnì Chuaq Jesus anoe cleq.

Mangai lua mat oe ta Jêrico

³⁵ Jò Chuaq Jesus ten trùh ta Jêrico, i mòeq ngai lua mat hangui ti trong òeđ hu ti axìn acaq.

³⁶ Jò haq tàng i bài mangai bàc lam trong aih, haq bòch i yiniq cleq.

³⁷ wì doe ka haq: Chuaq Jesus mangai Naxaret lam trong kô.

³⁸ Haq crêu cadêh: Waiq Kon bùa Đawit, ha-och ka au diq!

³⁹ Bải mangai lam adroe lech thê haq chaq oe ma hatinh haq; yàng aih kiang haq creo yeo dên hòm: Kon bùa Đawit ha-och ka au diq!

⁴⁰ Chuaq Jesus hi yòng rai thê wì aràng mangai aih trùh. Jò mangai lua mat trùh ten jang aih, haq hi bôch:

⁴¹ “Ìh enh au broq ka ìh cleq?” mangai aih doe: Waiq Chuaq! au enh jah xau hnoq!

⁴² Chuaq Jesus doe ka haq: “Xau hnoq hlài beq! Manoh lùì da ìh khoe broq brêh ka ìh.

⁴³ Tajòe qmòe jò aih raq, haq jah xau hnoq hlài, haq hi lam tiaq Chuaq Jesus rai manè apôi Boc plình. Diq ka mangai hnoq qmang aih wì hadai manè apôi Boc plình.

19

Jesus mùt ta hnim Xachê

¹ Chuaq Jesus mùt ta Jêrico, haq pagat ti trong.

² Ta aih i mòeq ngai yiniq haq Xachê, broq gàu bài mangai yôc thêq, padrông pì cajaq.

³ Haq aih enh hnoq Chuaq Jesus aih mangai qmang leq, mahaq ùh jah, majah qmang aih mangai bàc hrinh, èh haq aih mangai đêq.

⁴ Haq cadàu adroe, heo tồc goe long pồc đòeq hu jah ngan Chuaq Jesus, majah qmang aih Chuaq Jesus lam trong aih.

⁵ Chuaq Jesus trùh ajang aih, qngoc ngan rai crêu: “Xachê! drah loh beq, majah qmang aih hì kô au mùt hnim ìh.”

⁶ Xachê drah loh qmòe ka rênh, rai ãi Chuaq Jesus rai lem bùi.

⁷ Dìq ãng mangai hnoq qmang aih, wì bahech ka dabau: Mangai kô ka doe mùt oe ta hnim mangai i tuiq.

⁸ Mahaq Xachê padinh yòng rai anoe: Waiq Chuaq! Au yỏc deh moeq haqne hang cla au hu ãoeq axong ka mangai pa, tàng joq au i broq hão ka cabô yiniq cleq ùh loe, au padreo hlài loe pôn yàng.

⁹ Chuaq Jesus doe: “Hì kô, kan ãech khoe mùt ta hnim kô, majah qmang aih haq kô hadai kon xau Apraham.

¹⁰ Majah qmang aih Kon mangai trùh hu chaq ãech mangai ma khoe hnhung”.

Aliah trùh ãac

¹¹ Jò wì oe raq tamàng bàu aih, Chuaq Jesus tam mòeq aliah ka wì hòh, majah qmang aih haq khoe ten trùh Jêrusalem, wì xoh ãeh ãiac Boc plình loh hloe draq ãrình jò aih raq.

¹² Haq doe rameh: “I mòeq ngai kon bùa lam hangai ãoeq hujah ãech broq bùa khoe èh hi wìh hlài;

¹³ haq hi crêu ãeh moeq jàt ngai hapỏng, am ka wì aih moeq jàt capiac bac, rai tanap: Yỏc ãac kô abroq ãoq haq loh tam trùh hì au wìh hlài.

¹⁴ Mahaq mangai gùng aih git ka haq, wì the mòeq mangai wê bàu atìq ka haq hu doe: Nhèn ùh enh mangai kô broq bùa wẻq nhèn.

¹⁵ Jò haq khoe jah ãech broq bùa, haq wìh hlài, crêu ka ãoe mangai khoe yỏc ãac trùh ta haq, ãoeq hu ngan mòeq ngai wì broq jah toq leq.

16 Mangai adroe trùh doe: Wì craq! ãac ìh khoe loh tam mòeq jàt capiac qnoeq hòh.

17 Wì craq doe: Joq wìa qnàng, mangai hapõng lem da au, trong qyoh ìh khoe òìq ka manoh, ìh kô èh jah wèq mòeq jàt gùng.

18 Hapõng ma hatìa trùh doe: Wì craq! ãac ìh am, au khoe broq jahtam padam capiac hòh.

19 Wì craq doe: Ìh jah wèq padam gùng.

20 Mangai qnoeq hòh trùh doe: Wì craq! Hacô ãac ìh, au khoe caxop don òòeq ta mù,

21 majah qmang aih au crè ka ìh, au loq ìh kô mangai nhang ùh palap cleq, yõc tanòe ìh ùh i òòeq, gat tanòe ùh i rai.

22 Wì craq doe: Wùih! mangai hapõng dù tau, au tiaq bàu cla ìh raq òòeq hu hadrah ka ìh, ìh khoe loq ka au mangai nhang, yõc toq taqnòe ùh i òòeq, gat toq tanòe ùh i rai,

23 hagleq ùh yõc ãac aih tah ta hnim padro ãac? jò au hlài au hu yõc dèh xam xèm xam goe.

24 Wì craq doe ka bài mangai ma yòng ta aih: yõc ãac haq qmat, am ka mangai ma khoe i moeq jàt capiac ãac.

25 Wì doe: Wì craq! haq aih khoe jah mòeq jàt capiac ãac.

26 Au doe ka pì: mangai leq khoe i, aih èh jah am tam, mangai leq ùh i, aih èh yõc hloe cleq wì haq ma khoe i.

27 Mahaq bài mangai leq ma tagit ka au, ùh enh ka au broq bùa enh qnhèq ka wì haq, qnoh wì haq tacô, jêh cađac enh ngèa au kô."

Jesus mùt ta Jêrusalem qmang ka bùa

28 Atiq ka Chuaq Jesus tapoch qmang aih, haq lam enh ngoe ka wì, tồc ta Jerusalem.

29 Jò haq ten trùh ta plài Bêpha-jê xam plài Bêthani ajang wang Ôliu, haq thê deh baiq ngai tiaq hóc lam,

30 rai tanap: “Lam ta plài enh ngèa chôp qmat, Jò mùt ta plài chôp hnoq mòeq toq lùa kon wì kàt, qnhòq lah i cabô kòe, caqnaih caxi dùi ahlài tacô ka au.

31 Tàng i cabô bòch chôp: gleq chôp majah caqnaih haq? Chôp doe: Chuaq i yiniq waq ka haq”.

32 Baiq ngai loh lam, glàm tìah ka bàu Chuaq Jesus khoe doe.

33 Jò qnang caqnaih lùa kon aih, cla mangai ban lùa aih bòch: Hagleq majah caqnaih lùa mat,

34 wa padreo bàu: Chuaq i yiniq waq.

35 Wa aih tiaq lùa aih ahlài ka Chuaq khoe èh yóc deh eo hlèch ta crống lùa, dèch Chuaq tồc hangui enh qnhèq.

36 Jò Chuaq Jesus qnang tồc ti trong, bàc ngai qyóc dèh eo hlèch ti trong lam.

37 Jò ten trùh criang Ôliu, dìq dồng mangai tiaq hóc manè pi cajaq, wì dèh bàu manè apôi Boc plình rìm trong halac wì haq ma khoe hnoq.

38 “Xôq ramot am ka bùa trùh ma trùh enh dalam ka Yiniq Chuaq

Kan catèm tanòe diac Plình, kan ra nhòm tanòe dìq jaq haqnèq”

39 I bài mangai Pharisi oe ta mangai bàc ta aih anoe ka Chuaq Jesus: Mangai hnài, ìh tagàih bài mangai hóc tiaq ìh qmat.

⁴⁰ Chuaq Jesus padreo bàu: “Au doe ka pì, tàng joq wì qmat hatinh, bài hmo qmat èh hi cachech”.

⁴¹ Jò Chuaq Jesus haten ngan hnoq Jêrusalem, haq hmoe ka Jêrusalem.

⁴² Haq doe: “Au ngèh hì kô, gè loq yiniq cleq aràng am ka gè kan catèm, mahaq yiniq aih hì kô khoe gahnàp, mat gè ùh xau hnoq.”

⁴³ Majah qmang aih i mòeq hì trùh ti gè, jò wì ma tagit ka gè bôc lì wa wènh ka gè, dudan ka gè tap bè;

⁴⁴ wì raliang jêh cađac dìq dǒng, xam cla xam wì kon ma oe taqne gè qmat. Wì ùh òeq mòeq pliang hmo leq oe jah raxon enh qnhèq ka dabau, majah qmang aih, gè khoe ùh canau jò Boc plình trùh ti dăđeh”.

Jesus ta hnim kùh waiq

⁴⁵ Jò Chuaq Jesus mùt ta hamlang hnim kùh waiq, haq drùh qnoh dǒng bài mangai padro ta aih.

⁴⁶ Haq doe: “I bàu achìh: Hnim au kô hnim waiq khàn, mahaq pì broq haq wìa pù atùng.”

⁴⁷ Rìm hì haq hnài ta hnim kùh waiq. Bài pajàu kàn, bài mangai hnài ranenh xam bài gucraq gùng aih, chaq trong jêh đac haq;

⁴⁸ Mahaq wì ùh qnì chaq trong leq, majah qmang aih dìq dǒng mangai ta aih ùh talic ka tamàng bàu haq.

20

Wì bôch Jesus yǒc cwiàng enh leq

¹ I mòeq hì ta bài hì aih Chuaq Jesus qnang hnài wì tanòe hnim kùh waiq rai anoe ka wì trong

Bàu lem, i bài pajàu kàn, bài mangai hnài ranenh, taqmùt ti bài gucraq trùh ta haq,

² wì bòch: Anoe ka nhèn cwiang enh leq ìh majah broq qmang kô, cabô ma am ka ìh cwiang aih?

³ Haq padreo bàu: “Au hanoh bòch pì mòeq bàu. Drah anoe ka au:

⁴ Baptem da Jon trùh enh Plình loq loh enh mangai?

⁵ Wì aih ta hatình ka dabau: Tàng bèn doe: Trùh enh Plình, aih èh haq bòch bèn: Qmang aih gleq pì ma ùh lùì bàu haq?

⁶ Tàng bèn doe: Loh enh mangai, aih èh òiq ka mangai bàc wì yỏc hmo ãáp bèn, majah qmang aih wì khoe lùì Jon aih joq mangai pajàu.

⁷ Qmang aih wì padreo bàu doe: Nhèn ùh qnì haq loh enh leq.

⁸ Chuaq Jesus doe: “Au hadai ùh doe ka pì loq cwiang enh leq au ma broq òòe yiniq kô.”

Bàu patìah trùh mangai pìt nho

⁹ Haq alìah hloe ka wì qmang kô: “Ì mòeq ngai pìt mòeq wuàn plì nho, am ka wì broq axong wuàn nho aih khoe èh cla haq lam gùng hangai dùnh hì.

¹⁰ Trùh jò git plì, cla haq thê deh mòeq ngai hapỏng trùh ta bài pìt nho hu ta axon yỏc plì, mahaq bài mangai pìt nho jêh hapỏng aih, hnan haq hlài tì dech.

¹¹ Wì craq thê hapỏng maqnoeq hòmm, mahaq wì hadai jêh, hanip, èh hnan haq aih hlài tì dech.

¹² Wì craq thê hapỏng yàng pìq, wì hadai jêh haq aih loh habau rai hnan ãac.

¹³ Craq wuàn nho aih doe: Au broq qmang leq kô? Au thể deh kon calô au ma loq waq, lam, broq braiq wì camaih iu ka haq.”

¹⁴ Mahaq jò bài mangai pìt nho hnoq kon calô aih trùh, wì hatuàng ka dabau: Hatau mangai kon majah waq đồng kùng hang, beq bèn jêh cađac haq, aih èh kùng hang haq jah đồng bèn.

¹⁵ Wì hi khwênh qnoh haq enh gùng ka wuàn nho rai jêh cađac hloe. Aih èh craq wuàn nho broq cleq ka bài aih?

¹⁶ Haq trùh jêh đồng bài mangai pìt nho aih khoe èh yôc wuàn aih am ka mangai qnoeq abèq.

Bài mangai ma tàng bàu aih wì doe: Boc Plinh ùh i manaq taleq!

¹⁷ Chuaq Jesus ngan wì haq rai bòch: “Tàng qmang aih bàu ma achìh:

Hmo mangai thòq broq hnim cađac,

Khoe wìa hmo mùm hnim, bàu aih anoe cleq?

¹⁸ Mangai leq ta clih ta hmo kô èh, hech loh dác, hmo kô tùc troq cabô, mangai aih èh hech hoch đồng.

¹⁹ Wop jò aih, bài pajàu kàn xam bài mangai hnài ranenh chaq trong jêh cađac haq, majah qmang aih wì loq bàu Chuaq Jesus aliah aih anoe trùh wì haq raq. Mahaq wì ùh hùa ka bài mangai bác ta aih.

Am

Thèq ka Sêsa

²⁰ Wì ti hanhoe ngan haq, wì thê bài mangai ti rinh broq patiah mangai khôn khuq, òeq chaq trong hu goh haq ajang bàu tapoch, hu rùp haq am ka bài mangai i cwàng, mangai gàu bài cwan.

²¹ Wì aih bòch Chuaq Jesus bàu kô: Mangai hnài! Nhèn loq trong bàu tapoch, trong hnài da ìh tiaq trong jang, ùh loq waq tang ngai, yõc bàu joq qnàng ðoèq hnài trong Boc plình.

²² Nhèn akhòh am thèq ka Sêsa ùh?

²³ Mahaq Chuaq Jesus loq ka manoh wì, haq doe:

²⁴ “Am ka au ngan mòeq ðo-ni-ê beq, Kô ìq qmù cabô, yiniq cabô?” Wì padreo bàu: Sêsa.

²⁵ Haq doe ka wì: “Padreo da Sêsa yiniq cleq da Sêsa, am da Boc Plình yiniq cleq da Boc Plình.”

²⁶ Enh nèa mangai bàc wì bahlac bàu haq ùh jah. Toq hamàih ka bàu haq ta hatèu, wì hi loh ka hatinh.

Jò rìh hlài

²⁷ I qnah ngai Sadusê, aih bài mangai loq doe ùh i kan rìh hlài, wì trùh haten ka Chuaq Jesus rai bòch:

²⁸ Mangai hnài, Môise khoe ðoèq ka nhèn ranenh qmang kô: Tàng mangai i daq yõc mai, khoe haq cachit, ùh i ðeh kon, mangai oh aih ep yõc mai deh daq aih ðoèq haqmot hlài xinoe ka daq haq.

²⁹ Qmang aih, i tapèh ngai oh daq. Mangai daq ramua yõc mai, èh cachit qnhòq i kon.

³⁰ Mangai hatia yõc mai aih,

³¹ èh trùh mangai atiq, ðiq ðõng wì tapèh ngai ðiq yõc mangai aih, wì ðiq cachit mahaq ùh lòm i kon.

³² Pulùch, mangai cadri aih hanoh cachit.

³³ Qmang aih èh trùh hì rìh hlài gucadri aih broq mai cabô? Majah qmang aih ðiq ðõng tapèh ngai aih hanoh khoe yõc gucadri aih broq mai.

³⁴ Chuaq Jesus doe: “Mangai qnhòng kô yỏc ỏng yỏc mai,

³⁵ mahaq bài mangai ma khoe troq ka jah kan rìh hlài qnhòng atìq, jò rìh hlài enh kan cachìt, aih pi i yỏc ỏng yỏc mai hòm.

³⁶ Majah qmang aih wì haq pi cachìt hòm, wì haq tìah ka bình plình, wì haq aih kon Boc Plình, aih kon da kan rìh hlài.

³⁷ Mahaq da mangai cachìt rìh hlài aih Môise khoe am loq jò anoe hlài ùnh cheo ramù yìla, jò haq doe Chuaq aih Boc Plình da Apraham, Boc Plình da Ysac, Boc Plình da Jacôp.

³⁸ Haq ùh xài Boc Plình da mangai cachìt, mahaq da mangai rìh, majah qmang aih rìm ngai dìq rìh ka haq.”

³⁹ I bài mangai hnài ranenh anoe ka haq: Mangai hnài, bầu ìh anoe dìq jaq troq.

⁴⁰ Wì pi hùa bòch tam haq mòeq bầu leq hòm.

Christ aih kon cabô

⁴¹ Khoe aih Chuaq Jesus bòch wì haq: “Hagleq wì ma doe Christ aih kon bùa Đawit?

⁴² majah qmang aih cla Đawit raq khoe anoe ta hset calêu plình rameh:

Boc Plình doe ka Chuaq au:

Hangui enh apah qma ka au,

⁴³ Trùh jò au rùp mangai tagit ka ìh broq radua roh jènh ìh.

⁴⁴ Đawit khoe crêu ka haq aih Chuaq, atìq ka aih haq wìa kon Đawit qmang leq?”

⁴⁵ Jò dìq dỏng ka wì ta aih qnang tamàng, Chuaq Jesus doe ka mangai tiaq hỏc:

⁴⁶ “Ngan oq! bài mangai hnài ranenh, aih bài mangai enh toq caxùnh eo yôh, ti lam dauq hawàt, enh wì kùh gàu ka rađeh tagne chòq, ta hnìm tagop enh toq hangui nòe yì haqnhèq, jò acaq yiniang enh toq hangui enh qnhèq;

⁴⁷ waiq khàn broq deh waq ka yôh, mahaq lòngh apom hnìm gucadrì hadrô. Bài aih èh Boc plình taqmòq kan baxa ka wì haq yeo bàc.”

21

Mangai gucadrì hadrô craq tah bàc

¹ Jò Chuaq Jesus haqmiang ngan, hnoq bài mangai padròng tah bàc ta hnìm kùh waiq,

² èh hadai hnoq mòeq ngai gucadrì hadrô tah baiq hliac bac.

³ Haq doe: “Joq qnàng au doe ka pì, mangai hadrô pa qmat tah yeo bàc dǝng ka wì qnoeq.

⁴ Majah qmang aih bài mangai padròng tau tah toq bàc rah, yàng mangai hadrô qmat joq nan pa, mahaq khoe tah dǝng deh bàc ðòeq haq ban rađeh.”

Hnìm kùh waiq raliang

⁵ I qnah ngai anoe trùh hnìm kùh waiq, xam bài hmo lem xam bài dahwèq dèch ka Boc Plình. Chuaq Jesus doe:

⁶ “Tangèa kô èh, rìm yiniq pì ngan hnoq qmat èh taclìh dǝng ðìq pì oe i mòeq pliang hmo leq oe jah raxon crǝng hmo leq.

⁷ Wì hi bòch haq: Mangai hnài, bài yiniq aih jò leq men trùh? I cleq pateo ka am ka mangai loq bài yiniq aih khoe ten trùh?

⁸ Haq padreo bàu: “Pì ngan oq! apaq dôq wì padô qnùt pì, majah qmang aih i bàc ngai patiah yiniq au, trùh doe ka pì: Au kô raq Christ! Jò atiq lùch khoe ten trùh. Ûh dùh tiaq wì haq.

⁹ Jò pì tàng ràu trùh trong tajêh tablah, apaq yùq hrìn, majah qmang aih bài yiniq aih ep trùh adroe, mahaq kan atiq lùch qnhòq trùh hloe draq drình.”

¹⁰ Khoe aih haq anoe ka wì: “Gùng kô yòng tagit gùng tau. Diac kô tagit ka diac tau.

¹¹ Èh i kan ràlàng kàn, pangot hrah, xam bàc kan jìq dài, i bài kan ramòt halac kàn oe ta tróc.

¹² Mahaq adroe ka bài yiniq aih trùh, taiq yiniq au kô èh wì phù cròng majah ti canàt rùp baxa pì, aràng pì ta hnìm tagop rai clêh pì, qnoh pì yòng enh ngèa ka bùa xam mangai broq craq cwan.

¹³ Aih òòeq pì yòng anoe dôq wì loq ka au.

¹⁴ Qmang aih pì ep hmàng ta gàu, apaq lèt kô èh ðeh anoe cleq hu aclai ka raðeh.

¹⁵ Majah qmang aih, i au am ka pì bàu capoch xam kan rabiaq òòeq mangai git ka pì ùh hlàt tablêq, ùh i trong hu goh pì.

¹⁶ Kô èh, ra-ùng haq, miq baq, daq oh, hadròng, trùh hloe bua cla pì hadai blòq pì, broq ka bàc ngai taqne pì ep cachìt.

¹⁷ Taiq au kô èh rìm ngai majah git ka pì.

¹⁸ Mahaq mòeq hadrang xác tagàu pì dua ùh hnhung.

¹⁹ Yòng ma cajap haq oq, aih èh pì jah kan rìh.

²⁰ Jò pì hnoq bài lình canàt tap danh ka Jêrusalem, aih pì loq kan raliang da haq khoe ten trùh.

21 Jò aih cabô oe ta gùng Judê drah cadàu tồc tawang. Cabô oe ta plài drah ca dầu loh enh gùng. Cabô oe tagùng ùh dùh wìh mùt taplài.

22 Majah qmang aih bôe aih jò ðòeq hu patem chau, ðòq xít qmang ka rìm bàu khoe achìh.

23 Bài hì aih èh, haño ka mangai cadrì oe jiang xam gucadrì ta-ùq kon! I kan ranàc kàn, kan panòeh ka mangai gùng kô.

24 Wì haq cro enh qneq ka pla chang, èh wì rùp qnong wì haq lam broq ðic ta ðiac qnoeq. Èh mangai ðiac qnoeq jôiq padit Jérusalem, trùh jò ða mangai ðiac qnoeq jah gêh.

25 Èh i kan halac ta mat mahì, mat khô xam bài halông, bài mangai ta taneh loh ka mangò yùq crè majah qmang aih ðiac raxìq loh atêh tagruàng tagràt.

26 Jò aih kon mangai hnoq trong dù trùh ta crông taneh, loh ka pì ì qmòe mahua yiang, majah qmang aih bài cwàng ta trồc tì hadai ka ðalàc.

27 Jò aih èh phù crông ma hì hnoq Kon Mangai yỏc cwàng yỏc kan ranhòm kàn hangui taqne yùc plình hu trùh.

28 Jò bài yiniq kô bu trùh, drah yòng majang, gàu rai qngỏc, hì baxon yỏc ahlài pì trùh khoe ten

29 Haq aliah ka wì qmang kô: Pì ngan long pỏc xam bài long qnoeq;

30 jò haq plỏh hamỏng, pì hnoq qmang aih, pì loq ðeh khoe ten trùh jò padrang.

31 Hadai qmang aih, jò hnoq khoe loh bài yiniq kô, aih pì loq ðiac Boc Plình khoe ten trùh.

32 Au anoe qnàng ka pì, nang noe kô ùh lùch adroe ka bài yiniq aih trùh.

³³ Plình crông taneh kô èh hnhung, mahaq bàu au anoe kô èh ùh jò leq hnhung.

³⁴ Qmang aih ep wèq rađeh, yùq èh trong acaq ôq, trong bù bia xam kan loq lèt taqnhòng kô broq ka manoh pì loh ka pì hmàng, èh hì aih trùh tapì tìah taiq ka jeo gùp;

³⁵ majah qmang aih, hì aih hadai trùh ka rìm ngai oe ta crông taneh.

³⁶ Qmang aih pì ep hamang rai waiq khàn yôt, dôq pì jah puplech ka bài kan ranàc aih, hu jah yòng enh ngèa Kon mangai."

³⁷ Rìm hì haq hnài ta hnim kùh waiq, rìm mang haq tồc ta wang Oliu kùì padài ta aih.

³⁸ Èh bu qngah bài mangai bàc khoe trùh ta hnim kùh waiq hu tamàng bàu haq.

22

Juđa òq bàu tech Jesus

¹ Hì Ramènh Bènh ùh tah blo, aih la hì ramènh Pancwa.

² Bài pajàu kàn xam bài mangai hnài ranenh chaq trong hu jêh cađac Chuaq Jesus, majah qmang aih wì ùh hùà ka mangai bàc ta aih.

³ Kiac Satan khoe mùt enh dalam ka Juđa, ma creo Icari-ôt, haq hadai mangai oe ta Mòeq jàt baiq ngai,

⁴ haq lam chaq bài mangai pajàu kàn xam bài craq linh ma wèq hnim kùh waiq, haq ta hatình tì wì hu chaq trong leq òđeq rùp Chuaq Jesus am ka wì.

⁵ Wì aih manè pi cajaq, òđeq ka wì wiang òq bàu am ka haq bàc.

⁶ Haq khoe mòeq manoh ka wì, chaq jò hatroq hu rùp Chuaq Jesus am ka wì, mahaq ùh dōq mangai bàc loq.

⁷ Trùh hì Ramènh acaq bēnh ùh tah blo, hì aih ep jēh kon trùu broq tadreo hì ramènh Pancwa,

⁸ Chuaq Jesus thē xam Phiero xam Jon lam rai tanap: “Lam padon ka bēn acaq ramènh Pancwa.”

⁹ Wa aih doe: Ìh enh nhèn padon ramènh aih taleq?

¹⁰ Haq padreo bàu: “Jò chōp mùt taplài, hnoq mòeq ngai wē abōq diac, chōp drah tiaq haq aih mùt ta hnim,

¹¹ chōp doe ka craq hnim aih, Mangai hnài nhèn doe ka ìh: Aniang kàn nòe au acaq ramènh pajùm deh ti mangai tiaq hōc oe taleq?

¹² Craq hnim aih hì patō am ka chōp mòeq adùq kàn oe enh qnhèq, ta aih rìm yiniq khoe palauq qmòe, pì padon ta aih”.

¹³ Wa aih hì lam, joq qnàng wa glàm tìah ka bàu Chuaq Jesus khoe doe, wa hì padon ramènh Pancwa ta aih.

¹⁴ Trùh jò, Chuaq Jesus xam bàì mangai tiaq cla hangui acaq ti haq.

¹⁵ Haq doe: “Au dìq jaq enh acaq ramènh Pancwa kô ti pì adroe ka au chiuaq xalep.

¹⁶ Majah qmang aih, au pì acaq ramènh kô hòm trùh hì ramènh aih jah gēh ta diac Boc Plình”.

¹⁷ Khoe aih haq dèch doe chrōng, manè apōi, hì khoe haq doe: “Yōc chrōng kô pì qnèp ka dabau.

¹⁸ Majah qmang aih au doe ka pì, pang kô ta èh au pì ôq diac plì nho kô hòm trùh jò leq diac Boc Plình jah trùh”.

19 Khoe aih, haq yǒc bēnh, manè apô, khoe èh goh bēnh axong am ka mangai tiaq hǒc, rai doe: “Kô chac au, khoe am ka pì, pì broq qmang kô hu hmàng trùh au.”

20 Acaq hi khoe, hanoh qmang aih, haq yǒc chrǒng qnèp ka mangai tiaq hǒc rai doe: “Doe chrǒng kô aih tajao maneo oe ta mahim au, mahim khoe ta ùc qnoh am ka pì...”

21 Mahaq tì kǒng da mangai ma padon blòq au hadai oe ta cabǒng kô ti tì au.

22 Kon Mangai kô èh lam, tìah ka bàu khoe thê. Mahaq haǒo ka mangai ma blòq haq.”

23 Mangai tiaq hǒc bǒch dabau, taqne wì haq mangai leq ma broq trong aih.

Mangai tiaq hǒc tarahen

24 Mangai tiaq hǒc tarahen ti dabau, òe q hu ngan mangai leq ta wì haq èh majah broq yeo kàn òng.

25 Chuaq Jesus doe ka wì: “Bàì bùa diac wì yǒc deh cwàng enh cla òe q hu hmet mangai qnoeq, bàì mangai broq gàu yǒc cwàng padit mangai qnoeq, mahaq creò ka rađeh aih mangai broq lem.

26 Mahaq pì ùh dùh qmang aih, taqne pì mangai leq ma yeo kàn ep tìah qmang ka mangai yeo qyoh, mangai leq broq gàu ep broq tìah ka mangai patìh.

27 Majah qmang aih moeq ngai haqngui acaq xam moeq ngai yòng patìh mangai maleq ma yeo kàn? Axài mangai haqngui acaq loq ùh? Mahaq oe taqne pì au tìah ka mangai patìh.

28 Pì bàì mangai ma khoe cajap manoh yòng ti au jò wì tah hadrah ka au,

²⁹ aih èh au am ka pì diac au, tìah ka Baq au ma khoe am ka au,

³⁰ dôq pì jah acaq ôq pajùm ti au ta diac au, jah hangui ta gèq hu hadrah mòeq jàt baiq xinoe Isorali.

³¹ Simôn, Simôn! Kiac Satan khoe bàc yàng bòch ùm ìh tìah ka ùm qmau.

³² Mahaq au khoe waiq khàn ka ìh, dôq manoh lùì ìh ùh hìaq capòch. Qmang aih, jò ìh khoe hwi hlài, drah broq ka cajap manoh oh daq”.

³³ Phiero doe: Chuaq au! yac ka wì rùp clèh au, yac ka au cachit, dua au tiaq ìh.

³⁴ Chuaq Jesus padreo bàu: “Phiero, au doe ka ìh, hì kô èh, adroe ka ia rông ìh khoe piq yàng hangah ðeh ùh qnì ka au.”

³⁵ Khoe aih Chuaq Jesus bòch wì haq: “Jò au thê pì lam ùh wê ðac, ðau, ùh i qmòe ka jep, pì ahìaq thùuq cleq ùh?” Wì padreo bàu: ùh hìaq!

³⁶ Haq doe ka wì: “Mahaq manòeq kô, tàng pì i ðac, wê beq, maleq i ðau, hadai qmang aih. Maleq ùh i ka chang, lam tech eo yôh qmat ðòeq hu rot.

³⁷ Majah qmang aih, kô au anoe ka pì loq, i bàu khoe achìh rameh: wì alùh haq pajùm ti bài mangai dù. Bàu aih ep xit trùh ka au. Joq qmang aih, rìm yiniq khoe patô trùh au qnang jah xit.”

³⁸ Mangai tiaq hóc doe: Ìh ngan kô, nhèn i baiq pla chang. Haq doe: “Toq aih khoe qnang lem.”

Jesus waiq khàn ta wang Ôliu

³⁹ Khoe aih, Chuaq Jesus tócc ta wang Ôliu, qmang ka haq ma loq lam dèh yôt, bài mangai tiaq hóc lam tiaq deh haq.

⁴⁰ Jò khoe trùh nòe, haq doe ka mangai tiaq hỏc: “Waiq khàn beq, dỏq pì ùh hìaq taclìh ta kan padỏ qnùt.

⁴¹ Khoe aih haq lam yeo hangai bu mỏeq atẻm hmo, rai hacủn crẻng rai waiq khàn

⁴² rameh: “Waiq Baq! Tẻng joq lem manoh Ìh, dẻch chrẻng kỏ khoe ka tì au. Hnoq doe qmang aih apaq dỉ manoh au mahaq tiaq manoh Ìh.”

⁴³ I mỏeq bẻnh plẻnh loh enh plẻnh trùh jang haq, tam padren ka haq.

⁴⁴ Jỏ dỉq jaq mangỏ aih, haq waiq khàn yeo criaq hỏm, pa-ủh haq loh tẻh qmỏe ka mahim, catỏh ta taneh.

⁴⁵ Hẻq ka waiq khàn haq wẻh hlẻi ajang nỏe bài mangai tiaq hỏc hnoq wỉ kủi pỉ hmẻng ta kan mangỏ.

⁴⁶ Haq bỏch wỉ: “Hagleq pỉ majah kủi? Drah yẻng beq hu waiq khàn dỏq pỉ ùh hìaq clẻh ta kan padỏ qnùt.”

Wỉ rủp Jesus

⁴⁷ Jỏ haq oe raq anoe, mỏeq calủh mangai trùh, Judỏ haq hadai oe ta mỏeq jẻt baiq ngai, lam qmỏe adroe hu qnong wỉ. Judỏ trùh ka haten hẻp Chuaq Jesus.

⁴⁸ Mahaq Chuaq Jesus bỏch haq: “Judỏ, ìh blỏq cađac Kon mangai xi mỏeq qmang hẻp kỏ raq qmỏh?”

⁴⁹ Jỏ mangai tiaq Chuaq Jesus hnoq khoe padon loh yiniq, wỉ bỏch: Nhẻn yỏc chang nhẻn jẻh khỏh ùh?

⁵⁰ I mòeq ngai ta bòe mangai tiaq hǒc jêh mangai hapǒng pajàu haqnhèq, pot catech da haq aih don pah qma.

⁵¹ Mahaq Chuaq Jesus doe: “Hêq pi dùh broq qmang kô.” Èh Haq yǒc tì bèq don mangai aih rai broq brêh.

⁵² Khoe aih Chuaq Jesus tapoch ka bài pajàu kàn, bài cwan wèq hnim tagop xam bài gucraq ma lam rùp haq “Pì wê chang, wê long lam rùp au tiah ka lam rùp mangai atùng.

⁵³ Rìm hì au oe ti pì tanòe hnim kùh waiq, pì ùh rùp au. Mahaq manòeq kô jò da pì, jò da diac clam cluiq”.

Phiero hangah ðeh ùh qnì ka Jesus

⁵⁴ Khoe aih wì hi rùp Chuaq Jesus, qnong haq trùh hnim mangai pajàu haq nhèq, Phiero ti taqyoe enh hangai.

⁵⁵ Jò aih i qnah ngai patep ùnh qne hamlang, wì hangui qnhia ùnh ti dabau, Phiero hadai hangui ti wì aih.

⁵⁶ I mòeq ngai hapǒng cadrì hnoq Phiero hangui qnhia ùnh, haq chrih ngan ka haten rai doe: Mangai kô hadai mòeq bua ti haq tau.

⁵⁷ Mahaq Phiero hangah: Mangai cadrì meh, au ma i loq ka haq aih.

⁵⁸ Atìq ka aih mòeq ahyàc, i mangai qnoeq hnoq Phiero, haq doe: Ìh hadai taqmùt ti haq tau. Phiero doe: Cleq kô! Au ùh i taqmùt ti wì aih.

⁵⁹ Jah mòeq jò atìq ka aih, i mangai qnoeq hòm doe: Cleq kô, hi loq ka mangai taqmùt ti haq tau, majah qmang aih ìh kô mangai Galili.

⁶⁰ Phiero padreo bàu: Mangai kô! Au ùh qnì tàng ìh doe cleq. Jò Phiero qnang anoe, ia rông hloe jò aih raq.

⁶¹ Chuaq Jesus hwi enh rù rai ngan tajang ka Phiero. Aih Phiero ma hi hmàng hlài bàu haq ma khoe doe ka rađeh: “Hì kô èh, adroe ka ia rông, ìh khoe piq yàng hangah đeh ùh loq ka au.”

⁶² Haq hi loh enh gùng rai hmoe ua ac.

⁶³ Bài mangai ti rap ngan Chuaq Jesus halê rai jêh haq;

⁶⁴ wì bàng mat haq raih bòch: Tapoch pajàu beq! cabô jêh ìh!

⁶⁵ Wì hnáp ka haq bác trong qnoeq hòm.

⁶⁶ Qngah sroq eh, bài gucaq gùng aih xam bòe mangai pajàu kàn hloe xam bài mangai hnài ranenh, wì tagop ti dabau, thê qnoh Chuaq Jesus loh enh ngèa wì haq.

⁶⁷ Wì doe: Tàng joq ìh qmat Christ, ìh drah anoe ka nhèn beq! Haq padreo bàu: “Yac ka au doe cleq, dua pì ùh lùì,

⁶⁸ tàng joq au bòch pì, aih dua pì ùh têu bàu.

⁶⁹ Mahaq pang kô ta èh, Kon mangai hi hangui pah qma cwàng itai Boc Plình”.

⁷⁰ Rìm ngai wiang bòch: Tàng qmang aih ìh qmat ma kon Boc Plình qmòh? Haq padreo bàu: “Pì raq khoe doe au kon haq”

⁷¹ Khoe aih wì doe: Bèn ep gòm cabô anoe cleq ka bèn hòm? Bèn khoe tàng qmòe bàu enh cla haq qmat raq.

23

Jesus yòng enh ngèa Philat

¹ Khoe aih diq dǝng mangai wiang tah hadrah padinh yǝng arǝng haq trùh enh ngèa Philat.

² Wì tapoch bàu hu taqmǝq yiniq lui ka haq: Nhèn khoe hnoq mangai kǝ patùt mangai bèn broq ùh troq, ùh lòh am thèq ka Sèsa, haq doe raḏeh kǝ Mèsia, aih la bùa.

³ Philat àu bòch haq: Ìh kǝ ajoq bùa mangai Judǝ? Chuaq Jesus padreo bàu: “Jǝq qmang ka bàu ìh khoe doe”.

⁴ Philat doe ka bài pajàu kǝn xam diq ka mangai ta aih: Au ùh i hnoq qmǝe mangai kǝ i yiniq lui cleq.

⁵ Mahaq dua wì àu waq ka jah: Haq kǝ baxrùq diq ka mangai ta gùng Judǝ xi bàu haq hnài. Haq baxèm qmǝe enh gùng Galili trùh hloe ta kǝ.

⁶ Tàng bàu aih, Philat bòch: mangai kǝ ajoq mangai Galili?

⁷ Jǝ Philat khoe loq Chuaq Jesus oe tanǝe cwìang bùa Hêrot, hi arǝng haq trùh ta bùa Hêrot, jǝ aih bùa Hêrot hadai oe ta Jérusalem.

⁸ Jǝ Hêrot hnoq Chuaq Jesus, haq manè pi cajaq, majah qmang aih haq ngèh ka jah hnoq Chuq Jesus khoe dùnh. Haq khoe tàng wì anoe trùh Chuaq Jesus, haq enh hnoq kan halac.

⁹ Hêrot bòch bàc trong, mahaq Chuaq Jesus ùh tèu.

¹⁰ Bài pajàu kǝn xam mangai hnài ranenh yǝng ta aih, chaq trong taqmǝq yiniq lui ka haq nhang haraya.

¹¹ Jǝ aih Hêrot xam bài lình haq, ngan Chuaq Jesus ùh loh cleq, toq ti halê haq, caxùnh ka haq eo yǝh lem khoe hi padreo ahlài da Philat.

¹² Nèh haq, wa Philat wa Hêrot tagit ka dabau, mahaq pang hi aih wa hi loh ka hatroq.

¹³ Philat creo ka bài pajàu kàn xam bài cwan hadrah xam diq ka mangai ta aih oe mòeq nòe,

¹⁴ haq doe ka wì: Pì aràng ka au mangai kô pì doe haq baxrùq wì hu yòng tablêq ka Sêsa; enh ngèa ka pì au khoe ti bòch haq, au ùh hnoq haq i yiniq lui cleq tiàh bàu pì ma anoe;

¹⁵ yac ka bùa Hêrot hadai, majah qmang aih, hacô haq khoe padreo ahlài mangai kô ka bèn, pì hanoh hnoq. Mangai kô ùh i yiniq lui cleq ma troq ka cachit,

¹⁶ qmang aih au thê wì blai haq khoe èh hi caqnaih haq

¹⁸ Diq ka wì wiang cachech: Jêh cađac mangai kô, caqnaih da nhèn Baraba!

¹⁹ (Baraba aih mangai pagàu yòng tablêq ka Sêsa, haq i jêh đac mangai.)

²⁰ Philat enh caqnaih Chuaq Jesus, haq majah bòch hòm wì.

²¹ Mahaq kiang wì cachech cadêh: Tiang đình haq talong pagat beq! Tiang đình haq talong pagat beq!

²² Philat doe hòm yàng piq: Mahaq mangai kô khoe broq cleq ma dù? Au ùh i hnoq haq i qmòe yiniq lui cleq ma troq ka cachit. Qmang aih au blai haq khoe èh caqnaih haq.

²³ Mahaq dua wì àu cachech cadêh: Ep tiang đình haq talong pagat; bàu cachech wì haq jah blêq.

²⁴ Philat hi thê broq tiaq qmang ka bàu wì bòch.

²⁵ Philat caqnaih mangai haq ma khoe clêh, aih mangai jêh đac mangai rai baxrùq wì yòng tablêq

ka Sêsa, tiaq bầu wì bòch, khoe aih am Chuaq Jesus ka wì haq tiaq manoh wì ma enh.

Tiang đình Jesus talong pagat

²⁶ Jò bài lình qnong Chuaq Jesus lam, hnoq mòeq ngai gùng Siren, yiniq haq Simôn hlài enh ruàng. Wì rúp haq aih thê xùì long pagat lam atìq ka Chuaq Jesus.

²⁷ Raya mangai lam tiaq Chuaq Jesus, i qnah ngai gucadrì rai tùc dèh nòeh rai crò hmoe ka haq.

²⁸ Chuaq Jesus hwi ngan rai doe ka wì haq: “Yôiq bài kon gucadrì Jêrusalem, ùh dùh hmoe dèh ka au, hmoe ka cla pì xam bài kon pì.

²⁹ Majah qmang aih ta ngèa kô èh jò pì ma hi doe: Xôq ramot ka gucadrì xon, xôq ramot ka cliac ma ùh lah hauang xam tòh ma ùh lah ta-ùq!

³⁰ Jò aih èh wì doe ka bui wang: Ta-ùc enh qnhèq ka nhèn kô beq! doe ka go: Gúp enh qnhèq ka nhèn beq!

³¹ Tàng joq wì broq bài yiniq aih ka long rìh, long croh èh qmang leq?”

³² Wì hadai qnong baiq ngai qnoeq hòh, wa aih mangai atùng, ðòeq hujêh pajùm ti haq.

³³ Jò wì khoe trùh tanòe wì ma creo go Cadôh, ta aih wì tiang đình haq talong pagat ti wa mangai atùng – mòeq ngai apah qma, mòeq ngai apah qngeo.

³⁴ Mahaq Chuaq Jesus waiq khàn: “Waiq Baq! Ìh caqnaih da wì yiniq lui, majah qmang aih wì ùh qnì rađeh broq cleq.” Khoe èh, wì pàih panàih hu ngan maleq majah eo haq.

³⁵ Wì mangai bàc yòng haqmiang ngan ta aih. Wì mangai ma i cwàng do halê haq. Wì doe:

Haq khoe dèch mangai qnoeq, tàng joq haq qmat Mêsia Boc Plình ma khoe ràih, dôq cla haq doeh raðeh beq!

³⁶ Bài linh hadai racaih blìa ka haq, lam haten ka haq yõc diac panhòq am haq ôq,

³⁷ rai doe rameh: Tàng ìh joq bùa Juda, doeh raðeh beq!

³⁸ Enh qnhèq ka gàu haq wì achìh: Mangai kô bùa Juda.

³⁹ Mòeq ngai atùng wì ma tiang ònh hadai hnáp ka haq: Ìh qmat ùh xài Christ qmòh? Dèch raðeh beq khoe aih dèch nhèn diq!

⁴⁰ Mahaq mangai matau lech ka mangai aih, haq doe: Ìh hadai khoe qmang qmat, gleq ma ùh crè ka Boc Plình

⁴¹ Da ba kô, khoe troq tiaq kan taq atoq, kan baxa ba ùh i qngwan ka trong dù ba broq, mahaq mangai kô haq ùh lah broq qmòe yiniq cleq ma qmèq.

⁴² Khoe èh, haq doe: Chuaq Jesus! jò Ìh hlài dèh diac Plình, hmàng trùh au diq.

⁴³ Chuaq Jesus doe ka haq: “Joq qnàng au doe ka ìh, hì kô raq ìh jah oe ta au ta Paraði.”

Jesus cachit

⁴⁴ Jò aih wop qne hì, diq ta gùng aih loh dõng ka clam trùh hloe piq jò dixèq.

⁴⁵ Mat mahì loh ka clam cluiq, èh bai prình ta hnìm kùh waiq loh ka dahit broq baiq apah.

⁴⁶ Chuaq Jesus creò cadêh: “Baq! au qnèp deh mahua yiang ta tì kǝng ìh.” Atìq ka bàu aih, haq hì pat hì hèm.

47 Cla craq bài linh hnoq qmang aih, haq dèch
bàu manè apôi Boc Plình, haq doe: Kô joq
mangai taq atoq joq qnàng!

48 Dìq đồng bài mangai lam ngan, wì hnoq qmang
aih wì rai hlài rai tùc deh rada.

49 Mahaq bài mangai canau ka Chuaq Jesus xam
bài mangai gucadrì ma khoe tiaq haq enh gùng
Galili, dìq yòng enh hangai hu haqmiang ngan.

Catùh hanang Jesus

50 I mòeq ngai yiniq haq Jôsep, hadai broq cwan
hadrah, haq aih mangai taq atoq.

51 haq ùh mòeq manoh èh haq ùh wiang jò wì
ma hadrah Chuaq Jesus. Haq oe ta Ari-mathê,
gùng Judê, toq tangèh ka diac Boc Plình.

52 Haq lam ta Philat bôch yôc hanang Chuaq
Jesus.

53 Jò khoe qnoh hanang Chuaq Jesus enh long
pagat, haq yôc bai lòm hanang, taqngùi hanang
ta trom ralùng wì khoe pùng òeq tanòe hmo kàn.
Ralùng aih qnhòq lah tah cabô.

54 Hì aih hì padon, èh hì sabat khoe ten trùh.

55 Bài mangai gucadrì khoe lam ti Chuaq Jesus
enh gùng Galili, tiaq Jôsep hu ngan ralùng rai
ngan wì ta qngùi hanang Chuaq Jesus qmang leq.

56 Wì haq wìh hlài ta hnim, padon diac jreo xam
dầu xua thùm. Mahaq hì sabat, tiaq deh ranenh
wì haq padài.

24

Jesus rìh hlài

¹ Hì baxèm tuàng lè, buqngah bài mangai gu-cadrì wê diac jreo xam dầu xua thùm wì haq ma khoe palauq aràng trùh ta ralùng.

² Wì haq hnoq hmo padit qngah ralùng khoe cadro taqnoeq;

³ mahaq, mùt enh dalam ùh hnoq hanang Chuaq Jesus.

⁴ Wop jò wì haq qnang hamàih trong kô, i baiq ngai calô caxùnh eo tiàh ka camlet, loh yòng enh ngèa wa haq.

⁵ Wa haq qnang crè dìq jaq, toq kùp hadrò ta haqneq, wa aih doe: Hagleq pì majah chaq mangai rìh tanòe mangai cachit?

⁶ Haq pi oe tacô, haq khoe rìh hlài. Hmàng hlài beq, jò oe ta Galili haq doe ka pì qmang leq?

⁷ Haq khoe doe: “Kon mangai mùt ta tì kǝng mangai yiniq lui, wì tiang ðình haq talong pagat, hì piq haq hí rìh hlài.”

⁸ Aih wì men hmàng hlài bàu Chuaq Jesus ma khoe anoe.

⁹ Jò wì haq wìh hlài enh ralùng hanang, wì haq anoe hlài yiniq kô ka mòeq jàt mòeq ngai tiaq cla, xam dìq ka wì qnoeq.

¹⁰ Bài gucadri aih: Mari-maðolen, Jano, Mari miq da Jaco xam bài gucadri qnoeq, ma hadai i lam, wì aih anoe hlài yiniq kô am ka bài mangai tiaq cla Chuaq Jesus.

¹¹ Mahaq wì ùh lùì bàu bài mangai gucadri aih anoe, majah qmang aih bàu wì haq tiàh taiq ka bàu tapoch hwang.

¹² Hnoq doe qmang aih, Phiero yòng cadàu tùh loh ta ralùng, haq kùp chri ngan, hnoq toq bai

lom hanang oe jang aih, khoe aih haq hi hlài rai hamàih ta manoh ka bìac aih.

Ti trong hlài ta Em mau

¹³ Hì aih raq, i baiq ngai hadai tiaq hōc, qnang ti trong trùh ta plài Em-mau, enh aih trùh ta Jêrusalem tadràu jàt Êtađo;

¹⁴ wa hatuàng ka dabau bài yiniq neo loh khoe toq leq hì kô.

¹⁵ Jò wa haq qnang ta anoe rai hatình ka dabau, cla Chuaq Jesus trùh rai lam ti wa.

¹⁶ Mahaq mat wa haq ùh canau ka Chuaq.

¹⁷ Haq bòch wa aih: “Jò chòp lam ti trong iq, chòp qnang ta anoe ka dabau cleq?” Wa aih hi yòng, hadrò wa mangò dìq jaq.

¹⁸ Ta wa aih i mòeq ngai yiniq haq Clê-oba, bòch haq: Ahìaq toq ìh kô raq qmòh, mangai enh gùng hangai trùh ta Jêrusalem ma ùh dùh ka loq yiniq neo loh ta aih bu baiq piq hì kô?

¹⁹ Haq bòch wa: “yiniq cleq aih?” Wa aih doe: Aih Chuaq Jesus, mangai gùng Naxaret, haq aih mangai pajàu itai enh yiniq broq trùh bàu capoch, enh ngèa Boc Plình xam enh ngèa kon mangai;

²⁰ ùh qnì hagleq bài pajàu kàn xam bài cwan hadrah majah rùp haq am ka wì jêh đac, èh tiang đình haq talong pagat.

²¹ Nhèn ngèh haq aih èh raq mahu dèch mangai Isorali, nhèn oe ngèh ùh hnau ka aih hòm, yiniq kô loh khoe piq hì kô.

²² Taqne nhèn, i bài mangai gucadrì broq ka nhèn hamàih, sroeh sroq kô wì haq lam ta ralùng,

²³ mahaq chaq ùh hnoq hanang haq. Wì aih hlài doe ka nhèn i bình plình loh doe haq khoe rìh hlài.

24 Khoe aih i bua nhèn lam trùh ta ralùng hnoq rìm yiniq tiah ka bàu ãai gucađrì khoe anoe, cla haq aih ùh hnoq.

25 Chuaq Jesus doe ka wa haq: “Chôp kô joq ùh qnì, hagleq majah adia ka lùì ãiq ka bàu wì pajàu ma khoe anoe!

26 Ùh joq Mangai Mêsia ep xalep qmang aih, khoe aih men jah deh kan ranhòm qmòh?”

27 Khoe aih, haq yôc qmòe enh Môise trùh ãiq ãông ãai pajàu hu anoe ãôq wa loq ãiq ãông bàu ta hset hadròeh, aih ãiq anoe trùh haq.

28 Jò ten trùh ta plài wì haq ma ta-en lam, Chuaq Jesus tiah gleq enh lam tam yeo hangai.

29 Mahaq wa aih àu padràng haq, wa aih doe: Ìh oe tacô ti ma, majah qmang aih trôc khoe ten clam. Qmang aih, haq hi oe ti wa.

30 Jò haq hangui acaq ti wa, haq yôc ãênh, manè apôi, khoe èh goh axong ka wa.

31 Wa hi tapèch mat, canau ka haq, yàng aih haq khoe hnhung hnhaiq.

32 Wa doe ka dabau: Ìq haq jò oe ti trong, haq capoch tuàng ti ba rai anoe bahloh hset Hadròeh, ma ùh joq manoh ba tôq tiah qmòe ka ùnh qmòh?

33 Jò aih raq, wa drah yòng, wìh hlài ta Jêrusalem, glàm mòeq jàt mòeq ngai tiaq cla xam ãai mangai tiaq hôc maqnoeq qnang tagop ti dabau,

34 wa doe: Hi loq! Chuaq Jesus khoe rìh hlài, haq khoe mahno rađeh ka Simôn.

35 Khoe aih wa hi anoe yiniq wa khoe hnoq ti trong, qmang leq wa ma khoe canau ka Chuaq Jesus jò haq goh ãênh.

Jesus dôq mangai tiaq hõc hnoq rađeh

³⁶ Mangai tiaq hõc qnang anoe ti dabau, cla Chuaq Jesus loh taqne wì haq rai doe: “Catèm am ka pì.”

³⁷ Bại mangai tiaq hõc haglèn, tarìt tariang, majah qmang aih wì haq xoh ðeh hnoq kiach chõc.

³⁸ Haq doe: “Gleq pì majah yùq, gleq pì majah ùh lùì qmang qmat?”

³⁹ Ngan jèn, tì au, joq au raq. Pì bèq au beq, ngan beq, kiach chõc ùh i ka xech akia, ùh i ka caxèn, mahaq au i.”

⁴⁰ Jò haq anoe qmang aih, haq patô ðeh xam tì xam jèn, ka wì aih hnoq.

⁴¹ Mahaq bài mangai tiaq hõc lem bùi hrìn, wì loh ka hamàih qnhòq dai lùì, haq hi doe ka wì: “Tacô pì i cleq acaq ùh?”

⁴² Mangai tiaq hõc qnèp ka haq haqnech ka bùh.

⁴³ Haq hi yõc acaq enh ngèa ka wì.

⁴⁴ Khoe aih, haq doe: “Kô raq yiniq au khoe anoe ka pì loq jò au ma oe tì pì: Rìm yiniq ta ranen Mòise, xam bài pajàu xam hset calêu plìn khoe achìh trùh au ep waq ka gèh”.

⁴⁵ Khoe aih, haq pèh gàu ngoc wì, aih wì ma hi loq ka bàu Hset hadròeh.

⁴⁶ Haq doe ka wì: “I bàu achìh: Mangai Mèsia ep xalep qmang aih, trùh hì piq haq hi rìh hlài enh kan cachìt,

⁴⁷ aih èh wì hi yõc Yiniq Haq hu lam anoe ka rìm ngai, rìm diac dôq wì loq raxach ðòeq hujah caqnaih yiniq lui, patep enh Jêrusalem.

⁴⁸ Pì lam anoe hlài yiniq aih, kô èh Au am ka pì yiniq Baq au ma khoe têu,

49 mahaq pì ep oe gòm ta Jêrusalem trùh jò pì jah caxùnh cwìang itai loh enh qnhèq.”

Jesus tǝc taplình

50 Khoe aih haq qnong bài mangai tiaq hǝc trùh nǝe haten ka plài Bêthani, haq dèch tì am xǝq ramot ka wì.

51 Qnang jò am xǝq ramot, haq hi talah ka wì rai jah dèch tǝc ta plình.

52 Mangai tiaq hǝc kùh waiq haq, khoe aih wì wìh hlài ta Jêrusalem rai lem bùi dìq jaq.

53 Mangai tiaq hǝc oe yǝt ta hnim kùh waiq, manè apôi Boc Plình.

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d